

Jém wibic aḡmaṡi jém ijayñewiip jém Lucas

Jém Lucas ijáyáy jém iamigo Teófilo

1 Waṡi jém piḡiñ iḡis iga ijaypa íṡam nasne aichtámaḡjom juuts tum historia wiṡsacnetawiip, ²juuts taḡquejáy jém tantíwítam jém iixñeyajwiip iixcuymi dende wiñṡi. Jeeyaj iwaganasiiba jém inimiññewiip jém wibic aḡmaṡi. ³Ich anḡispaṡim iga wiṡ iga manjáyaypa tum historia, numtsacneum. Aḡwiṡiipiḡ iṡumpiḡ cosa jém nasnewiip dende wiñṡi. Jeeyucmi siip manjáyaypa, wibic miTeófilo, ⁴iga iñjodóḡaiñ iga da je miḡooyi jém miḡquejayñetawiip.

**Juṡpic naypa jém Xiwan
jém acchiḡoypaap**

⁵Jesic jém tiempo cuando jém rey Herodes inḡjacpa Judea, íṡ idíc tum Israelpic paḡij iñiyi Zacarías. Yoḡap idíc jém miḡpic mastiḡjom. Wagayoxayajpa con jém grupo de jém Abíaspic paḡijiyaj. Jém iyomo iñiyi Elisabet. Jém yomo ífummiyaj con jém wiñicpic paḡij Aarón. ⁶Icuistic iwíwatayajpa tanḡatuj Dios iwiñjom. Icupicyajpaṡim Dios inḡquímayooyi y jém inḡmadayooyi. Da i wiap ipadáy jém íṡaḡca.

⁷Pero jém Zacarías con iyomo da maḡiḡiyaj. Da wiap inḡpic jém yomo. Siip tsamiyajam icuisticaj.

⁸Jesic tum jama ictsý iturno jém Zacarías ipiḡiñtam iga yoxayajpa jém miḡpic mastiḡjom. Cupiḡta jém Zacarías iga iwatpa jém paḡij iyoxacuy jém Dios iwiñjom.

⁹Metsta por sorteo juuts jém paḡij icostumbre iga iñooba jém poma jém tanḡatuj Dios imastiḡjom jém miḡpic. ¹⁰Iganam síp iño jém poma, iṡumpiḡ jém piḡiñtam jém íṡyajwiip jém mastiḡ aḡnaḡa inḡwejpátyajpa Dios. ¹¹Jesic Dios icutsat tum siḡyucmiḡic piḡiñ iga iwiñquejáy jém Zacarías. Iix iga jemum teñ jém siḡyucmiḡic piḡiñ jém altar aḡwiṡi. Juṡ iñooba jém poma. ¹²Agui ichiḡaḡjéc jém Zacarías cuando iix. Tsam piḡi cḡḡ. ¹³Jesic jém siḡyucmiḡic piḡiñ iñímáy: —MiZacarías, odoy cḡḡi.

Siip mannímáypa iga Dios mimatónḡayñeum cuando inḡwágay Dios iga mimañiḡiyámiñ. Jeeyucmi maḡiḡiyapa jém iñyomo Elisabet. Icnaypa tum jaychixi, accámaayi iñiyi iga Xiwan. ¹⁴Mich agui mimaymáypa iga naypa jém immaḡic. Tsam inḡwianḡamta. Jáyan

pixiñtam maymáayajpařim iga naypa yíp tsixi. ¹⁵Wixřap jém immanic tanJatuř Dios iwiñjom. Ďa iucpa vino ni ojo. Chiřap jém Dios iAnama cuando íf iapa ipuujom.

¹⁶Jém immanic icucagáyaypa ijixiyaj jáyař jém Israelpic pixiñtam iga eybic ijisyajpa Dios.

¹⁷Dios icutsatpa jém immanic iga icjodónaiñ jém pixiñtam iga miñpa jém tánOmí. Jextim ijixi y jextim ipimi jém immanic juuts jém wiñcpic ařmařciwiñ jém Elías. Jém immanic injiyjacpa jém ářayajpáppic iga odoy ářayajiñ jém jatuppic con imaníc. Inquejáypa jém ďapic icupicpa Dios iga icupicyajiñ. Inquejáypa jém pixiñtam iga ipictsonyajiñ jém tánOmí cuando miñpa.

¹⁸Jesic jém Zacarías icwác jém siřyucmipic pixiñ. Inímáy:

—¿Jutsap ařcutiřy y iga numa yiřpic annímáy? Ich tsam awidayam, tsamim mex jém anyomo.

¹⁹Jesic jém siřyucmipic pixiñ inímáy jém Zacarías:

—Ich aGabriel. Ařcuyoxap Dios. Acutsat yim iga manarjadáypa yíp wibic ařmařti. ²⁰Pero iga Ďa inçupic ři mannímáy, siř michajcaap, miumaap. Ďa wiař inřiy hasta que naypa jém immanic. Inñascaaba así porque Ďa inçupic ři mannímáy. Cuando núcpa jém jama tienes que cupacpa juuts mannímayne.

²¹Jesic jém pixiñtam jém ityajwiř jém mastic ařnaça inřjocyajpa jém Zacarías. Ďa icutiřyiyaj řiiga tsam jáyñeum jém miřpic masticjom. ²²Jesic cuando

putum jém Zacarías Ďa wiař ijyáy jém pixiñtam. Jesic icutiřyiyaj iga iix tum poñ masticjom. Iwatpa seña icimi, pero Ďa wiař ijy, umaane.

²³Ocmi cuando cupacneum jém tiempo iga iwat jém iyoxacuy masticjom, řet jém Zacarías ířicciim. ²⁴Ocmi manigýum jém iyomo Elisabet. Jesic tsy jém yomo ířicciim cinco meses juuts icostumbre. Pero agui maymay jém yomo. Niřpa: ²⁵“Tsam awiwadáy jém tanJatuř Dios porque ijodoy iga Ďa awixyajpa jém pixiñtam iga Ďa amanigýpa.”

Acjodónatap iga naypa jém Jesús

²⁶Cuando núcum seis meses iga maniccomcane jém Elisabet, jesic Dios icutsat tum siřyucmipic pixiñ, jém Gabriel, hasta tum Galileapic atebet inřyi Nazaret. ²⁷Cutsatta jém siřyucmipic pixiñ iga ininigáyin ařmařti tum woři inřyi Malía. Jém woři Ďa queman ijyřpát pixiñ. Iniřtum tum trato iga napicyajřap con tum pixiñ inřyi Josė, jém rey David iocmanic manic. ²⁸Jesic cuando núc jém siřyucmipic pixiñ jém Malía ířicciim, inímáy:

—iXutsóy, miwixřappic jém tanJatuř Dios! Tsam miwřwadáypa más que itumpiy jém yomtam.

²⁹Jesic řineanřac jém Malía cuando imator ři inímáy. Iřřpa ijixianřjom iga: “¿řiiga jempic adioschi?” ³⁰Jesic jém siřyucmipic pixiñ inímáy:

—Malía, odoy cři. Dios tsam miwřřpa. ³¹Ďa jáypa mimanigýpa. Iniřřpa tum jaychři. Accámayi inřyi iga JESÚS. ³²Tsam iniřřpa

ipimi. Accámaytap inñiyi iga jém Yucmipic Dios iManic. Jém tanJatuj Dios iccámpa juuts Rey jex juuts jém wiñicpic ijatujwewe jém David. ³³Accámata iga Rey iga itumpiy tiempo injaguin jém nación de Israel. Da nunca cuyajpa ipimi iga anjagooyi.

³⁴Jesic jém Malía icwác jém sinyucmipic pixiñ. Inñimáy: —¿Jutsap ammanigý? Danam ajaayí. Da queman ajypát pixiñ.

³⁵Jesic jém sinyucmipic pixiñ inñimáy jém Malía:

—Jém Dios iAnama miñpa ití con mimich. Impictsonpa jém Dios ipimi. Jeeyucmi da táncay jém immanic jém inicnappápic y accámaytap inñiyi iga Dios iManic.

³⁶Siip manigýpatim mex jém inñichitsi jém Elisabet jém dapic idic manigýpa. Tsamim jém yomo, pero núneum seis meses iga manicomcane. ³⁷Porque Dios wiap iwat itumpiy cosa.

³⁸Jesic nimpa jém Malía:

—Siip ich atsýpa juuts jém tanJatuj Dios imiichi. Siip jempigam iwadiñ juuts mich annimayñe.

Cuando yaj inmat jém Malía, jesic nic jém sinyucmipic pixiñ.

Nicpa joyi Malía jém Elisabet iticciim

³⁹Jesic jeetim tiempo jém Malía anjeega nicpa tum attebet jém naxyucmi de Judea jém cotsic anñaca. ⁴⁰Tigiy jém Zacarías iticjom. Idioschiiba jém ichitsi Elisabet. ⁴¹Cuando imaton jém Elisabet iga idioschi jém Malía, jesic tsigópa jém tsixi jém Elisabet

ipuujom. Jém yomo ipictson jém Dios iAnama. ⁴²Jesic pimi jiy jém yomo. Inñimáy jém ijáyuc:

—Mich más miwíwadáypa Dios que itumpiy jém yomtám. Dios tsam pimi iwíwadáypatim jém immanic jém inicnappápic. ⁴³¿Ich aiaapaap iga miñpa ajóyáy jém tánQmi iapa? ⁴⁴Cuando mich andioschi, jeeti rato tsigópa jém ammanic ampuujom, agui maymay iga mimiñne. ⁴⁵Agui miwíwadáyne Dios porque inycupicne iga je wiap iccupac ti miñimayñe.

⁴⁶Jesic nimpa jém Malía:

Ich ancujíppa jém tanJatuj Dios.

⁴⁷Tsam amaymay ananamajom cuando anjisa Dios jém taciacputpápic.

⁴⁸Ich da ajutsan, pero Dios acupin iga ancuyoxap, jesic dende siip para siempre jém pixiñtam jém ityajwiip icuwiti yip mundo ninyajpa iga Dios tsam awíwadáyne.

⁴⁹Porque awíwadáyne jém Tsampic iniit ipimi.

Agui wi cuáyne jém inñiyi.

⁵⁰Siempre iyaachanjampa itumpiy jém pixiñtam jém siippic it con jém miñpápic ocmi, jém icinyajpápic Dios.

⁵¹Tsam iniit ipimi.

Wiap imiswadáy jém pixiñtam ijixi jém nacujítpápic.

⁵²Iccáypa jém mjtampic anjagooyi jém tsampic iniit ipimi. Iccámpa tungac jém dapic nacujítpa.

⁵³Jém tsampic yuap icwícpa hasta cuspa.

Pero jém ricoyaj jém ijispápic iga da ti itogóyáy, da ti ichiiba Dios.

⁵⁴ Iyoxpátpa jém imozo Israel.
Da ijaamañnotpa iga
iyaachanjampa jém ipixiñtam
jém icuyoxayapáppic,

⁵⁵ juuts ijyicámáy jém
tanjatunwewe ijatun
jém Abraham iga
iyaachanjamyajpa jém
imanictam para siempre.

⁵⁶ Jesic yaj inmat jém Malía.
Jemum tsý tres meses con jém
ichitsi Elisabet. Ocmi set iticmi jém
Malía.

**Naypa jém Xiwan jem
acchiñoypáppic**

⁵⁷ Jesic núc jém jama iga nay jém
Elisabet imaníc. Icnay tum jaychixi.

⁵⁸ Jesic cuando jém itiwitam con
jém ivecinoyaj imatorjay iga nay
jém imaníc, icujípyajpa Dios con
jém yomo iga tsam iyaachanjampa.
Aguí maymáayajpa con jém
Elisabet. ⁵⁹ Cuando núc ocho
día nayñe jém tsixi, wadayta
jém marca de circuncisión
juuts jém Israelpic icostumbre.
Iccámayajtooba idíc inñiyi iga
Zacarías juuts ijatun. ⁶⁰ Pero nimpa
iapa:

—Da tanaccámáypa inñiyi iga
Zacarías. Tanaccámáypa inñiyi iga
Xiwan.

⁶¹ Jesic nimyajpa jém pixiñtam:
—¿Tíiga iniccámáypa inñiyi iga
Xiwan porque ni tum jém inñiwitam
dá iniñ jexpic inñiyi?

⁶² Jesic jém ityajwiip jem
icwácyajpa jém tsixi ijatun con
seña. Acwácta jém Zacarías
jup nñiyi iccámáypa jém imaníc.

⁶³ Jesic jém Zacarías iwác tum
jaca toto. Ijaycámáy jém imaníc

inñiyi totyucmi. Nimpa: “Inñiyi
Xiwan.” Jesic itumpiy jém pixiñtam
agui ipooñanjamyajpa. ⁶⁴ Jeefi
rato wiawum ijy jém Zacarías.
Mojum icujíp Dios. ⁶⁵ Jesic mu
iixyay jém ityajwiip jem, pimi
cñnyaj. Acjodónayajtap tí inasca
jém Zacarías itumpiy jém ityajwiip
jém naxyucmi de Judea jém
cotsiganjom. ⁶⁶ Itumpiy jém
pixiñtam jém imatorneyajwiip,
tsam ijisyajpa tí inasca jém
Zacarías. Nacwácyajtap entre jeeyaj.
Nanímayyajtap:

—¿Tí iwatpa yáp tsixi, jesic mijap?
Porque tsam wiñquejpa iga iniñ
jém Dios ipimi.

Jém añañti chiiñeta jém Zacarías

⁶⁷ Jém tsixi ijatun, jém Zacarías,
ipictson jém Dios iAnama. Moj
inmat jém añañti jém ichiñewiip
Dios. Nimpa jém Zacarías:

⁶⁸ Wi iga tanjatuñ Dios, jém Israel iQmi,
porque miñ tacutsigayta
taichtam.

⁶⁹ Tacutsadayta tum wiapaap
taciacputta, jém wiñcipc
itúmmi jém David jém
icuyoxapáppic tanjatun Dios.

⁷⁰ Siip tawadayta juuts
tajyicámayñe tsam wiñgam
cuando inmatyay jém wibic
profeta.

⁷¹ Nimpa iga taciacputtámpa
jém tánenemigoyaj iciñjom,
itumpiy jém tajóyixyapáppic.

⁷² Tsam tayaachanjampa juuts
iwadayñeyaj jém wiñcipc
tantúmmitam.

Jempam ijispa jém wibic trato
jém iwatnewiip wiñgam,

- ⁷³ cuando ijycámáy jém Abraham, jém wiñicpic tanjatuj,
- ⁷⁴ iga taciaputtámpa jém tánenemigoyaj iciijom iga tançuyoxatámpa Dios y dá tí tançijpa,
- ⁷⁵ iga tanwíwattámpa tanJatuj Dios iwiñjom y tantsactámpa iga tammalwattámpa itumpiy jama iga taiípa vivo.
- ⁷⁶ Jesic jém Zacarías moj inmadáy jém xuú tsixi. Inímáy: Mich mammanic, michípa juuts jém yucmipic Dios iprofeta. Cuando miñpa jém tánQmi, miñjagoyñeeba inñic iga inwitsagáypa jém ituj.
- ⁷⁷ Inicjodónjayajpa jém Dios ipixiñtam iga siip Dios iwadaytooba perdón jém itañca iga iciacputyajpa.
- ⁷⁸ Porque wibic tóyooyi iniit jém tanJatuj Dios, tsam tayaachanjampa. Jém jixi miñpa juuts químpa jém jama
- ⁷⁹ siñyucmi iga iyicquejpa jém ityajwiip piichciim, jém caanewiip icumuñcom. Miñpa tanquejay jém tun jém nicpáppic juí tawixpa Dios.
- ⁸⁰ Jesic yaj inmat jém Zacarías. Ocmi mijap jém imanic. Tsam iniit Dios iAnama, iwicutiñyíy tí ixunpa Dios. Jáy íti jém titsinaxyucmi juí dá tí idíyíy hasta núc jém jama iga Xiwan anquejaytap jém Israelpic pixiñtam.

Naypa Jesús

(Mt. 1:18-25)

2 Jeefim tiempo jém Romapic anjagooyi jém César Augusto

icutsat tum orde iga wattaiñ censo itumpiy jém naxyucmiyaj jém injacpáppic jém Romapic anjagooyi. ²Wattá jém wiñtipic censo cuando jém gobernador Cirenio injacpa jém naxyucmi de Siria. ³Jesic cada pixiñ nicpa nacámyajtaji juí tsucum jém wiñicpic itúmmiyaj. ⁴Jeeyucmi set Belén jém José. Porque nicne íti tum attebet iníyi Nazaret jém naxyucmi de Galilea. Pero iticmi jém Belén jém naxyucmi de Judea. Porque jemum it idic jém ijatujwewe ijatuj jém wiñicpic anjagooyi jém David. ⁵Jesic nic nacámyajtaji jém José con Malía jém iwatnewiip trato iga ancoomyajpa. Danam napicneyajta con jém José, pero jém woñi manicomcaneum. ⁶Iganam ityaj jém Belén, núc jém tiempo iga naypa jém tsixi. ⁷Jesic icnay Malía jém icoponmanic, tum jaychixi. Inmon con puctucu, icmonpa tum cawajtijom. Como tsam itñim, dá i icnucs tic.

Jém iwatyajpáppic cuenta jém borregoyaj iixyaj jém siñyucmipic pixiñtam

⁸Da más juumi de jém Belén ityaj idic jém iwatyajpáppic cuenta jém borrego. Inmonyajpa jém iborregoyaj copjom iga iwatpa cuenta. ⁹Jesic jemum iwiñquejay tum siñyucmipic pixiñ jém icutsatnewiip jém tanJatuj Dios. Icnooquejpa jém tanJatuj Dios ichoca juí ityaj jém iwatyajpáppic cuenta jém borrego. Jesic tsam pimi çijyaj jém pixiñtam. ¹⁰Pero jém siñyucmipic pixiñ inímáy: —iOdoy çijtaami! Ich miñ manañmadáy tum wibic añmatí.

Tsam maymáayajpa ífumpiy jém pixinfam cuando imatonyajpa.

¹¹Mannímáypa iga yípti jama nay jém Ciapudoypáppic. Je jém tánOmi CRISTO. Nay jém tsixi jém David iatbetet jém Belén. ¹²Siip juuts tum seña manañmadáypa juí impáttampa jém tsixi; añmonnetá con puctucu, wone tum cawajticjom.

¹³Iganam inmatpa jém siñyucmipic pixin, jeeti rato miñay tsam jáyan jém siñyucmipic pixinfam. Wanyajpa, icujípyajpa Dios. Nimyajpa:

¹⁴Siip tançujíptampa jém tanJatuñ Dios jém más yucmipic í.

Siip iwinanigáypa jém pixinfam jém Diospic iwiñyajpa.

¹⁵Jesic cuando nicgacum siñyucmi jém siñyucmipic pixinfam, nanímayyajta jém iwatyajpáppic cuenta jém borregoyaj:

—Siip taniçpa jém Belén.

Nicpa tánám tí naspá jem juuts tacjodónata jém tanJatuñ Dios.

¹⁶Jesic añjeega nicyaj. Cuando núcyaj, ipátyaj jém Malía con jém José, ipátyajtim jém tsixi wone jém cawajticjom. ¹⁷Cuando iixyay jém tsixi, jesic moj inmadayyaj jém ityajwiip jem tí inímáy jém siñyucmipic pixin de jém tsixi.

¹⁸Ífumpiy jém pixinfam ipooñanjamyajpa cuando imatonyaj tí inmatyajpa jém iwatyajpáppic cuenta jém borregoyaj. ¹⁹Pero jém Malía dá ijaamañnotpa tí inímayyaj jém pixinfam. Tsam ijispa íanamajom. ²⁰Ocmi setgacum jém iwatyajpáppic cuenta jém borregoyaj. Agui maymayyaj. Inwejpátyajpa Dios, icujípyajpa iga

wiap imatonyaj y iixyay ífumpiy cosa juuts inímáy jém siñyucmipic pixin.

Acwiñquejta jém tsixi Jesús jém mijpic masticjom

²¹Jesic núc ocho día iga nayñe jém tsixi. Jém José y Malía iwadáy jém marca de circuncisión juuts jém Israelpic pixinfam icostumbre. Accámayta inñiyi iga JESÚS juuts iccámáy jém siñyucmipic pixin cuando danam manigý jém Malía. ²²Ocmi cuando capsum jém jama iga accuáyta jém yomo, juuts nimpa jém Moisés inçuímayooyi, jesic ininicyajpa Jerusalén jém xutu tsixi iga icwiñquejpa Dios iwiñjom. ²³Iwatyajpa jempic porque jayñetawum jém tanJatuñ Dios inçuímayooyi iga: “Chii tanJatuñ Dios jém inçoponmanic, jém jaypic, iga tsíyñ juuts jém tanJatuñ Dios imiichi.” ²⁴Jesic ininicyajtim tum sacrificio iga ichiiba Dios juuts jayñetawum jém Dios inçuímayooyi. Nimpa jém añçuímayooyi: “Chii tanJatuñ Dios wisten cuucu o wisten mañpichona.”

²⁵Jesic jeetim tiempo í idic Jerusalén tum pixin inñiyi Ximoj. Tum wibic pixin. Tsam ijispa Dios. Tsam inçjocpa jém jama iga Dios iciacputpa jém nación de Israel. Jém Ximoj tsam inii jém Dios iAnama. ²⁶Jém Dios iAnama icjodóna jém Ximoj iga antes que caaba jém wiðaya, iixpanam jém Cristo jém icutsatpáppic Dios. ²⁷Jém Dios iAnama ichi jixi jém Ximoj iga tigíyñ jém mijpic masticjom. Jesic jeeti rato núc jém José y Malía. Inimiñ masticjom jém

xufu tsixi iga iwadáyiñ juuts nimpá jém wiñicpic añquímayooyi. ²⁸ Jesic jém Ximój iñuuspac jém tsixi, moj icujíp Dios. Nimpá jém Ximój:

²⁹ ManJatuj Dios, siip cupacneum juuts anjiycámayñe wiñic.

Đa añwadap caso siiga siip acaabam.

³⁰ Siip ich ánixcuymi ánixñe jém Ciacpudoypáppic.

³¹ Siip moj iñwat itumpiy jém pixiñtam iwiñjom icuwiti yíp naxyucmi.

³² Tsíy juuts tum jucti iga iyicquejpa jém tungac pixiñtam jém đapic je de Israel.

Chiitáptim jém wibic juctianjtsoca jém Israelpic pixiñtam jém michpic immiichi, manJatuj Dios.

³³ Jesic jém iapa con jém José agui ipooñanjamyajpa iga iñímáy jempic jém Ximój.

³⁴ Jesic jém Ximój ichi ibendición. Iñímáytim jém Malía:

—Dios tacutsadáy yíp tsixi. Tsam witiyajpa jém icupicyajpáppic. Pero jém đapic icupicyajpa tsam yaachwattap. Dios icutsat yíp tsixi juuts tum señal iga icjodónap jém Israelpic pixiñtam iga Dios taciacputtooba. Pero wati jém tantiwitam đa icupicyajpa. Tsam imalmalnimayyajpa. ³⁵ Jesic quejpa jém malopic jixi jém añnécnewiip jém pixiñtam ijixianjom. Mich, miMalía, tum mijpic anyaaqui iñjampa juuts tum espada icutsejnaspá jém iñanama.

³⁶ Jesic itim jem tum chomo. Dios inmaćiwiñ jém yomo. Iniyi Ana. Jém ijatuj iniyi Fanuel. Jém

wiñicpic itummiyaj jém tribu de Aser. Tsam chomom. Jém yomo it idic con iwidaya siete amtiy dende añcoomyñe. Ocmi ca jém iwidaya. ³⁷ Pecam cunoyane, núcneum ochenta y cuatro amtiy. Siip đa putpa de jém mijpic masticjom. Iwatpa ayuno y oración. Icuyojap Dios tsuucim y siññi. ³⁸ Jeeti rato núc jém chomo juí it jém tsixi. Moj icujíp Dios iga wiá miix jém tsixi. Ocmi inmadayyaj itumpiy jém pixiñtam iga nay jém tsixi jém Ciacpudoypaap. Porque jáyan jém pixiñtam injocyajpa iga ciacputtap jém attebet Jerusalén.

Setgacpa Nazaret jém José y Malía

³⁹ Cuando jém Malía y jém José yajum iwatyaj juuts nimpá jém Dios inquímayooyi, jesic setyaj iticmi jém attebet Nazaret jém naxyucmi de Galilea. ⁴⁰ Jesic mijap jém tsixi. Tsam iniit ipimi, wiap iwat jém iyoxacuy. Tsam jixiíy. Iniiťtim Dios itóyooyi.

Jém jaychixi it con jém maestroyaj jém mijpic masticjom

⁴¹ Cada amtiy nicyajpa jém Malía y José Jerusalén. Nicpa iwatyaj jém pascuasij. ⁴² Jesic cuando iniit doce iamtiy jém Jesús, nicpa siñajiyaj Jerusalén juuts icostumbreyaj.

⁴³ Cuando cuyajum jém siñ, setyajpam iticmi. Jém jaychixi Jesús tsíy Jerusalén. Jém iapa con jém José đa ijodon iga jemigam tsíy jém imanic. ⁴⁴ Jeeyaj injampa iga iwaganamiñpa jém iamigoyaj. Jesic moj seti. Witñeyajum tum jama. Jesic moj imétsyaj jém jaychixi juí it jém itiwitam con jém iamigoyaj.

⁴⁵ Pero dá ipát, jesic eybic set Jerusalén iga icuámyajpa.

⁴⁶ Cuando nasum tucunajama, jesigam ipát jém Jesús jém mijpic masticjom. Jemum wagacoñyaj con jém maestroyaj de jém Israelpic anquímayooyi. Jém jaychixi imatonpa jém maestroyaj, icwácpatim jeeyaj. ⁴⁷ Itumpiy jém imatonneyajwiip agui ipooñanjamyajpa iga tsam jixiíy jém jaychixi iga tsam wiap icutson jém maestroyaj, acwágópatim mex je. ⁴⁸ Jesic jém José con jém Malía tñeñjac cuando iixyaj tí iwatpa jém jaychixi. Jém iapa inñmá y jém Jesús:

—¿Mammanic, tíiga aḡwadayá jempic? Jém inñjatuḡ con aich agui manjjsa porque dá mi. Tsam síp maḡcuámta.

⁴⁹ Jesic Jesús inñmá y iapa: —¿Tíiga aḡcuámta? ¿Que dá inñjodoḡ iga tienes que aḡwatpa juuts ixunpa anJatuḡ Dios?

⁵⁰ Pero jém Malía con jém José dá icutiíyiyaj tí inñmá y jém Jesús.

⁵¹ Jesic setum iticmi Nazaret jém Jesús con jeeyaj. Seguido iwatpa juuts ipiimiyajpa. Jém iapa tsam ijjsa ianamanjjom títam iwatpa jém Jesús. ⁵² Ocmi mijap jém Jesús, más jixiíy. Dios tsam iwixpa. Iwixyajpatim itumpiy jém pixiñtam.

Najyóypa titsinaxyucmi jém Xiwan jém acchiyoypáppic

(Mt. 3:1-12; Mr. 1:1-8; Jn. 1:19-28)

3 Jesic capsum quince amíy iga injacpa jém Romapic anjagooyi jém Tiberio César. Jesic jém Poncio Pilato injacpa

jém naxyucmi de Judea como gobernador. Jém Herodes injacpa jém naxyucmi de Galilea. Jém Herodes itíwi jém Felipe injacpa jém Iturea y jém Traconite. Jém anjagooyi jém Lisánias injacpa jém naxyucmi Abilinia. ² Ití idic wisten jém cobacpic panij anjagooyi jém más mijpic. Tum jém Anás y tum jém Caifás.

Jesic jeetim tiempo ití idic jém titsinaxyucmi jém Xiwan, jém Zacarías imaníc. Jemum chiifa jém Xiwan tanJatuḡ Dios inmadayooyi. ³ Jesic nicpa najyóoyi icuwiti jém naxyucmi nocojom jém ni inñyi Jordán. Inñmá y jém pixiñtam:

—Tsaci iga immalwatpa. Miñi manacchiḡtámpa, jesic Dios miccáyaypa jém inñañca.

⁴ Iwatpa jém Xiwan juuts ijaychacne librojom jém Isaías jém wiñicpic profeta. Nimpa:

Tammatonpa tum najyoypáppic jém titsinaxyucmi: “Áñayaayi jém tánQomi ituḡ, numtsagaytaami.”

⁵ Aḡcujnúctaami jém pacusyaj, tajquettaami jém cotsic y jém lumu iga nóḡaiñ. Numtsactaami jém tuḡ jém wotnewiip, aḡcujaamítim jém tuḡ icuaja.

⁶ Jesic cuando miñpa jém taCiacputpáppic, itumpiy jém pixiñtam iixyajpa jém icutsatnewiip Dios.

⁷ Jesic tsam jáyan pixiñtam nic íamyaj jém Xiwan iga acchiñyajtaiñ. Pero jém Xiwan inñmá y:

—¿Michañtam, i micjodóḡa iga impóyaytamiñ jém tsam mijpic castigo jém icmiñpáppic jém

tanJatun Dios? ⁸Siiga numa inchacneum jem immalajixi, jesic wati juuts ixunpa Dios. Jesic quejpa iga cacneum injixi. Odoy nimtaami iga: "Ich da amalo porque jem Abraham tsy juuts ich anjatunwewe ijatun." Odoy nimtaami jempic porque Dios wiap icset yip tsa juuts jem Abraham imanictam. ⁹Siip Dios ifinquittooba jem cuyyay jem dapic tamap. Ifinquitmpa jem cuy, ocmi inooquetpa.

¹⁰Jesic jem pixiñtam icwacyajpa jem Xiwan. Nimyaja:

—¿Ti wiap anwatta iga anwattampa juuts ixunpa Dios?

¹¹Jem Xiwan inñmáy jeeyaj:

—Siiga iniit wisten inyooti, jesic chij tum jem dapic woody. Siiga iniit inwiccu, jesic chij jem dapic inij iwiccu.

¹²Jesic jem ichécyajpáppic impuesto miñyajtím iga acchinyajtaiñ. Icwácpatím jem Xiwan, inñmáy:

—Maestro, ¿ti wiap anwatta?

¹³Jem Xiwan inñmáy:

—Tseeci jem impuesto juuts nimpa jem anquímayooyi. Odoy tseeci más jáyan.

¹⁴Miñyajtím algunos jem soldado iga icwacyajpa jem Xiwan. Nimyaj:

—¿Ti wiap anwatta aichtam?

Jem Xiwan inñmáy:

—Odoy tobaayi tum pixiñ imiichi pimimi. Odoy cumigooyi jem pixiñtam iga inñobáypa ifumiñ. Maymáyají con jem inchoñwiyooyi jutsaj miyojpa jem gobierno.

¹⁵Tsam wiñigam injócyajpa jem pixiñtam iga miñpa jem Cristo jem icutsatnewiip Dios. Jesic moj

ijisyaj ijixianjom, ¿tananjam iga yip Xiwan yíbam jem Cristo jem tacutsadayñewiip Dios? ¹⁶Pero jem Xiwan inñmáy jem pixiñtam:

—Ich manacchintampa con ni. Pero miñpa tungac, je más pimi wiap que aich, da wiap annasca. Da wiap ancuwiyáyay jem iciac. Jem miñpáppic micchintampa con Dios inAnama y con jucti. ¹⁷Icñipñpa jem pixiñtam juuts tum pixiñ icutippa jem trigo. Iccáypa jem trigo granerjom. Nooquettap jem trigo ipuchi juctjom jut da nunca pichpa.

¹⁸Jesic jem Xiwan tsam wi najyóypa.

Seguido inquitmpa jem pixiñtam iga ichacyajiñ jem malopic jixi iga ipictsonyajiñ jem wibic anmati. ¹⁹Jem Xiwan iwogáytím jem gobernador Herodes porque ipigáy jem ijáyuc jem Felipe iwichomo. Ininic iticciim. Inñiyi jem yomo Herodías. Wogayta jem Herodes porque tsam jáyan táñca iwat. ²⁰Jesic tungac más malopic cosa iwat. Ipiñmáy iga matstaiñ jem Xiwan, cottap cárcel.

Acchintá Jesús

(Mt. 3:13-17; Mr. 1:9-11)

²¹Cuando acchinyajta ifumpiy jem pixiñtam, acchintatím mex jem Jesús. Jeeti rato iganam inwejpátpa Dios, anáy jem sin. ²²Quet Dios inAnama sinyucmi. Jem pixiñtam iixyay iga quet juuts tum cuucu, nummiñ, núc hasta jem Jesúsuyucmi. Imatorñaj tum jiyi sinyucmi. Nimayta Jesús:

—Mich mamManic, mantoypáppic. Agui amaymay con mimich.

Jem Jesús jem wiñicpic ifúmmiyaj

(Mt. 1:1-17)

²³Jem Jesús iniit treinta iamtiy cuando moj iwat jem iyoxacuy.

Ijisyajpa idíc jém pixiñfam iga Jesús ijatuj jém José. Jém ijatujwewe jém Helí. ²⁴Jém Helí ijatuj jém Matat. Jém Matat ijatuj jém Leví. Jém Leví ijatuj jém Melqui. Jém Melqui ijatuj jém Jana. Jém Jana ijatuj jém José. ²⁵Jém José ijatuj jém Matatías. Jém Matatías ijatuj jém Amós. Jém Amós ijatuj jém Nahum. Jém Nahum ijatuj jém Esli. Jém Esli ijatuj jém Nagai. ²⁶Jém Nagai ijatuj jém Maat. Jém Maat ijatuj jém Matatías. Jém Matatías ijatuj jém Semei. Jém Semei ijatuj jém José. Jém José ijatuj jém Judá. ²⁷Jém Judá ijatuj jém Joana. Jém Joana ijatuj jém Resa. Jém Resa ijatuj jém Zorobabel. Jém Zorobabel ijatuj jém Salatiel. Jém Salatiel ijatuj jém Neri. ²⁸Jém Neri ijatuj jém Melqui. Jém Melqui ijatuj jém Adi. Jém Adi ijatuj jém Cosam. Jém Cosam ijatuj jém Elmodam. Jém Elmodam ijatuj jém Er. ²⁹Jém Er ijatuj jém Josué. Jém Josué ijatuj jém Eliezer. Jém Eliezer ijatuj jém Jorim. Jém Jorim ijatuj jém Matat. ³⁰Jém Matat ijatuj jém Leví. Jém Leví ijatuj jém Simeón. Jém Simeón ijatuj jém Judá. Jém Judá ijatuj jém José. Jém José ijatuj jém Jonán. Jém Jonán ijatuj jém Eliaquim. ³¹Jém Eliaquim ijatuj jém Melea. Jém Melea ijatuj jém Mainán. Jém Mainán ijatuj jém Matata. Jém Matata ijatuj jém Natán. ³²Jém Natán ijatuj jém David. Jém David ijatuj jém Isaí. Jém Isaí ijatuj jém Obed. Jém Obed ijatuj jém Booz. Jém Booz ijatuj jém Salmón. Jém Salmón ijatuj jém Naasón. ³³Jém

Naasón ijatuj jém Aminadab. Jém Aminadab ijatuj jém Aram. Jém Aram ijatuj jém Esrom. Jém Esrom ijatuj jém Fares. Jém Fares ijatuj jém Judá. ³⁴Jém Judá ijatuj jém Jacob. Jém Jacob ijatuj jém Isaac. Jém Isaac ijatuj jém Abraham. Jém Abraham ijatuj jém Taré. Jém Taré ijatuj jém Nacor. ³⁵Jém Nacor ijatuj jém Serug. Jém Serug ijatuj jém Ragau. Jém Ragau ijatuj jém Peleg. Jém Peleg ijatuj jém Heber. Jém Heber ijatuj jém Sala. ³⁶Jém Sala ijatuj jém Cainán. Jém Cainán ijatuj jém Arfaxad. Jém Arfaxad ijatuj jém Sem. Jém Sem ijatuj jém Noé. Jém Noé ijatuj jém Lamec. ³⁷Jém Lamec ijatuj jém Matusalén. Jém Matusalén ijatuj jém Enoc. Jém Enoc ijatuj jém Jared. Jém Jared ijatuj jém Mahalaleel. Jém Mahalaleel ijatuj jém Cainán. ³⁸Jém Cainán ijatuj jém Enós. Jém Enós ijatuj jém Set. Jém Set ijatuj jém Adán. Jém Adán ijatuj jém Dios.

Cutitsta jém Jesús

(Mt. 4:1-11; Mr. 1:12-13)

4 Jesic Jesús tsam iniit jém Dios iAnama iganam setpa de jém río Jordán. Dios iAnama ininic Jesús jém titsinaxyucmi. ²Jemum nic ití cuarenta jama. Jém Wocciwiñ miñ icutits iga icmalwatpa idíc. Cuarenta jama da wíc Jesús, jesic núc jém cuarenta jama, pimi yua. ³Jesic jém Wocciwiñ inímáy Jesús:
—Siiga numa Dios mimanic, acseti yíp tsa iga caxfánañi.
⁴Jesic jém Jesús inímáy jém Wocciwiñ:

—Nimpa jém Dios in̄maṭi, jém jayñetaṭawiiṭ: “Ḍa no más iga in̄cútpa caxṭánañi miitpa. Tamatspacpaṭim itumpiy jém Dios in̄maṭi.”

⁵Ocmi jém Wocciwiñ ininíc jém Jesús tum mijpic cotsicyucmi. Tumti rato in̄quejáy itumpiy jém naxyucmiyaj icuwiti de jém mundo juṭ in̄jacyajpa jém an̄jagooyiyaj.

⁶Jesic jém Wocciwiñ in̄ímáy jém Jesús:

—Itumpiy yípyaj naxyucmiyaj ich ammiichi. Siip manchiiba mich porque ich acijun̄codayñeta. I ansunpa iga anchiiba, wiap anchi. Jesic itumpiy jém pixiñtam micujípyajpa iga más mijpic min̄jagooyi. ⁷Siiga mich aṅcoteeñáypa y an̄jisa juuts ich adios, jesic immiichi itumpiy jém manañquejayñewiip.

⁸Pero Jesús in̄ímáy:

—Nicsim, miWocciwiñ.

Jayñetaṭawum jém Dios in̄maṭi: “Wi iga tan̄jisa tan̄Jatun̄ Dios, je icutum tan̄cuyoxap.”

⁹Ocmi jém Wocciwiñ ininíc jém Jesús Jerusalén. Iniquim jém mijpic mastic in̄cōbac. Jém Wocciwiñ in̄ímáy Jesús:

—Siiga Dios mimanic, yóyanqueti hasta naxyucmi. ¹⁰Porque jayñetaṭawum jém Dios in̄maṭi iga:

Dios icutsatpa jém sin̄yucmipic pixiñtam iga miwadiñ cuenta

¹¹iga mimatstson̄pa iciijom iga odoy coowaiñ impuy tsaayucmi.

¹²Pero Jesús in̄ímáy jém Wocciwiñ:

—Nimpaṭim jém Dios in̄maṭi: “Odoy cutiitsi jém tan̄Jatun̄ Dios siiga n̄uma wiap.”

¹³Jesic jém Wocciwiñ yaj icutits jém Jesús iga icmalwatpa idic. Ipoychac hasta tungac jama.

Mojpa iwat Jesús jém Dios iyoxacuy

(Mt. 4:12-17; Mr. 1:14-15)

¹⁴Jesic set eybic Galilea jém Jesús. Tsam iniiṭ jém Dios iAnama iga wiap iwat juuts ixunpa Dios. Wan̄pa icuwiti jém naxyucmi de Galilea iga setne jém Jesús.

¹⁵Jesic cada tigan̄joj jém Jesús nicpa accuyujooyi jém sinagoga, jém judíos imastic. Jeeyaj tsam icujípyajpa.

Nicpa Jesús Nazaret

(Mt. 13:53-58; Mr. 6:1-6)

¹⁶Jesic tum jama núc Jesús jém atebet Nazaret juṭ mija. Jesic jém jejcuyjama, tigiy jém sinagoga juuts icostumbre. Teñchucum jém Jesús iga imaypa jém Dios in̄maṭi jém jayñewiip. ¹⁷Chiit̄a Jesús jém libro, jém ijaychacnewiip jém profeta Isaías, iga imaypa. Jesic Jesús in̄jáy jém libro, ipát juṭ jayñeta:

¹⁸Tsam anaiṭ jém Dios iAnama, achiññeta iga anañmadáyin̄ jém wibic aṅmaṭi jém yaachaneyajwiip.

Acutsatta iga anapocsáyin̄ ianama jém aṅyácneyajwiip. Acutsatta iga anañmadáyin̄ jém presoyaj iga cutsigayyajtap y jém cáchtiyaj iga acpisyajtap. Acutsatta iga anaccutsigáypa jém pixiñtam jém tsampic malwadayñeyajta.

¹⁹Acutsatta iga anañmatpa jém aṅmaṭi iga núcneum jém am̄tiy iga Dios iw̄wadáypa jém pixiñtam.

²⁰ Jesic Jesús ignúc jém libro, ichi jém maestro imozo. Jesic coñneactiŋ jém Jesús. Itũmpiy jém ityajwiip jém sinagoga agui iámyajpa. ²¹ Jesic Jesús moj iŋmadáy jém pixiñtam. Nĩmpa: —Yĩbam jama iñixtámpa iga cupacneum yíp aŋmafi jém jayñewiip.

²² Jesic itũmpiy jém pixiñtam agui iwianjamyaj jém Jesús. Agui ipooñanjamyaj cuando imatoŋyaj jém wibic aŋmafi jém iŋmatnewiip Jesús. Jesic moj nanĩmayyajtaji: —¿Que da yĩbam jém José imanic?

²³ Jesic Jesús iñímáy jém pixiñtam:

—Ich anjodoŋ iga mimichítam síp annímáypa tũm refran: “¿Michóyiyoypáppic tiiga dá minitsóyiytáp iñyaac?” Annímáytámpatim iga: “Wati yim iñticmi jém wĩtampic cosa juutsim iŋwatne jém Capernaum.”

²⁴ Iñímáytim jeeyaj: —Wĩpictsoŋtap tũm profeta tungac attebet, pero cuando nicpa najýyooyi ífĩcmi, jesic jém itĩwitam dá iwĩpictsoŋyajpa. ²⁵ Numa, mannímáypa iga wiñigam íf idic jém naxyucmi de Israel tsam jáyaŋ jém yomtam jém cunoytam cuando najýyóypa jém Dios iŋmatciwiñ jém Elías. Jeetim tiempo cuando dá chiyóy tuj tres año y seis meses. Jesic tigiy tũm mijpic yuu itũmpiy jém attebetay icuwití jém naxyucmi. ²⁶ Pero Dios dá icutsat jém Elías iga iyoxpádiñ jém Israelpic yomtam jém cunoytam. Dios icutsat jém Elías iga iyoxpádiñ jém tungac cunoya jém dápic je taich yomo. Jém yomo Sareptapic

yomo de jém naxyucmi de Sidón.

²⁷ Íftim idic jém naxyucmi de Israel tsam jáyaŋ pixiñtam jém cupúgayñewiip iñaca cuando iŋmatpa jém wiñicpic aŋmafciiwiñ jém Eliseo. Pero jém Eliseo dá icpis ni tũm de jeeyaj. Nada más icpis jém Naamán tũm Siriapic pixiñ, dá je taich pixiñ.

²⁸ Jesic tsam pĩmi jóyyaj itũmpiy jém ityajwiip jém sinagoga cuando imatoŋyaj tí nĩmpa jém Jesús. ²⁹ Tsucumyay jém pixiñtam, iquebacputyay jém Jesús aŋsicmi de jém attebet, nanicta tũm tejayucmi juť watneta jém attebet. Jemum icyágiyyajtooba idic jém Jesús. ³⁰ Pero widaŋnaspa Jesús jém pixiñtam aŋcucmi. Dá i wia miimats. Nic jém Jesús.

Tũm mal espíritu imats tũm pixiñ

(Mr. 1:21-28)

³¹ Jesic nic Jesús jém attebet Capernaum, jém naxyucmi de Galilea. Jemum cada jeucuyjama nicpa iŋquejáy jém Dios iŋmafi jém pixiñtam. ³² Tsam ipooñanjamyajpa cuando imatoŋyajpa tí iŋquejáypa jém Jesús. Porque aŋmatpa juuts tũm anjagooyi.

³³ Jesic jém sinagoga íf tũm pixiñ imatsne tũm mal espíritu. Pĩmi aŋwejpa, nĩmaytá Jesús:

³⁴ —Atsaci, mi Jesús mi Nazaretpic, ¿tiiga ammoogýpa? ¿Que miñpa anactogoyta? Mánixpĩpa, anjodoŋ iga mich jém Yucmĩpic Dios miMiichi.

³⁵ Jesic Jesús iwogáy jém mal espíritu. Iñímáy:

—Odoy jiyi. Puti yíp pixiñ ianamanjõm.

Jesic jém mal espíritu iccutiņ jém pìxiñ naxyucmi jeeyaj iwiñjom. Put jém mal espíritu, da ti iwadáy.

³⁶Ítumpiy jém ifyajwiip agui anjécayaj. Nanímawayjtap entre jeeyaj:

—ĉTiapaap yíp aņmadayooyi? Yíp pìxiñ iņmatpa juuts tum anjagooyi. Con ipimi wiap ifop jém mal espíritu.

³⁷Jesic waņpa juť quej icuwífi jém naxyucmi ti iwat jém Jesús.

Jesús icpis jém Peto imiidapa

(Mt. 8:14-15; Mr. 1:29-31)

³⁸Jesic put Jesús jém sinagoga. Nic jém Peto iticciim. Mimne actiņ jém Peto imiidapa. Tsam pimi jawaņý. Iacuncsayyaj jém Jesús iga icpìxiñ jém yomo. ³⁹Jesic nocojom teñ jém Jesús juť wone jém yomo. Injijyac jém jawaņ. Jém yomo ichac jém jawaņ, jeeťi rato tsucum, moj icwíc jém miñneyajwiip.

Jesús icpis jáyaņ jém mimneyajwiip

(Mt. 8:16-17; Mr. 1:32-34)

⁴⁰Jesic cuando tigíyum jama, jém pìxiñtam inimíñayyaj Jesús ítumpiy jém mimneyajwiip. Jesic Jesús ichicunúgáy icobac cada tumtum. Jempigam icpisayaj ítumpiy.

⁴¹Tobayyajtapťim jém mal espíritu waťi jém pìxiñtam ianamanjom. Agui aņwejpa cuando putyaj. Nímayťa jém Jesús:

—Mich jém Dios miManic.

Pero Jesús iwogáy jém mal espíritu. Da ijícpa iga jýpa porque jém mal espíritu ijodóņayaj iga je jém Cristo.

Najýóypa Jesús jém naxyucmi de Galilea

(Mr. 1:35-39)

⁴²Jesic cuquejtooba, put Jesús jém attebet. Nic tum lugar juť da

ti idífyíy. Pero jém pìxiñtam, jém ifyajwiip jém attebet, tsam imétsayaj, icunúcyaj. Iacuncsayyaj iga tsýiñ con jeeyaj.

⁴³Pero Jesús inímáy:

—Tienes que anaņmadáypa jém tungac attebetayaj jém wibic aņmaťi juťpic injacpa Dios jém ifyajwiip yíp naxyucmi. Jeeyucmi acutsat Dios.

⁴⁴Jesic Jesús nicpa najýooyi ítumpiy jém sinagoga icuwífi jém naxyucmi de Galilea.

Jém milagro cuando matsta jáyaņ jem tiipi

(Mt. 4:18-22; Mr. 1:16-20)

5 Jesic tum jama oy iņmat Jesús jém Dios iņmaťi tum laguna aņņaca. Jém laguna iníyi Genesaret. Tsam jáyaņ pìxiñtam y yomtam miñ imatonņayaj hasta nacpitsiyajtap.

²Jesic Jesús iix wisten barco playa aņņaca. Putneyaj iomi. Icheeyajpa jém ired niaņņaca. ³Jesic núc Jesús juť it jém barco, quím barcoyucmi. Imiichi jém Peto. Jesic Jesús inímáy iga icniġuiñ uxaj jojmi jém imbarco. Jesic coñ Jesús jém barcoyucmi.

Moj iņquejáy jém pìxiñtam jém Dios iņmaťi. ⁴Cuando yajum najýooyi, inímáy jém Peto:

—Nanići imbarco juť jojmi jém ni. Patscuumi jém inred niiciim. Tammatspa tiipi.

⁵Jém Peto inímáy:

—MamMaestro, muma tsuu ayoxata, da ammatsta ni tum tiipi. Pero siiga mich miñimpa, aņcotpa eybic jém anred.

⁶Jesic mu icotum jém ired, imatsyaj tsam jáyaņ tiipi hasta jactip jém ired. ⁷Jesic jém Peto

iwadáy seña jém ifiwiitam jém ifyajwiip jém tungac barcojom iga míniñ iyoxpát. Jesic miñyaj, icucomyaj icuistic jém barco hasta cumoñtooba. ⁸Mu iix, jém Peto icosteenáy jém Jesús ipuyciim, iñímáy:

—MánQmi, acupóyaayi porque tsam atañcaíy.

⁹Jém Peto con jém ifyajwiip ibarcojom agui ámanjacyaj iga imatsyaj tsam jáyan jém tiipi. ¹⁰Agui ámanjacyajtim jém ifyajwiip jém tungac barcojom, jém Jacobo con jém Xiwan, jém Zebedeo imanictam. Jeeyaj iwaganayoxayajpa jém Peto. Jesic Jesús iñímáy jém Peto:

—Odoy cñi, tsacim iga immatspa tiipi. Nicpa tamméts pìxiñ juuts tiipi iga icupicyajin jém Dios inmatì.

¹¹Jesic ininicyaj ibarco nianñaca. Ichacyaj itumpiy jém iniitwiip. Nic itúnjyyaj jém Jesús.

Jesús icpis tum pìxiñ jém cupúgayñewiip iñaca

(Mt. 8:1-4; Mr. 1:40-45)

¹²Cuando íf Jesús jém tungac attebet, ictsíy tum pìxiñ tsam cupúgayñe iñaca. Mu iix Jesús, jém pìxiñ icosteenáy ipuyciim. Iacuncsáypa iga icpìxiñ. Nímayta:

—MánQmi, siiga inwianjam, acpisi.

¹³Jesic Jesús ichicunuc jém pìxiñ, iñímáy:

—Anwianjam. Micuáyñeum.

Jesic jeefi rato ichacum jém pìxiñ ipuuca, wìtsíyum. ¹⁴Jesic Jesús iñímáy jém pìxiñ:

—Odoy i anmadaayi iga ich manacpis, pero nigi wiñquejaayi

jém panij iga inquejáyiñ iga numa mipisneum. Jesic ocmi chíi Dios tum ofrenda juuts nimpa jém Moisés inquímayooyi iga miixtáp iga numa mipisneum.

¹⁵Pero jutquej wanpa iga acpisóypa jém Jesús. Anuumayajpa tsam jáyan pìxiñtam iga imatonyajpa jém Jesús inmadayooyi. Miñyaj jém mimneyajwiip iga acpisyajtaiñ. ¹⁶Pero put Jesús jém attebet, nic icutum jut da ti idífyi iga inwejpátpa Dios.

Jesús icpis tum pìxiñ tusacane icumuma

(Mt. 9:1-8; Mr. 2:1-12)

¹⁷Jesic tum jama cuando accuyóypa Jesús, coñyajtim jem jém fariseoyaj con jém maestroyaj de jém wiñcpic anquímayooyi. Jeeyaj miñyaj de itumpiy jém tiganjojay de jém naxyucmi de Galilea y Judea. Miñyajtim de jém attebet Jerusalén. Jém Jesús tsam iniit jém Dios ipimi. Wiap icpis jém mimneyajwiip. ¹⁸Jesic núcyaj jutem jém pìxiñ, icópneyaj tseesyucmi tum pìxiñ tsam mimne. Tusacane icumuma, da tsigóypa. Tigiyooba idic jém ticjom iga iámpa jém Jesús. ¹⁹Pero da ipátyaj jut wiap itigiy porque tsam itñim. Jesic químyaj jém ticyucmi, ijetyaj jém tic iñecxi. Ijmquetyaj tseesyucmi jém mimnewiip jém Jesús iwiñjom jém pìxiñtam anucmi. ²⁰Jesic cuando iix Jesús iga tsam icupicyajpa jeeyaj, iñímáy jém mimnewiip:

—Mipìxiñ, miwadayñeta perdón jém iñañca.

²¹Jesic jém escribaspic maestroyaj con jém fariseoyaj

ijisyajpa ijixianjom iga: “¿Que iapaap yíp pìxiñ? Síp icujiy tanDios. Porque Dios icufum wiap taccáyáy tantánca.”

²²Pero Jesús ijodoñ tí síp ijisyaj ijixianjom, jesic inímáy jeeyaj:

—¿Tiiiga inñistámpa jempic?

²³¿Jup más dá tánca iga annímáypa yíp pìxiñ iga: “Miwadayñeta perdón jém inñánca”, o iga annímáypa:

“Tsucumi, wítim”? ²⁴Siip

manañquejáypa iga jém Miññewiip Sinyucmi numa iniit jém pimi iga wiap iccáyáy jém pìxiñtam itánca yíp naxyucmi.

Jesic Jesús inímáy jém pìxiñ jém tusacanewiip:

—Mannímáypa, tsucumim, piñim jém inñchees, nicsim inñicciim.

²⁵Jesic iganam íamyajpa jém ítyajwiip, jeeti rato tsucum jém pìxiñ. Ipiñum jém ichees juí wone idic. Nic íticmi. Tsam icujíppa Dios. ²⁶Ítumpiy jém pìxiñtam ipooñañjamyaj. Icujiipyajpatim Dios. Tsam cinyaj. Nanímayyajtap:

—Yíp jama tánixta tum cosa dápic queman oypa tánix.

Jesús inñewiip jém Leví

(Mt. 9:9-13; Mr. 2:13-17)

²⁷Cuando cuyaj jém asunto, moj niqúi jém Jesús. Iix tum pìxiñ jém ichécpáppic impuesto, inñiyi Leví. Coñ juí ichécpa jém impuesto. Jesús inímáy jém pìxiñ:

—Atúnjiyi.

²⁸Jesic tsucum jém pìxiñ, ichac jém iyoxacuy, nic itúnjy jém Jesús.

²⁹Jesic ocmi jém Leví inisínjap jém Jesús iticciim. Tum mijpic siñ iwat. Anñejayyajta tsam jáyan jém ichécyajpáppic impuesto

con tunjac más jém pìxiñtam.

Iwaganawícyajpa jém Jesús mesaciim. ³⁰Jesic jém fariseoyaj con jém maestroyaj de jém fariseo inñquímayooyi moj inñwejcayaj jém Jesús icuyujciwiñ. Nímayyajtap:

—¿Tiiiga miwagawíctámpa y miwaganíctámpa con jém ichécyajpáppic impuesto y con jém tunjac táncaiywiip?

³¹Jesic Jesús inímáy jém fariseoyaj:

—Jém dápic mimne dá ixunpa jém tsóyíoypaap. Pero jém mimneyajwiip ixunpa jém tsóyíoypaap. ³²Ich dá amiñ iga anañwejáypa jém dápic táncaiy. Amiñ iga anañwejáypa jém táncaiywiip iga ichacyajiñ jém itánca.

Acwácta Jesús tiiiga dá iwatyajpa ayuno jém icuyujciwiñ

(Mt. 9:14-17; Mr. 2:18-22)

³³Jesic jém miññeyajwiip icwácyaj jém Jesús. Nímayta:

—¿Tiiiga jém Xiwan icuyujciwiñ con jém fariseoyaj siempre iwatyajpa ayuno, iwatyajpa jém oración? Pero mich jém inñcuyujciwiñ siempre wícyajpa, nícyajpa, dá iwatyajpa ayuno.

³⁴Jesic Jesús inímáy jeeyaj:

—Siempre wícyajpa juí añcoomíyoyñimpa. Dá i iwatpa ayuno cuando it jém yoomiypaap. ³⁵Pero núcpa jama cuando dá i jém yoomiypaap. Jesic numa iwatyajpa ayuno.

³⁶Jesic Jesús inñmadayyaj jém pìxiñtam tum xuútu cuento. Inñquejáypa jém pìxiñtam iga jém jomipic jixi jém inimiññewiip Jesús

da iwīnanigáypa jém wiñicpic jixi.
Nimpa Jesús:

—Da i ijacpa tum jomyoofí
iga iñtótspa tum pecapic yooí.
Siiga iwatpa jempic, mişap jém
jomyoofí. Jém jomipic puctucu
đafim iwīnacutiñpa jém pecapic.
³⁷Da i icotpa jomvino jém pecapic
cuerobolsajom. Porque siiga iwatpa
jempic, jesic pīpa jém jomvino,
tojañsajpa jém pecapic cuerobolsa.
Tegáypa jém vino. Togoypa jém
cuerobolsa. ³⁸Jeeyucmi cottap jém
jomvino jém jomipic cuerobolsajom.
³⁹Numa, jém iucpáppic jém
pecapic vino da iuctooba jém
jomvino porque nimpa iga: “Wī jém
pecapic.”

Jesús icuyujciwiñ ífúcyaj trigo jém jejcuyjama

(Mt. 12:1-8; Mr. 2:23-28)

6 Tum jejcuyjama wiđañnaspa
Jesús juí ñipnetā jém trigo.
Jém icuyujciwiñ ijudayyajpa jém
trigo ipac, icútyajpa. ²Jesic algunos
jém fariseoyaj iwogayyaj jém Jesús
icuyujciwiñ. Nímayta:

—¿Tīiga iñwattámpa contra jém
tanañquímayooyi jém jejcuyjama?

³Jesic Jesús iñímáy jém
fariseoyaj:

—¿Que da queman immay tí
iwat jém David cuando tsam
yuayajpa con jém icompañeroyaj?
⁴Tigiy David jém Dios íñicjom. Ipīc
jém caxtánañi jém tsacnetawīip
altaryucmi. Icút jém David, ichiítim
jém icompañeroyaj. Tanjodoj iga
jém tanañquímayooyi nimpa iga
nada más jém panij wiap icút
jém caxtánañi jém tsacnetawīip
altaryucmi.

⁵Jesic ocmi jém Jesús iñímáy jém
fariseoyaj:

—Jém Miññewiip Siñyucmi
imiichiñim jém jejcuyjama, wiap
iñímáy jém pixiñtam tí wiap
iwatyaj jém jejcuyjama.

Pis jém pixiñ jém titsnewiip ici

(Mt. 12:9-14; Mr. 3:1-6)

⁶Jesic tunğagam jejcuyjama nic
Jesús jém sinagoga. Moj iñquejáy
jém pixiñtam. Ítīm jem tum pixiñ
mīmne. Titsne jém iñwīci. ⁷Jesic
jém escribaspic maestroyaj con
jém fariseoyaj icuixyajpa jém
Jesús siiga numa acpísóypa jém
jejcuyjama. Imétsyajpa juťpic
iquejajwadayyajpa jém Jesús. ⁸Pero
Jesús ijodoj tí sıp iñisyaj. Iñímáy
jém pixiñ jém titsnewiip ici:
—Teñchucumi, mīñi míteñi yíp
pixiñtam aņcucmi.

Jesic tsucum, nic teñi. ⁹Jesic
Jesús iñímáy jém pixiñtam jém
ítyajwiip jem:

—Siip manacwáctámpa: ¿Tí
wiap tanwat jém jejcuyjama?
¿Tanwīwatpa o tammalwatpa? ¿Wī
iga tanñiacpudáypa tum pixiñ ivida
o tanaccáyáypa?

¹⁰Jesic Jesús icuámset jém
pixiñtam icuwoyo, iñímáy jém
pixiñ jém titsnewiip ici:

—iTīm iñci!

Jempam iwat jém pixiñ, wītsíyum
ici. ¹¹Jesic tsam pimi jóyyaj jém
fariseoyaj. Moj nacwácyajtaji entre
jeeyaj tí wiap iwadayyaj jém Jesús.

Jesús icupiñ jém doce icuyujciwiñ

(Mt. 10:1-4; Mr. 3:13-19)

¹²Jesic tum jama nic Jesús tum
cotsicyucmi. Nic iñwejpát Dios

muma tsuu. ¹³Icuquejama inwejay jém icuyujciwiñ. Icupiñ doce de jeeyaj, iccám juuts “apóstolyaj”. Taich tanañmatími nimtooba jém cutsatnetawiip. ¹⁴Icupiñ jém Ximoj, Jesús icagáy inñiyi, icámáy iga Peto; jém Anti, je jém Ximoj ifíwi; jém Jacobo; jém Xiwan; jém Felipe; jém Bartolo; ¹⁵jém Mateo; jém Tomax; jém Jacobo, je jém Alfeo imanic; jém tujgac Ximoj, jém inñiyitim jém Zelote; ¹⁶jém Judas, je jém Jacobo ifíwi; y jém Judas Iscariote jém icijujcotwiip jém Jesús.

Accuyujóypa Jesús jém wítipic nonjom

(Mt. 4:23-25)

¹⁷Jesic quet Jesús jém cotsicyucmi con icuyujciwiñ. Nic accuyujooyi tum wítipic nonjom. Anjuumayaj tsam jáyañ jém pixiñtam. Miñyaj icuwiñti jém naxyucmi de Judea, jém Jerusalén y jém lamar añañca juí if jém atebet Tiro y Sidón. Miñneyaj jem iga imatoñyajpa jém Jesús inquímayooyi, iga acpisyajtañ jém mimneyajwiip. ¹⁸Pisyajtim jém tsampic iyaachwatayaj jém mal espíritu. ¹⁹Jém pixiñtam tsam icunúcyajpa Jesús iga ichicpa porque tsam putpa jém ipimi iga icpispá itumpiy.

Maymáyataami porque michíy juuts Dios mimanicam

(Mt. 5:1-12)

²⁰Jesic jém Jesús iámmats jém icuyujciwiñ. Inñimáy:
—Maymáyataami siiga siip tsam miyaachap porque mitigiyñeta con Dios, siip minjactámpa mimichtám.

²¹Maymáyataami siiga siip miyuatámpa porque ocmim custámpa miwiiquifam.

’Maymáyataami siiga siip miwejtámpa porque ocmi mixictámpa.

²²’Maymáyataami siiga siip mijóyixítamtap, miquebacputtamtap, mimalnímayfamtap y dá i miwixítámpa. Pimi mimalwadayfamtap porque mimichtám añcupictámpa aich jém aMiñnewiip Siñyucmi.

²³Maymáyataami cuando núcpa jém jama, miyóypa juuts tum tsixi, porque inñodoñ iga Dios michiiba jáyañ jém wítampic cosa siñyucmi. Jisi iga jém wiñicpic pixiñtam imalwadáytim jém wiñicpic Dios inmatciwiñ.

²⁴’Agui miuuguytim jém ricopic mipixiñtam porque siip mimaymáyatámpa, pero ocmi dá tí michiiba Dios.

²⁵’Agui miuuguytim siiga siip cuspa miwiiqui. Ocmi miyuatámpa. ’Agui miuuguytim siiga tsam mixictámpa siip porque ocmi miñyáctámpa, miwejtámpa.

²⁶’Agui miuuguytim siiga itumpiy jém pixiñtam micujíptámpa siip, porque jém wiñicpic pixiñtam icujípyajtim jém malopic añmatciwiñ jém migoyajpáppic.

Wi iga tantóyiñ jém tánenemigoyaj

(Mt. 5:38-48; 7:12)

²⁷Jesic Jesús inñimáytim jém pixiñtam:

—Pero siip mannímayfámpa mimichtám iga toyi jém inenemigoyaj. Wíwadaayi jém mijóyixyajpáppic. ²⁸Anwejpaati

Dios iga iwɨwadáyɨn jém mimalnɨmaypáppic y jém mimalwadaypáppic. ²⁹Siiga i micótsáypa tum ínɨcpac, jígaayi iga micótsáyɨnɨm tunɨgac lado, odoy cianseedaayi. Siiga i mifobáyáypa jém ínɨchamarra, jígaayi iga mifobáyáyɨnɨm mex jém ínɨoofí. ³⁰Siiga i miwágáypa tum cosa, chíi. Siiga i mifobáyáypa tum cosa jém immiichipic, odom wágaayi iga micseedáyɨn. ³¹Wɨwadaayi jém tunɨgac juutsɨm mich ínɨxunpa iga miwɨwadaytáɨn.

³²Siiga no más ínɨtoypa jém mifoypáppic, odoy jɨsi iga micujítap. Porque jém malopic pixiñtam ifoypatim jém iamigoyaj. ³³Siiga iɨwɨwadáypa no más jém miwɨwadaypáppic dá micujítap porque jém malopic pixiñtam iwɨwadáypatim jém iwɨwadaypáppic. ³⁴Siiga inicnucspa tumiñ no más jém pixiñ jém wiapaap micseedáy jém ínɨtumiñ, jesic dá micujítap. Porque jém malopic pixiñtam icnucspatim tumiñ jém iamigoyaj jém wiapaap icseedayyaj. ³⁵Pero mannɨmaytámpa: Toytáami jém mijóyixpáppic. Wɨwadaytaami jém mimalwadaypáppic. Siiga miñucsáypa tumiñ, chíɨm. Odoy wadaayi caso siiga dá wiap micseedáy jém ínɨtumiñ. Siiga iɨwatpa jempic, Dios miwɨyojpa. Quejpa iga Dios mimɨnictam. Porque Dios iyaachanjampatim jém malopic y jém tánɨcaiywiip. ³⁶Yaachanjamtami ifumpiy jém pixiñtam juutsɨm tanJatun Dios miyaachanjamtámpa mimichítam.

Odoy tanjixiñ tum tantɨwi iga tánɨcaiy

(Mt. 7:1-5)

³⁷Odoy jɨsi tum ínɨwi iga tánɨcaiy, jesic Dios dátim mijísáypa mich ínɨtánɨca. Siiga tum pixiñ mimalwadáypa, odoy tseeci, jesic Dios dá michégáypa mich ínɨtánɨca. ³⁸Siiga i miwágáy alguna cosa, siiga wɨ ínɨanama, chíi jém dápic iniɨ, jesic Dios jeetim quípsi mipígáypa iga micseedáypa mimich. ³⁹Jesic Jesús iɨmadáypa jém pixiñtam yɨp xutu cuento: —Tum cáchtipic pixiñ dá wiap iniwiñ tunɨgac cáchtí porque tsutyajpa icuisticyaj jém pacusjom. ⁴⁰Tum cuyujciwiñ dá wiap inasca jém imaestro, cuando yajum cuyuji dá ictsíypa jém imaestro. ⁴¹Tiiga ínɨmáypa jém ínɨwi iga tánɨcaiy siiga dá jutsaj jém itánɨca juuts tum xutu puchi iniñ iixcom. Pero mich tsam jáyaj tánɨca iniñ jex juuts tum mijpic cuy iniñ ínɨxcom. ⁴²Siiga dá inɨjampa jém cuy jém iniñtwiip ínɨxcom, tiiga inɨjɨspa iga wiap inɨobáy jém puchi jém ínɨwi iixcom. Minimigóyaytámpa inɨyaac. Wiñtí topi jém cuy jém michpic iniñ ínɨxcom, jesic ocmi wiap inɨobáy jém puchi jém ínɨwi iixcom.

Cuando tímámpa tum cuy, jesic tánixpicpa

(Mt. 7:17-20; 12:34-35)

⁴³Jém wibic cuy dá wiap iwat jém malopic ím. Jém malopic cuy dá wiap iwat jém wibic ím. ⁴⁴Cada cuy tánixpicpa con ím. Dá tantúcpa tum tsuj jém apífucuyucmi. Dá tantúcpa uvas jém chicxchayucmi. ⁴⁵Tum

wibic p̄ixiñ iwatpa wibic cosa porque iniif jém wibic j̄ixi ianamañjom. Jém malopic p̄ixiñ iwatpa jém cosa ðapic w̄itam porque iniif jém malopic j̄ixi ianamañjom. Jém aṇmaṭi jém putpáppic tanjipjom tsucum jém tánanamañjom. Siiga tum p̄ixiñ iñmatpa wibic cosa, jesic quejpa iga ða malo. Pero siiga iñmatpa tum cosa ðapic w̄i, jesic quejpa iga malo.

Jém wisten jém ticwatpáppic

(Mt. 7:24-27)

46 Jesic Jesús iníamáyim jém p̄ixiñtam:

—ĪTiiga miñimtámpa iga, “MánQomi, mánQomi”, pero ða iñwattámpa juuts mannímáypa? **47** W̄i iga miñpa immatoṇ ich anaṇmaṭi y iga iñwadiñ juuts mannímáypa. Siip manañquejáypa juutspic mip̄ixiñ siiga iñwatpa juuts mannímáypa.

48 Mijex juuts tum p̄ixiñ wiapaap íficwat. Wiñti iw̄itajcúmpa jojmi iga icpiim̄ap jém tic tsaayucmi. Jesic ocmi cuando compa jém ni, p̄imi ictsíy jém niicoma jém tic. Pero ða wiap ictsigóy ni imiswatpa porque acpiim̄anetaṭa tsaayucmi. **49** Siiga tum p̄ixiñ imatoṇpa ich anaṇmaṭi, pero ða icup̄icpa, jesic jém p̄ixiñ jex juuts tum p̄ixiñ jém ðapic wiap íficwat. Jém p̄ixiñ ða iw̄itajcúm jojmi iga icpiim̄ap jém tic jém tsaayucmi. Naxyucmi no más icpiim̄ane. Jesic ocmi com jém ni, p̄imi ictsíy jém niicoma jém tic, jeet̄i rato cut̄iñ, ða tí tsíy.

Jesús icpis jém Romapic capitán imozo

(Mt. 8:5-13)

7 Jesic yaj iñmadáy Jesús jém p̄ixiñtam, nic Capernaum.

2 If ídic jem tum jém Romapic capitán. Iniif ídic tum imozo jém tsampic ífoypa. Pero ocmi mimneactiṇ jém imozo. Tsam p̄imi mimne. Caatoobam. **3** Jesic cuando jém capitán ijod̄oṇa iga jém Jesús wiap icpisóy, icutsadáy jutén jém Israelpic wiadaytam iga icunucsáypa jém Jesús iga míniñ icpis jém imozo.

4 Jesic jém wiadaytam nic iám jém Jesús. Iacunucsáy, iníamáy:

—Awadaayi tum favor, jém

capitán tum wibic p̄ixiñ, yoxpaati.

5 Porque tsam ífoypa jém tannación. Tawadaytim tum jém tammastic jém sinagoga.

6 Jesic jém wiadaytam iwagananicyajpa jém Jesús. Iganam núcyajpa nocojom jém capitán íficciim, jém capitán icutsadáy aṇmaṭi jém Jesús con tungac iamigoyaj. Inímayyaj:

—Jém capitán miñimáy iga:

“MánQomi, ða más mañcobacpijpa.

Ða w̄i iga miñúcpa anticciim porque mich wibic mip̄ixiñ, ich tsam at̄aṇcaíy.” **7** Jeeyucmi ich

ða nic mamméts anyaac. Siip no más nímaayi jém caacuy iga ichaguiñ jém ammozo, tienes que pispa. **8** Porque ich anaíftim tum ananjagooyi iga apiimáypa. Ich anaíftim soldado jém ampiim̄iypaap. Siiga annímáypa jém ansoldado iga niṇguiñ, jesic tienes que nicpa. Siiga annímáypa jém ansoldado iga míniñ, jesic tienes que miñpa. Siiga annímáypa jém ammozo iga iwadiñ tum cosa, jesic tienes que iwatpa.

9 Jesic miimatoṇ jém Jesús junimpa jém capitán,

ipooñanjampa. Iámseedáy jém
pixiñtam jém miñyajpáppic
ítuuñiañciim. Iñímáy:

—Núma, mannímáypa, dá
ampátne ni tum pixiñ icuwífi yíp
Israel iga icupicpa Dios juuts yíp
capitán.

¹⁰Jesic jém capitán iamigoyaj
setyajum íficiim. Iixyajum iga
pisneum jém capitán imozo.

**Jesús icpis tum caanewiip,
jém cunoya imaníc**

¹¹Jesic jém tungac jama nic
Jesús tum atebet iñiyi Naín.
Waganicyajpa con wañi jém
icuyujciwiñ. Nicyajpatim jáyañ
jém pixiñtam. ¹²Iganam núcyajpa
jém atebet añnaca, iix iga nanictap
tum tsúts. Jém caanewiip tum
cunoya ijaymaníc. Jém yomo dá inii
tungac imaníc. Icutum tsíy. Jáyañ
jém pixiñtam iwagananicyajpa
jém cunoya. ¹³Mu iix jém tánQmi,
iyaachanjampa jém yomo. Iñímáy:
—Odoy weji.

¹⁴Jesic Jesús icunúc nocojom
jém tsúts, ichigáy icaja. Jém
icópneyajwiip teeñanjacyaj. Jesic
Jesús iñímáy jém caanewiip:
—iMiwoñjaychixi, mannímáypa,
tsucumi!

¹⁵Jesic jém caanewiip idíc
coñchucum. Mojum jiyi. Jesic Jesús
iciijunodáy iapa. ¹⁶Mu iixyaj, pimi
cñyay ítumpiy jém ítayajwiip jem.
Moj icujípyaj Dios. Nímyajpa:
—Tawiñquejayñe tum mijpic
profeta.

Nímyajpatim:

—Dios tsam tayaachanjampa,
jeeyucmi tacutsadayñe yíp pixiñ iga
tayoxpátámiñ.

¹⁷Jesic ocmi jodónata tí iwat jém
Jesús icuwífi jém naxyucmi de
Judea con jém tungac naxyucmi
jém nocojompic.

**Jém Xiwan icutsat icuyujciwiñ iga
icwácyajiñ jém Jesús**

(Mt. 11:2-19)

¹⁸Ocmi acjodónatañim jém Xiwan
jém acchínoypaap tí iwat jém Jesús.
Jém Xiwan icuyujciwiñ iñmadáy.
Jesic ocmi iñwejay wisten de jeeyaj.
¹⁹Icutsat iga niguiñ icwácyaj jém
Jesús. Nímayta jém icuyujciwiñ:

—Nigi acwaaci jém Jesús
iga: “¿Que micham miCristo
jém micutsatnewiip Dios o
ananjóctámpa tungac?”

²⁰Jesic ocmi jém Xiwan
icuyujciwiñ ipát jém Jesús.
Iñímayyaj:

—Jém Xiwan, jém acchínoypáppic,
acutsatta iga manacwáguñ
siiga micham miCristo
jém micutsatnewiip Dios o
ananjóctámpa tungac.

²¹Jesic jeetim hora cuando núcyaj
jém Xiwan icuyujciwiñ, jém Jesús
icpíspa jáyañ jém pixiñtam jém
iniitwiip caacuy, jém mimneyajwiip
y jém imatsnewiip jém mal espíritu.
Icpistim jáyañ jém cáchtiyaj.

²²Jesic Jesús iñímáy jém Xiwan
icuyujciwiñ:

—Nigi nímaayi jém Xiwan
tí ínixñeta y tí immatoñneta.
Añmadaytaami iga ixixóypam jém
cáchti, wítpam jém cuxujpic idíc,
pisneum jém cupúgayñewiip idíc
iñaca, matóñóypam jém chajca,
pisneum jém caaneyajwiip idíc y
jém yaachayajpaap ipictsonyay jém
wibic añmañi iga Dios iciacputpa.

²³ Agui maymay jém pìxiñ jém ðapic ijícpa iga i ictsacpa ich anañmáti.

²⁴ Jesic nicyajum jém Xiwan icuyujciwiñ. Moj inmadáy Jesús jém pìxiñtam iga jém Xiwan tum Dios inmatciwiñ. Nimpa:

—¿Tí oy inámta jém títstinaxyucmi? ¿Que oy inámta tum pìxiñ ðapic wiap juuts tum poc jém aguiptic ictsigóypa sawa? Da je. Oy inámta tum pìxiñ wiapaap.

²⁵ ¿Que oy inámta jém pìxiñ agui wicuyajne? Da je. Tanjodoj iga jém wicuyajnewiip ityaj jém rey ificciim. ²⁶ ¿Que tí oy inámta jém títstinaxyucmi? ¿Que oy inámta tum nunta profeta? Numa tum profeta más wiap que itumpiy jém wiñicpic Dios inmatciwiñ. ²⁷ Nimpa jém Dios inmatí tí iwatpa jém Xiwan:

Dios icutsatpa tum añmatciwiñ iga iwıtsagáypa jém Cristo ituj.

Jém añmatciwiñ añjagoyñeeba inic.

Ocmi ituuñiançciim miñpa jém Cristo.

²⁸ Jesic Jesús inímáytim jém pìxiñtam:

—Numa mannímáypa iga icuwífi yíp naxyucmi da i tungac más wibic profeta que jém Xiwan jém acchíoypaap. Pero cuando núcpa jém tiempo iga injacpa Dios, jém más xuúpuc más wiap que jém Xiwan.

²⁹ Mu imatoñyaj tí nimpa jém Jesús, jesic itumpiy jém pìxiñtam agui maymáayaj. Agui maymáayajpatim jém ichécyajpáppic jém impuesto. Nimyajpa:

—Agui wı tanDios iga tanquejáypa yíp numapic añmáti.

Porque casi itumpiy jém pìxiñtam oy icchíoyajta juř acchíóypa jém Xiwan. ³⁰ Pero jém fariseoyaj con jém maestroyaj de jém Israelpic añquímayooyi da icupicyajpa jém Dios inmatí jém inimiñnewiip jém Xiwan. Dios iwıwadaytooba idic, pero jeeyaj da iwıañjamyaj. Jeeyucmi jém fariseoyaj da ijícpa iga icchíoyajpa jém Xiwan. ³¹ Jesic tánQmi Jesús inímáy jém añtuumaneyajwiip:

—Jém pìxiñtam jém ityajwiip siip ³² jex juuts jém tsixtam jém mıchıyajpáppic plaza. Inímayyajpa jém iamigoyaj iga: “Mansusáypa jém flauta, pero da mietstampa. Ocmi mañwánáypa jém wañi jém anyácnewiip, pero ðatim miwejtampa.” ³³ Porque cuando miñ jém Xiwan jém acchíoypáppic, da icútpa caxtánañi, da iucpa vino; miñimtampa iga jém Xiwan iniit tum mal espíritu. ³⁴ Ocmi ich anyaac amiñ siñyucmi. Awícpa y anícpa, pero michım miñimtampa iga tsam awícpa y tsam ánucca vino. Miñimtampatim iga ich añcompañero jém ichécyajpáppic jém impuesto y jém tancaiywiip. ³⁵ Quejpa iga wı jém jıxi siiga wıputpa jém yoxacuy.

Oy joyi Jesús tum fariseopic pìxiñ ificciim

³⁶ Tum fariseo inwejay Jesús iga niguiñ wiiqui. Jesic nic jém Jesús, tigıy ificjom, coñ jém mesaciim. ³⁷ Itım jém atebet tum yomo wıwıdóypáppic idic. Jesic jém yomo ijodoj iga nic wiiqui

jém Jesús jém fariseopic íficciim. Níctim mex jém yomo. Ininic tum wibic tsaafasco comne de pomada c̄inpáppic. ³⁸Jesic jém yomo icunúć jém Jesús. Icosteeñáy ipuyciim. Wejpa jém yomo. Icheáypa jém Jesús ipuy con iixcañni. Ocmi jém yomo icujicháyáypa jém ipuy con jém iway. Iñnacatsútsáypa ipuy. Ocmi icámáy jém pomada jém Jesús ipuyucmi. ³⁹Jesic jém fariseo, jém iñwejayñewiip Jesús, iix tí iwatpa jém yomo. Jém p̄ixiñ ij̄jspa ij̄xiañjom. Nimpa iga: “Siiga n̄uma yíp p̄ixiñ tum profeta, źiiga da icutiíyáypa iga yíp yomo tsam táñcaý? Porque yíp yomo tum wítwidoypáppic.” ⁴⁰Jesic Jesús iñímáy jém fariseopic p̄ixiñ:

—MiXimój, mannímáytooba tum aḡmaṡi:

Jesic jém p̄ixiñ iñímáy jém Jesús:

—Maestro, anímaayi.

⁴¹Jesic nimpa Jesús:

—Í ídic wisten p̄ixiñ. Oy icacyaj tumiñ. Tum icac quinientos tumiñ de plata, tum icac cincuenta tumiñ de plata. ⁴²Ocmi icuistic da wiap icsetyay jém tumiñ. Jesic jém ichiñewiip jém tumiñ iwadáypa perdón icuistic. Dam ichécpa jém p̄ixiñ. Siip, miXimój, anímaayi juppic más ítoypa jém ichiñewiip jém tumiñ?

⁴³Jesic jém Ximój icutsoñ.

Nímáyṡ Jesús:

—Jém más jáyanpic icacne jém tumiñ.

Jesús iñímáy jém Ximój:

—N̄uma, aḡw̄cutsoñ.

⁴⁴Jesic Jesús íamseedáy jém yomo juṡ siip icheáy jém ipuy, iñímáy jém Ximój:

—Aami yíp yomo tí síp iwat. Cuando atigiy iñicjom mich da anchi ni iga antseeba ampy. Pero yíp yomo atseáypa ampy con iixcañni. Acujicháyáypa ampy con iway. ⁴⁵Mich da anañnacatsútspa, pero yíp yomo tsam aḡnacatsútsáypa ampy. ⁴⁶Mich da anaccámáy aceite aḡc̄obacyucmi, pero yíp yomo acámáy tum frasco jém pomada jém c̄inpáppic ampuuyucmi. ⁴⁷Jesic mannímáypa iga Dios iccáyáy yíp yomo ítáñca tsam jáyan. Jeeyucmi tsam p̄imi ítoypa Dios. Pero siiga Dios iccáyáypa tum p̄ixiñ ítáñca dápic jutsañ, jesic jém p̄ixiñ uxañtim ítoypa Dios.

⁴⁸Jesic Jesús iñímáy jém yomo:

—Miccáyayṡa jém iñítáñca.

⁴⁹Jesic jém ítyajwiip jém mesaciim con Jesús moj nanímáyajtaji entre jeeyaj: —¿Iapaap yíp p̄ixiñ iga wiap iccáyáy jém yomo ítáñca?

⁵⁰Pero jém Jesús iñímáy jém yomo:

—Iñcupicne Dios jeeyucmi mic̄iiputneum. Chogoyñicsim.

Jém yomtám jém iyoxpátyajpáppic Jesús

8 Ocmi Jesús oy joyi waṡi jém attebet y jém tiganjoj. Oy najíyooyi. Iñmatpa jém wibic aḡmaṡi juṡpic Dios injacpa yíp naxyucmi. Ítúnjyyaj jém doce icuyujciwiñ. ²Iwagananicypaṡim jém yomtám jém mimneyajwiip ídic con jém iniitwiip ídic jém mal espíritu. Jesús icpis jém yomtám. Tum de jeeyaj jém Malía, iñiyíṡim Magdalena, tobayṡa siete jém mal

espíritu. ³Íftim jém Xiwana, jém iwádaya iñiyi Chuzo. Jém pìxiñ icuyoxap jém gobernador Herodes. Íftim jém Susana. Yípyaj con wáfi más jém yomtam icwícyajpa jém Jesús con icuyujciwiñ, ichiijaypa títam iniífyaj.

Dios inmají jex juuts jém pac jém tanyinpáppic

(Mt. 13:1-9; Mr. 4:1-9)

⁴Tum jama aņtuumayajpa tsam jayaņ pìxiñtam. Putyaj de wáfi jém attebetyaj. Miñ íamyaj jém Jesús. Jesic Jesús inmadáy tum xufu cuento iga inquejáypa jém aņtuumaneyajwiip. Inñmáy:

⁵—Ít idic tum pìxiñ. Nic ñipi. Nic iyin jém pac icamjom. Jesic mu iyin jém pac, actiņ uxaj tumjom jém camañaca. Jém nasyajpaap icunepnepquetyaj. Jém jon icútquetyaj. ⁶Actiņtim uxaj jém pac jém tsaañjom. Mu inñay, jobíttim tits porque da mujajom. ⁷Actiņtim uxaj jém pac apidanjom. Jém apít iwagananay jém pac, ocni ixamca. ⁸Actiņtim jém pac jém wibic naxyucmi. Nay, wítimap. Cada tumtum jém pac chióy cien.

Jesic yaj inmat jém cuento. Pimi jiy Jesús. Inñmáy jém pìxiñtam: —Siiga mífatsigiyta, amatonņaami.

Íiiga inquejáypa jém icuyujciwiñ con jém xufu cuento

(Mt. 13:10-17; Mr. 4:10-12)

⁹Jesic jém icuyujciwiñ icwácyaj jém Jesús tí nimtooba jém xufu cuento.

¹⁰Jesús inñmáy:

—Dios michiine jém jixi iga wiap injodónata jém cosa anyamnetawiiip

idic. Siip wiap incutiiyíy juřpic injacpa Dios jém ifyajwiip yíp naxyucmi. Pero ich anañquejáypa jém tunğacpic pìxiñtam con yíp xufu cuento. Jesic cuando iixyajpa, da ijodónayajpa tí iixyaj. Cuando imatonņayajpa, da icutiíyiyajpa tí imatonņayaj.

Jém Jesús inmatpa tí nimtooba jém xufu cuento

(Mt. 13:18-23; Mr. 4:13-20)

¹¹Siip manañmadáypa tí nimtooba yíp xufu cuento. Jém pac jém Dios inmají. ¹²Jém actiņnewiip tumjom jex juuts jém pìxiñtam jém imatonņeyajwiip jém Dios inmají. Pero ocni jém Wocciwiñ miñ iccáyáy ianamaņjom iga odoy icupicyajiñ, iga odoy ciiputyajiñ. ¹³Jém pac, jém actiņnewiip tsaañjom, jex juuts jém pìxiñtam cuando imaton jém Dios inmají, agui maymay, iwipictsonņayaj. Pero da pimi tíchigíy, da jáypa icupicyaj, pero cuando cutítstap, ichacyajpa jém aņmají. ¹⁴Jém pac, jém actiņnewiip apidanjom, jex juuts jém imatonņeyajwiip Dios inmají, moįpa iwat juuts ixunpa Dios, pero da iyaacháypa. Icupictooba idic, pero tsam iįspa iyoxacuy. Iįspatim jém ítumiñ con jém maymáyaj. Jém jixi đapic wí ixamcaaba jém wibic jixi. Da wí tmap. ¹⁵Pero jém pac, jém actiņnewiip jém wibic naxyucmi, jex juuts tum pìxiñ wí ianama, imatonņa jém Dios inmají, iwadáypa caso. Icupicpa jém aņmají, da nunca ichacpa. Wítimap jém pìxiñ. Siempre iwatpa juuts ixunpa Dios.

Jesús inmat jém jucti icuento

(Mr. 4:21-25)

¹⁶Jesic nimpatim Jesús:

—**Da i** ñooba tum justi iga icujappa cooñcuciiim o iga ichacpa tseescuciiim. Tannooba justi iga tantunpa yucmi iga iixixóypa jém tigiypáppic. ¹⁷Jesanetím quejpa ífumpiy cosa añécne idíc. Quejpaítim jém dápic quejne idíc.

¹⁸Wadaayi caso mimichám, awímaton̄taami. Siiga iñwípic̄ton̄pa jém Dios iñmáti, jesic Dios michiiba jáyan̄ wítampic̄ cosa. Pero siiga da iñwípic̄ton̄pa jém Dios iñmáti, jesic da tí wiap michi Dios, más miccáyáypa jém cosa jém iñjispáppic idíc iga iniif.

Miñay jém Jesús ífiwítam con iapa

(Mt. 12:46-50; Mr. 3:31-35)

¹⁹Jesic jém Jesús ífiwítam con iapa miñay. Pero da wiap ífigiyyaj juí íf jém Jesús porque tsam íñim.

²⁰Añmadayta Jesús:

—Miññeum jém ñapa con iñfiwítam. Jenum íf añsicmi. Miixtooba. Mijiypáttooba.

²¹Pero Jesús iñmáy jeeyaj:

—Jém icupicneyajwiip jém Dios iñmáti, jeam ánapa, jeam antfiwítam.

Jesús icteeñanjac jém sawa con jém niipoa

(Mt. 8:23-27; Mr. 4:35-41)

²²Tum jama tigiý Jesús barcojom con icuyujciwiñ. Iñmáy:

—Tanictámpa jém laguna añwiñtuc.

Jesic nicyajum barcojom.

²³Iganam jacyajpa jém laguna, moñpa Jesús jém barcojom. Miñúcayaj cucmi jém laguna, mojum poyi jém sawa tsam pimi. Agui poobaítim jém ni. Moj tigiýi ni jém

barcojom hasta cumon̄toobam jém barco. ²⁴Jesic nic ichicyusyaj jém Jesús. Nímayfa:

—iMaestro! iMaestro!
iTatogoytámpa!

Jesic yus Jesús, tsucum. Iwogáy jém sawa con jém niipoa. Iñmáy iga teeñiñ. Jesic teeñanjac jém sawa con jém niipoa. Dam tí tsigóypa. ²⁵Jesic iñmáy jém icuyujciwiñ:

—¿Tiiga da iñcupictámpa iga Dios wiap?

Pero agui añjécneyaj jém icuyujciwiñ. Ipoon̄anjamyajpa. Nacwácyajtap entre jeeyaj:

—Que iapaap yíp p̄ixiñ iga iñmáy jém sawa iga teeñiñ y icupicpa.

Jém Gadarapic p̄ixiñ jém iniifwiip jém mal espíritu

(Mt. 8:28-34; Mr. 5:1-20)

²⁶Ocmi núcyaj jém naxyucmi de Gadara jém nian̄wiñtuc de jém Galilea. ²⁷Jesic miquet jém Jesús jém barcojom, miñ tum Gadarapic p̄ixiñ, icunúc Jesús. Jáyan̄ tiempo iniif jém mal espíritu. Icusici siiba. Da punctugíy, da tigiý. Nicne ífi juí cumtap tsúts. ²⁸Mu iix jém Jesús, jém p̄ixiñ costeeñneactiñ ipuyciim. Pimi añwejpa. Nimpa:

—¿Tiiga mifigiycúmpa con aichtám? Mich miJesús jém Yucmipic Dios miManic. Mañcunucsáypa, odoy ayaachwati.

²⁹Iñmáy jem̄pic porque Jesús iquebacputpa jém mal espíritu jém p̄ixiñ ianamañjom. Wátciy jém mal espíritu imats jém p̄ixiñ. Jém ifyajwiip jém atebet ichénayñeyaj idíc ici y ipuy con cadena. Pero ijacpa jém cadena y jém tñcuy jém

iñuusmatsayñewiip ipuy. Jém mal espíritu ichicpoypa jém pìxiñ hasta jém titsinaxyucmi. ³⁰Jesic Jesús icwác jém pìxiñ, iñímáy:

—¿Mich, i iññiyi?

Icutsoj. Nìmpa:

—Ich aLegión.

Taich tanañmatìmi nìmtooba jém jáyanpic. Icnìiya jempic porque tsam jáyan iniit jém mal espíritu.

³¹Jém mal espíritu icunucsáy Jesús iga odoy icniguiñ jém mìjpic josjom jut pajtap jém mal espíritu. ³²Jesic íf idic jem tsam jáyan yoya. Wícyajpa jém lumuyucmi. Jém mal espíritu iñímáy Jesús:

—Ajígaytaami iga atigiytámpa jém yoya ianamanjom.

Jesic Jesús ijígay. ³³Jém mal espíritu ichacum jém pìxiñ. Putum ianamanjom. Tigi yém mal espíritu jém yoya ianamanjom. Jesic jém yoya póyanstucumyaj, joobañnasyaj jém tejajyucmi. Actiñyaj jém niicim. Jicjicayaj jém yoya.

³⁴Jesic jém iwatyajpaap cuenta jém yoya, iixyaj tí iñasca jém yoya. Tsam cìñneyaj jeeyaj. Póyanstucumyaj. Nicpa inmatyaj jém atebet Gadara y jém ityajwiip nocojom tí iñasca jém yoya. ³⁵Jesic miñ iámyaj itumpiy jém pìxiñtam tí iñasca jém yoya. Miñúcyaj jut íf jém Jesús, jut jicjicca jém yoya, ipátayaj jém pìxiñ jém iniitwiip idic jém mal espíritu. Jemum coñ jém Jesús ipucim, puctugíyum, jixíiyum. Jesic tsam cìñneyaj jém pìxiñtam. ³⁶Jém iixyajwiip tí iwat Jesús, inmadayajpa jém pìxiñtam jém miññeyajwiip jutsa micpista jém iniitwiip idic jém mal espíritu.

³⁷Jesic itumpiy jém Gadarapic

pìxiñtam tsam icìnyajpa jém Jesús. Nímayta jém Jesús iga cáyiñ de jem. Jeeyucmi tigi yém Jesús jém barcojom, eybic set jut tsucum. ³⁸Pero jém pìxiñ jém iniitwiip idic jém mal espíritu icunucsáy Jesús iga nicpa itúñy.

Pero Jesús da ijígay. Ipiimíy iga tsíyiñ. Iñímáy:

³⁹—Nicsim iñticiim. Anmadaayi jém iñtíwítam tí miwadáy Dios.

Jesic nic jém pìxiñ. Nic inmat icuwíti jém atebet tí iwadáy jém Jesús.

Acpiyajta jém yomo jém ichigaywiip jém Jesús iyooí

(Mt. 9:18-26; Mr. 5:21-43)

⁴⁰Jesic setgacum Jesús jém laguna anwiñtuc. Jém pìxiñtam, jém ityajwiip jem, iwipictsonyaj. Agui maymayyaj porque itumpiy injócneyaj idic. ⁴¹Jesic núc tum pìxiñ iñiyi Jairo. Sinagoga anjagooyi jém pìxiñ. Costeññeactin jém Jesús ipucim. Iacunucsáy iga niguiñ ificim. ⁴²Jém Jairo iniit tum iyommanic, doce iamtiy. Tsam pimi mimne jém woñi hasta caatoobam.

Iganam nicpa Jesús, tsam jáyan jém pìxiñtam icpitsiyajpa. ⁴³Íf con jeeyaj tum yomo mimne doce amtiy con jém caacuy iga quetpa iñiipiñ. Jém yomo yaj miwadáy gasto itumpiy ifumiñ iga iyoj jém tsóyiyoypaap. Pero da i wia micpis. ⁴⁴Jesic jém yomo icunuc Jesús ituuñiancim. Ichigáy jém Jesús iyooí inñaca. Jeetí rato teñ jém iñiipiñ.

⁴⁵Jesic acwágóypa Jesús. Nìmpa: —¿I atsic?

Nimyajpa itumpiy iga da i michic.
Jesic jem Peto con jem tungac
icuyujciwiñ inímayaj Jesús:

—MamMaestro, tsam jáyan
pixiñtam micpitsiyajpa,
micyágíypa. ¿Tiiga micwágóypa iga
i michic?

⁴⁶Pero Jesús nimpa:

—Atsicta. Ancutiyyíy iga anacpis
tum mimnewiip con ampimi.

⁴⁷Jém yomo iix iga cutiyyíyta.
Agui cñne, agui cuetsáypa imiñ.
Costeññeactij jem Jesús ipuycim.
Nimpa jem yomo jem pixiñtam
iwiñjom:

—Ich mantsigáy inyooti iga apixiñ.
Jeeti rato apis.

⁴⁸Jesic Jesús inímay:

—Miyomo, mipisneum porque
inçupicne Dios. Siip chogoyñicsim.

⁴⁹Iganam inçuímpa Jesús jem
yomo, jesigam núc tum de jem
Jairo iticcim. Miñ inmadáy jem
Jairo. Nímaytap:

—Caaneum jem inyommanic.
Odom más cobacpiji yíp
tamMaestro.

⁵⁰Pero cuando Jesús imaton,
inímay jem Jairo:

—Odoy cñi. Cupici Dios. Pispá
inyommanic.

⁵¹Jesic núc Jesús jem Jairo
iticcim, da ijic iga i tigiypa. Icutum
tigiyp Jesús con jem Peto, Jacobo,
Xíwan y jem woñi ijatun con iapa.

⁵²Agui weyajpa jem ityajwiip jem.
Pimi anyácneyaj iga caaneum jem
woñi. Pero Jesús inímay:

—Odoy wejtaami. Da caane yíp
woñi, moypa.

⁵³Pero jem pixiñtam ixicayajpa
jem Jesús porque inuntawijodon
iga caaneum jem woñi. ⁵⁴Pero jesic

Jesús imatsáy jem woñi ici. Pimi
ijáyay. Inímay jem woñi:

—Miwoñi, tsucumi.

⁵⁵Jesic eybicfim miñ ianama,
jeeti rato tsucum jem woñi. Jesic
jem Jesús inímay iapa iga icwígúñ.
⁵⁶Ipoonanjamyajpa ijatun con iapa.
Jesús inímay iga odoy i inmadáyñ
fi inasca jem woñi.

Jesús icutsatpa jem doce icuyujciwiñ

(Mt. 10:5-15; Mr. 6:7-13)

9 Jesic tum jama jem Jesús
inçuumawat jem doce
icuyujciwiñ. Ichi ipimi iga wiañ
ítóp jem mal espíritu y iga wiañ
icpisyaj jem mimneyajwiip. ²Icutsat
iga niguiñ inçmatyaj jem ançmañi jućpic
inçacpa Dios yíp naxyucmi. Icutsat
iga icpisyajiñ jem mimneyajwiip.
³Jesic Jesús inímay jem icuyujciwiñ:
—Odoy nanictaami ni fi tunjom,
ni imbastun, ni imbolsa, ni añi, ni
tumiñ. Nanictaami no más tum
inyooti. ⁴Cuando miñúctámpa tum
ticcim, jemum michíypa hasta
miñicpa tungac tiganjoj. ⁵Siiga da
i miwipictsonçtámpa, puttaami jem
attebet. Cunebaytaami impuy iga
cáyñ jem pótpót. Wattaami jempic
iga iniñquejáypa iga tsam maloyaj
jem ityajwiip jem.

⁶Jesic moj niqiyaj jem
icuyujciwiñ, nasyajpa itumpiy jem
tiganjoj. Inçmatyajpa jem wibic ançmañi
iga taciaputtámpa Dios. Jućquej
icpisyajpañim jem mimneyajwiip.

**Jém Herodes da icutiyyíypa iapaap
jem Jesús**

(Mt. 14:1-12; Mr. 6:14-29)

⁷Jém gobernador Herodes ijodonja
fi iwatpa Jesús. Pero da icutiyyíypa

įapaap jém Jesús porque nımyajpa algunos iga pisneum jém Xiwan jém itıncujagayñewiip iisci. ⁸ Pero tungac nımyajpa iga wiñquejne jém Elías, tungac nımyajpa iga pisnegacum tum jém wiñcipic profeta. ⁹ Pero jém Herodes nımpa:

—Aich anyaac ampiimıy iga tıncujagayfaiñ iisci jém Xiwan. ¿Jesic įapaap yıp pıxiñ jém ammatonewiip iga wiap iwat jayañ jém wıtampic cosa?

Jesic jém Herodes agui iixtooba jém Jesús.

Jesús icwıcpa jém cinco mil pıxiñtam

(Mt. 14:13-21; Mr. 6:30-44; Jn. 6:1-14)

¹⁰ Jesic mixetyaj jém apóstolyaj, įmadayyaj jém Jesús ti iñsacayaj. Jesic iwagananicyaj jém doce icuyujciwiñ tungac lugar juť da ti idıyıy, nocojom jém attebet Betsaida. ¹¹ Pero ijodonayaj jém pıxiñtam juť nic Jesús, jesic nic icpoyyaj. Jesic Jesús ipictson jém pıxiñtam. Moj įquejáy juťpic įnjacpa Dios jém itıyajwiip yıp naxyucmi. Icpıspatim jém mimneyajwiip.

¹² Jesic tsuuyim. Tigıyfoobam jama. Jém doce icuyujciwiñ icunúcyaj jém Jesús. Iñımayyaj: —Anquımyaji jém pıxiñtam iga niguiñam monıyay iga niguiñ imétsyaj jém wıccuy jém tıganjoj y jém ranchoyaj jém itıyajwiip nocojom. Porque yım da ti idıyıy.

¹³ Pero Jesús iñımay icuyujciwiñ: —Acwıctaami mimichfam. Nımyajpa jeeyaj: —Da ti anaıfta más que cinco caxtánañi y wısten tiipi. ¿Tı

iñxunpa, iga nicpa tanjuy wıccuy iga tanacwıcpa itımpıy jém itıyajwiip yım?

¹⁴ Porque itıyaj como cinco mil jém pıxiñtam. Pero Jesús iñımay jém icuyujciwiñ:

—Siip accoñyaji como cincuenta cada grupo.

¹⁵ Jesic jempam iwatyaj jém icuyujciwiñ. Accoñyajta naxyucmi itımpıy jém pıxiñtam. ¹⁶ Jesic Jesús ipic jém cinco caxtánañi y jém wısten tiipi. Amquım sınyucmi, įwejpát Dios. Jesic mojum iwenwenjac jém caxtánañi y jém tiipi. Ichi icuyujciwiñ, ipıimıy iga ichıyajiñ jém pıxiñtam. ¹⁷ Jesic itımpıy wıcyaj, cusyajum. Ocmi ipınyaj doce nacoon jém caxtánañi y jém tiipi jém cutsıywiip.

Jém Peto įmatpa iga Jesús je jém Cristo

(Mt. 16:13-19; Mr. 8:27-29)

¹⁸ Jesic tum jama icutum tsıy Jesús con icuyujciwiñ iga įwejpátpa Dios. Jesic acwágóypa Jesús, iñımay jeeyaj:

—¿Junımyajpa iga aįapaap aich?

¹⁹ Jesic icutsonyay jém icuyujciwiñ:

—Nımyajpa iga mich miXiwan jém acchınoypaap. Tungac nımyajpa iga mich miElías. Tungac nımyajpa iga mich jém wiñcipic profeta jém pisnewiip.

²⁰ Jesic Jesús eybicım icwác jém icuyujciwiñ. Nımpa:

—¿Mimichfam, mijunımtampa iga aįapaap aich?

Jém Peto iñımay jém Jesús:

—Mich miCristo jém micutsatnewiip Dios.

²¹ Pero Jesús inqúim icuyujciwiñ:
—Odoy i aṇmadaayi iga icham
aCristo.

Nimpa Jesús iga accaatap

(Mt. 16:20-28; Mr. 8:30—9:1)

²² Jesic nimfím Jesús:

—Ich, jém aMiññewiip Siñyucmi,
tsam pimi ayaachwattap. Tsam
pimi ajóyixyajpa jém wiḍaytam,
jém panij aṇjagooyiyaj y jém
escribaspic maestroyaj. Da
awipictsoṇyajpa. Ocmi accaatap,
pero jém tucunajama acpiṣtap.

²³ Jesic Jesús iñímáy itumpiy de
jeeyaj:

—Siiga michám antúñiyámtooba,
jesic odoy natoytaji iñyaac.

Yaachiiyi cuando miyaachwattap,
atúñiyyi. ²⁴ Pero siiga tum pixinñ
tsam itoypa ivida iga itpa yíp
naxyucmi, jesic togoypa ivida. Siiga
miccaatap ich aṇcuyucmi, jesic
dá togoypa invida, miciaacputtap.

²⁵ Da ti cuwatcuy siiga tum pixinñ
iniit itumpiy cosa jém itwiip yíp
naxyucmi, pero ocmi caaba y
togoypa iṇama. ²⁶ Siiga michaap
iga ininmatpa ich anaṇmaṭi o
siiga mich antsaaxpa, jesic
ichgacṭi jém aMiññewiip Siñyucmi
mantsaaxpaṭim cuando amiñgacpa
yíp naxyucmi con jém siñyucmipic
pixinñtam y con jém tanJaṭuṇ Dios
ipimi. ²⁷ Numa mannímáypa iga
algunos de mimichám dá micaaba
hasta que iñixpa juṭpic injacpa Dios
yíp naxyucmi.

Aṇcacpa Jesús iámooyi

(Mt. 17:1-8; Mr. 9:2-8)

²⁸ Ocmi cuando yaj inmat
Jesús, tungac ocho día, quím

tum cotsicyucmi. Iwaganasiiba
jém Peto, Jacobo y Xiwan. Nic
inṇwejpát Dios. ²⁹ Jesic iganam
inṇwejpátpa Dios, aṇcac jém Jesús
iámooyi. Pimi popo ipuctucu,
tsam pimi tsoepa. ³⁰ Jeefi rato
núc wisten jém wiñicpic pixinñ,
jém Moisés y jém Elías, miñ
inṇmatmatneyaj con jém Jesús.

³¹ Agui tsoepatim mex jeeyaj.
Aṇmatyajpa con Jesús jutsap
iccupac jém Dios iyoxacuy cuando
accaatap Jerusalén. ³² Tsam
moṇtooba idic jém Peto con jém
icompañeroyaj. Ocmi cáy jém
imoṇi, mu iixyay iga agui tsoepa
jém Jesús iámooyi con ipuctucu
y tsoyajpaṭim jém wisten pixinñ
jém miññewiip. ³³ Jesic iganam
nictooba jém Moisés y Elías, jém
Peto iñímáy jém Jesús:

—MamMaestro, agui wi iga
taítpa yim. Siip maṇwadayfámpa
tucuten nacxtic. Tum para
mimich, tum para Moisés y tum
para Elías.

Jém Peto cumoṇ ijixi. Da
icutiyyípa tí nimpa. ³⁴ Iganam
jiypa jém Peto, actiṇ tum ucsi.
Inṇmonyaj. Jesic tsam pimi cinyaj
jém Peto con jém icompañeroyaj
iga tsíy jém ucscucim. ³⁵ Jesigam
imatonyajpa tum jiyi jém ucsanjom.
Nimpa:

—Yíbam ich amManic, jém
tsampic antoypa. Matonṭaami tí
miñímáypa.

³⁶ Cuando cuyajum jém jiyi,
jesic jém icuyujciwiñ iixyay iga
icufumtim tsíy jém Jesús. Jesic
jém icuyujciwiñ dá tí ijyyaj.
Jém tiempo dá i inmadayyajpa tí
iixñeyaj.

**Jesús icpis tum jaychixi imatsne idic
jém coñxus caacuy**

(Mt. 17:14-21; Mr. 9:14-29)

³⁷Jesic tungagam jama quetyaj jém cotsicyucmi jém Jesús con icuyujciwiñ. Tsam jáyay pixiñtam miñ imétsyaj Jesús. ³⁸Jesic tum pixiñ pimi ijíyáy jém Jesús jém pixiñtam aŋcucmi. Nimpa:

—Maestro, awadaayi tum favor.

Aámaayi yíp ammanic porque nada más tum anaiñ. ³⁹Imatsne tum mal espíritu. Agui imalwadáypa. Tsam pimi aŋwejpa. Imatspa jém coñxus caacuy. Aŋmoypacpa ijip. Da ichacpa, pimi iyaachwatpa.

⁴⁰Aŋcunucsaytip jém iŋcuyujciwiñ iga itóbáyíñ jém mal espíritu, pero jeeyaj da wiá mióobáy.

⁴¹Jesic Jesús inímáy jém pixiñtam:

—A que mimichám, étiiga da iŋcupictámpa iga Dios wiap? Étiiga da iŋcutiyyiytámpa? Jáyum tawagaíti con mimichám, tsam manyaachíyum, pero hasta siip dátim aŋcupictámpa.

Jesic Jesús inímáy jém tsixi ijatuj:

—Namiñi yim jém immanic.

⁴²Iganam núcpa jém jaychixi, imats jém mal espíritu. Icutiŋ naxyucmi. Eybictim imats jém coñxus caacuy. Jesic Jesús iwogáy jém mal espíritu, itóbáy. Icpis jém jaychixi. Iciijuncoadá ijatuj. ⁴³Agui ipooñañjamyajpa itumpiy jém ityaywiip jem, cuando iixyaj iga tsam pimi wiap jém tanjatuj Dios.

Jesús iŋmatpa eybic iga accaatap

(Mt. 17:22-23; Mr. 9:30-32)

Jesigam agui ámanjacyaj jém iixñeyajwiip tí iwat jém Jesús.

Nimyajpa jeeyaj iga da queman tánix yicxpíc cosa. Pero Jesús inímáy icuyujciwiñ:

⁴⁴—Wimatontaami iga odoy injaamanodiñ. Ich, jém aMiññewiip Siŋyucmi, aciijuncottap jém malopic pixiñtam iciijom.

⁴⁵Pero jém icuyujciwiñ da icutiyyiyajpa tí nimpa Jesús. Dios da ijícpa iga icutiyyiyajiñ. Cijyajpa iga icwácyajpa tí nimtooba.

I tsíypa jém más mijpic anjagooyi

(Mt. 18:1-5; Mr. 9:33-37)

⁴⁶Jesic Jesús icuyujciwiñ moj nacwácyajtaji entre jeeyaj iga i tsíypa jém más mijpic anjagooyi.

⁴⁷Pero Jesús icutiyyiyá tí síp ijísyaj jém icuyujciwiñ, jesic iŋwejáy tum xutú tsixi. Inimiñ jut coñ Jesús.

⁴⁸Inímáy jém icuyujciwiñ:

—Siiga tum pixiñ iwipictsonpa tum xutú tsixi juuts yíp tsixi iga iŋquejáypa anañmati, jesic jém pixiñ awipictsonpatim mex aich. Siiga awipictsonpa aich, jesic iwipictsonpatim jém anjatuj Dios jém acutsatnewiip yíp naxyucmi. Jém pixiñ, jém dápic nacujítpap, tsíypa juuts jém mijpic anjagooyi.

**Jém dápic nicpa acontra con taich,
tayoxpátpa**

(Mr. 9:38-40)

⁴⁹Jesic jém Xiwan inímáy Jesús: —MamMaestro, ánixñeta tum pixiñ itoppa jém mal espíritu mich inñiyimi. Jesic anañjyacta porque jém pixiñ da siiba con taichtam.

⁵⁰Pero Jesús inímáy:

—Odooy anñjyactaami porque jém dápic nicpa en contra de taichtam, tayoxpátpa.

**Jesús iwogáy jém Jacobo
y jém Xiwan**

⁵¹Jesic núcpa jém tiempo iga químgacpa siñyucmi jém Jesús. Duro ijispa iga nicpa iccupac jém Dios iyoxacuy jemígam Jerusalén. ⁵²Jesic Jesús icutsat wisten icuyujciíwiñ iga niguiñ tum Samariapic atebet iga iwítsacpa tum tic juí núcpa.

⁵³Pero jém Samariapic pìxiñtam dá ipíctsoñ, dá ichiiba lugar porque iixyaj iga nicpa Jesús Jerusalén.

⁵⁴Jesic cuando jém icuyujciíwiñ jém Xiwan y jém Jacobo iix iga jém Samariapic pìxiñtam dá ipíctsoñpa Jesús, nìmpa jém icuyujciíwiñ:

—MánQmi, siiga iñxunpa, anacquettámpa jém siñyucmipic jucti iga anactogoypa yíp atebet. Wiáptim añwatta juuts iwat jém wiñícpic añaicíwiñ jém Elías.

⁵⁵Jesic Jesús iámmats jém Xiwan y Jacobo. Iwogáy. Nímayyajtap:

—Mimichám, dá iñcutiíyítámpa juppíc jìxi tanaií. ⁵⁶Ich jém aMiññewiip Siñyucmi dá amiñ iga anactogoypa jém ityajwiip yíp naxyucmi, miñ añciacput.

Ocmi nicyaj tunjac tiganjoj.

**Tucuten pìxiñ itúñiytooba idéic jém
Jesús**

(Mt. 8:19-22)

⁵⁷Iganam niqiyaj tunjom, tum pìxiñ iñímáy jém Jesús:

—MánQmi, ich nicpa mantúnjy. Siempre juí miñicpa ich anicpatim.

⁵⁸Jesic Jesús iñímáy jém pìxiñ:

—Jém zorra inií ijos juí monpa. Jém jon inií ipeeñi. Pero ich, jém aMiññewiip Siñyucmi, dá anaí juí wiap anacjéj añcobac.

⁵⁹Jesic Jesús iñímáy tunjagam pìxiñ:

—Atúnjyí.

Pero jém pìxiñ nìmpa:

—MánQmi, achijí lado iga nicpa añcum jém anjatun, jesic nicpa mantúnjy.

⁶⁰Jesús iñímáy jém pìxiñ:

—Tsaci jém caaneyajwiip iga nacumyajtap jeeyaj. Pero mich nigí añmadaayi jém pìxiñtam jutsap iñjac Dios.

⁶¹Jesic tunjagam pìxiñ iñímáy:

—MánQmi, ich nictooba mantúnjy, pero wiñti añaayí iga nicpa anañquím jém ityajwiip anticciim. Jesic nicpa mantúnjy.

⁶²Pero Jesús iñímáy:

—Siiga tum pìxiñ imatscunúcpa jém arado y ámsetpa ituñiañciim, dá wiap icuyoxa Dios.

**ICUTSATPA JESÚS JÉM
SETENTA ICUYUJCIÍWIÑ**

10 Ocmi tánQmi icupiñ setenta más icuyujciíwiñ. Icutsat wiswis cada atebet juí jém Jesús nictooba iñmat jém Dios iñmañi. Wiñti nicyajpa jém icuyujciíwiñ, ocmi nicpa Jesús. ²Jesic Jesús iñímáy jém icuyujciíwiñ:

—Como tum mijpic cosecha tsam jáyay pìxiñtam icupicyajtooba jém Dios iñmañi. Pero dá i wañi jém yoxaciíwiñ jém iñmatyajpáppic jém Dios iñmañi. Siip cunucsaayi Dios iga icutsadiñ jém yoxaciíwiñ iga ipiñpa jém cosecha. ³Siip nicsim.

Mimichám mijexám juuts tum mimañborrego. Siip mañcutsattámpa juí íf jém loboyaj. ⁴Odoy nanictaami immorral, ni iñfumiñ accáycuy, ni tunjac iñciac. Odoy teeñanjaci

tunjom iga algun i iñdioschiiba.
⁵Jesic miñigiyfámpa tum ticjom, wiñfi dioschiyoftaami. Nimtaami iga: “Dios miwiwadayiñ, miifwiip yíp ticciim.”
⁶Siiga jemum íf jém ifoypáppic Dios, jesic miwiñantsonpa. Pero siiga íf jém ijóyixpáppic Dios, jesic dá miwiñantsonpa. ⁷Jesic tsýftaami jeefim ticciim juí miwipictsonptamta. Siiga micwíctamtap, jesic wíctaami, níctaami. Wi iga yojtap jém yoxaciwiñ, wiap ipictson icoñwiyooyi. Pero odoy wíctaami yim jeexic tic por tic. ⁸Jesic miñúctámpa tum atebet juí miwipictsonptap, cúttaami títam michiifamtap. ⁹Acpistaami jém mimneyajwiip jém ifyajwiip jem. Nímayftaami iga núctooba jém tiempo iga Dios injacpa jém ifyajwiip yíp naxyucmi. ¹⁰Pero cuando miñúcpa tum atebet juí dá i miwipictsonpa, jesic níctaami calle, aḡmadaayi jém ifyajwiip. Nímaayi: ¹¹“Siip aḡcunebáypa ampuy iga antsacpa yim jém pótpót jém anaifwiip ampuyyucmi. Aḡwatpa jempic iga manañquejáypa iga dá i awipictsonpa. Pero jodónataami iga manañquejaytooba idic jutsap injac Dios jém ifyajwiip yíp naxyucmi.” ¹²Pero mannímayftámpa, mañcuyujciwiñ, iga cuando núcpa jém jama iga Dios iciipinpa jém ifyajwiip yíp naxyucmi, jesic más pimi chiitap castigo jém atebet, jém dapic miwipictsonpa, que jém malopic atebet jém Sodoma.

**Jém atebetayaj jém dapic icupicyajpa
 jém Dios iḡmafi**

(Mt. 11:20-24)

¹³iAgui miuuguyfim mimichfam, miifwiip jém atebet Corazín!

iAgui miuuguyfim mimichfam miifwiip jém atebet Betsaida! Jém ifyajwiip jém atebet Tiro y jém Sidón dá iixñeyaj jém milagro juuts siip iñixpa. Pero meega iixñeyaj, pecam ichacneyaj jém imalajixi, agui anyácneyaj iga táḡcafy. ¹⁴Pero núcpa jém jama iga Dios iciipinpa jém ifyajwiip yíp naxyucmi. Cuando micipinptámpa, jesic michiifamtap más pimi castigo que jém wisten malopic atebet jém Tiro y jém Sidón. ¹⁵Mimichfam, Capernaumpic mipixiñtam, tsam minicujiptamtap, iñjispá iga minictamtap siñyucmi, pero micquettamtap hasta jém infierno.

¹⁶Jesic Jesús iñímáy icuyujciwiñ: —Siiga tum pxiñ mimatonpa mimichfam, jex juuts ich amatonpa. Pero siiga tum pxiñ mijóyixpa mimichfam, ajóyixpaím aich. Siiga tum pxiñ ajóyixpa aich, ijóyixpaím jém anJatuj Dios jém acutsatnewiip.

Setyaj jém setenta

¹⁷Jesic ocmi setyaj jém setenta jém icuyujciwiñ. Agui maymayyaj. Nímayjpa:

—MánQmi, wiapfim antop jém mal espíritu mich iññiyimi.

¹⁸Jesic Jesús iñímáy:

—Ich ánix iga coñwiýfta jém Wocciwiñ. Actiñ dende siñyucmi juuts tum majiywiñ. ¹⁹Siip matonpaami. Manchiiba jém pimi iga wiap iḡcunepquet jém tsañ y jém cacwi. Manchiibaím jém pimi iga iḡcoñwiýfiñ ifumpiy jém Wocciwiñ ipimi iga odoy wiñiñ mimalwadáy. ²⁰Pero odoy maymáyaftaami iga wiap iñtop jém

mal espíritu. Maymáyataami iga mijaycámayñeta inñiyi sinyucmi.

Maymay jém Jesús

(Mt. 11:25-27; 13:16-17)

²¹Jesic jeefi rato agui maymay Jesús porque jém Dios iAnama icmaymáya. Moj inwejpát Dios. Nímpa:

—ManJatuñ, ítumpiy jém ítaywiip sinyucmi y naxyucmi mich immiichi. Mançujíppa iga dá inñígáypa jém sabioyay iga icutiíyíypa jém wibic jixi. Pero agui miwi iga inñihiiba jixi jém pixiñtam jém dápic nacujíptap iyaac iga wiáñ icutiíyíy jém wibic jixi. Numa quejpa siip iga jempigam inwianjam.

²²Jesic Jesús inñímáy jém icuyujciíwiñ:

—AnJatuñ Dios acijjuncodáy ítumpiy cosa. Da i ijodoñ iapaap jém Dios iManic, jém anJatuñ icutím ijodoñ. Da i ijodoñ iapaap jém anJatuñ Dios, ich, Dios aManic, anjodoñ. Ijodoñtim jém pixiñtam, jém anquejayñewiip iapaap Dios.

²³Jesic Jesús icuámset jém icuyujciíwiñ. Inñímáy naps jeeyaj:

—Agui miwiíttámpa porque siip inixta títam iwatpa Dios.

²⁴Mannímáyttámpa iga jáyañ jém wiñicpic profeta y jém reyyaj iixyajtooba idic títam síp inixta. Pero da wiá miixyay. Imatorayajtooba idic títam síp immatorña, pero da wiá mimatorayaj.

Jém cuento de jém wibic

Samariapic pixiñ

²⁵Jesic teñchucum tum maestro de jém Israelpic anquímayooyi iga icutitspa Jesús. Inñímáy:

—Maestro, ¿ti wiap anwat iga ampictsonpa jém vida jém dápic cuyajpa?

²⁶Jesic Jesús inñímáy jém pixiñ: —¿Junímpa jém Dios inmafi jém jayñewiip? ¿Ti immay jem?

²⁷Jesic jém maestro de jém anquímayooyi icutson jém Jesús. Nímpa:

—Tantóyiñ jém tanJatuñ Dios con ítumpiy tánanama, con ítumpiy tampimi y con ítumpiy tanjixi. Tantóyiñ tantíwi como taich mismo.

²⁸Jesic Jesús inñímáy jém pixiñ: —Numa, mich anwicutson. Siiga inwatpa jempic, jesic impátpa jém vida jém dápic cuyajpa.

²⁹Pero jém pixiñ nanquejtatooba iyaac iga dá malo. Jesic eybicím icwác Jesús. Nímpa:

—¿Iapaap jém antiwi?

³⁰Jesic Jesús inmadáy yíp xuútu cuento iga inquejáypa iapaap jém ítíwi. Inñímáy:

—Tum Jerusalénpic pixiñ nicpa idic naxwiñ jém atebet Jericó. Pero jém númyajpaap íteñanjacayaj tunjom. Cunúmayayta ítumpiy jém iniitwiip, pimi cótsta, tsacta tunjom. Por uxañ caaba. Jesic nic jém númyajpáppic. ³¹Ocmi miñpa jeefim tunjom tum Israelpic panij. Cuando iix jém coowanewiip, icuwiáy, da icunúc, nic jém panij. ³²Jesic naspatim tum Levitapic pixiñ. Iacunúc, iam jém coowanewiip, icuwiáyim.

³³Ocmi miñpa jeefim tunjom tum Samariapic pixiñ, tungac pixiñ. Mu iix jém coowanewiip, iyaachanjam.

³⁴Iacunúc jém pixiñ. Ichóyíyáy icoowaji con aceite y vino. Inmónáy puctucmi. Icuqim icawajyucmi.

Ininic tum ticciim juť wappap cuenta. ³⁵Jesic tunğagam jama moj niqwi jém Samariapic pìxiñ. Ífop wisten tumiñ de plata, ichi jém tic iomi. Inñímáy: “Wati cuenta yíp pìxiñ. Siiga más jáyaŋ gasto iŋwatpa, miñpa manyojáy cuando anaspa eybic.”

³⁶Jesic yaj iŋmat jém cuento. Jesús icwác jém maestro de jém aŋquímayooyi, inñímáy:

—¿I ítiwi jém coowanewiip?
¿Juppic de jém tucuten, jém nasnewiip jém tunjom?

³⁷Jém maestro inñímáy Jesús:
—Jém iyaachanjamnewiip, jeam ítiwi.

Jesic Jesús inñímáy jém pìxiñ:
—Siip nicsim. Wati jempic mex mich.

Oy joyi Jesús jém Malía y Marta ificciim

³⁸Jesic mojjacum niqwi Jesús. Núc tunğac attebet. Jemum ipát tum yomo inñiyi Marta. Jém yomo inñímáy Jesús:

—Miñi miwiiqwi anticciim.

³⁹Jém Marta ijáyuc inñiyi Malía. Jém jáyucpic coñ jém tánOmi ipuyciim iga imatonpa jém iŋmaťi.

⁴⁰Pero jém Marta tsam jáyaŋ mandajo iniif. Iacunuc Jesús, inñímáy:
—¿MánOmi, que da iŋwadáypa caso iga da ayoxpátpa jém anjáyuc? Atsacne aŋcutum con jáyaŋ mandajo. Cutsati jém anjáyuc iga ayoxpádiñ.

⁴¹Jesic Jesús inñímáy jém yomo:
—Marta, Marta, mich tsam iŋwadáypa caso. Agui iniif siip jém cobacpiji. ⁴²Wi iga tanwadáypa caso de tum cosa no más. Jém

Malía ipátne jém wibic cosa iga imatonpa ich anaŋmaťi. Da i wiap iccáyay.

Jesús iŋquej juťpic tanawejpáttampa Dios

(Mt. 6:9-15; 7:7-11)

11 Jesic tum jama íf idic Jesús con icuyujciwiñ, iŋwejpátpa Dios. Cuando yaj iwat oración jém Jesús, tum jém icuyujciwiñ inñímáy:

—MánOmi, aŋquejayaami iga wiñiñ anaŋwejpátta Dios juuts jém Xiwan, jém acchíŋoypaap, iŋquejáy jém icuyujciwiñ.

²Jesic Jesús inñímáy jém icuyujciwiñ:

—Cuando inŋwejpáttampa Dios, nimitaami yiimpic:

ManJatuŋ Dios, miitwiip siŋyucmi.

Agui cuáyñe mich inñiyi.

Wi iga mñiñ jém jama iga inŋjacpa yíp naxyucmi.

Wati yíp naxyucmi juuts mich iŋwianjam, juustsim iŋwatpa siŋyucmi.

³Achiitaami cada jama ífám aŋcúttampa.

⁴Awadaytaami perdón jém antáŋca juustsim aichám aŋwadayñeta perdón jém amalwadayñewiip.

Awattaami cuenta iga odoy i wiñiñ acutítsta iga acmalwattampa.

⁵Jesic Jesús inñímáyťim icuyujciwiñ:

—Siiga tum de mimichfampic iniif tum amigo, nicpa inám tsuucim, inñímáypa: ⁶“Amigo, accaci tucuten caxtánañi. Yaguiñ

núc anticciim tum ánamigo. *Da íi anaií iga anacwícpa.*" ⁷ Pero jém ítywíip ticjom micutsonpa, nímpa: "Odooy awadaayi molestia. Siip anpajneum antic. Awagamontámpa con ammanictam. *Da wiap antsucum iga manchiiba algun íi.*" ⁸ Mannímáypa, jesic teguet tsucumpa jém íñamigo iga michiiba jém caxtánañi. Pero *da* porque tsam mitoypa. Michiiba porque *da* iñhacpa iga inhwadáypa molestia. Duro inhwágáypa hasta que michiiba ítumpiy juuts inxunpa. ⁹ Jeeyucmim annímáytámpa iga wágyátaami Dios, jesic michiiba títam mitogóyáy. Métstaami jém wítampic cosa, impáttámpa. Ticstaami jém puerta, miháyaytáp. ¹⁰ Porque jém iwágaypáppic, chiítáp. Jém imétspáppic, ipátpa. Jém íticspaap jém puerta, áháyaytáp. ¹¹ Mimichítam, siiga immānic miwágáypa tum caxtánañi, ¿que inchiiba tum tsa? Siiga miwágáypa tum tiipi, ¿que inchiiba tum tsañ? ¹² Siiga miwágáypa tum cánpu, ¿que inchiiba tum cacwi? ¹³ Michítam, tsam mimalo, pero injodoj jutsap inchi immānictam tum wibic xaja. Pero tanJatuj Dios, jém ítywíip sinyucmi, *da* malo; ichiiba jém Dios iAnama jém iwágaypáppic.

Nimaypa iga Jesús iniif acuerdo con jém malopic espíritu injagooyi

(Mt. 12:22-30; Mr. 3:20-27)

¹⁴ Tum jama Jesús ítop tum mal espíritu. Jém mal espíritu iumawatne idic tum pixiní. *Da* wiap ijy. Pero cuando topta, mojum jiyi jém uma. Ítumpiy jém pixinítam, jém ítywajwiip jem, agui

ipooñanjamyaj. ¹⁵ Pero algunos jém ítywajwiip nimyaj:

—Yíp pixiní wiap ítop jém mal espíritu porque iniidáy jém Beelzebú ipimi, jém malopic espíritu injagooyi.

¹⁶ Tungac jém ítywajwiip icutitsyajpa jém Jesús. Nímáytap:

—Anquejaayi tum milagro. Anquejaayi tum seña iga quejiñ iga Dios micutsatne.

¹⁷ Pero Jesús ijodoj íi síp ijisyaj. Inímáy:

—Siiga tum gobierno nawécyajtáp, áháyajpa entre jeeyaj, jesic nayajyajtáp. Siiga nawécyajtáp jém ítywajwiip tum ticciim, áháyajpa, jesic nayajyajtáptim. ¹⁸ Jempicim inñascaaba jém Wocciwiñ siiga nawécyajtáp entre jeeyaj, áháyajpa, jesic *da* jáypa cuyajpa. Mannímáypa jempic porque miñimtámpa iga wiap antop jém mal espíritu porque ich anaií jém Beelzebú ipimi. ¹⁹ Siiga ich antoppa jém mal espíritu con jém Beelzebú ipimi, ¿jesic mich inycuyujciwiñ, i ichiiba jém ipimi iga itoppatim jém mal espíritu? Jeeyaj iyaac miñquejáypa iga mijixitogoyñeta. ²⁰ Siiga antoppa jém mal espíritu con jém Dios ipimi, jesic tsam wiquejpa iga núcneum jém tiempo iga Dios injacpa yíp naxyucmi.

²¹ Siiga tum pixiní tsam pimi iwatpa cuenta jém ític con jém espada y jém lejon, *da* i wiap inúmáy jém iniitwiip íticciim.

²² Pero siiga miñpa tungac pixiní más pimi iga áháyajpa con jém tic iomi y icónwíypa, jesic iccáyáypa jém iespada y jém ilejon, jém ijispáppic idic jém tic iomi iga

nacupujtap. Wiap ífobáyáy ítumpiy jém iniitwiip. Nicpa iwéc con jém ífiwitam.

²³Jesic nimtím Jesús:

—Jém ďapic awaganayoxa aich, iwatpa en contra. Jém ďapic ayoxpátpa iga anantuumawatyajpa jém pixiñtam, je más aquepquebáyaypa.

Miñgacum eybic tum mal espíritu

(Mt. 12:43-45)

²⁴Put tum mal espíritu tum pixiñ íanamañjom. Siiba jém titsinaxyucmi. Imétspa juť jeypa. Pero da ipát. Nimpa iga: “Eybic asetpa jém ticciim juť aput.” ²⁵Jesic mu ixetum, ipát jém pixiñ juuts tum tic petneum y wiťsacneum. ²⁶Jesic inimiñ siete espíritu más pimi malo. Nic ífiyay jém pixiñ íanamañjom. Siip más pimi malo que wiñti.

**Wiiťpa jém icupicneyajwiip
jém Dios inmaťi**

²⁷Cuando najíyóypa Jesús, pimi jiyta tum yomo jém pixiñtam añucmi. Jém yomo inímáy jém Jesús:

—Agui wiiťpa jém yomo jém micnaywiip, jém mictsútswiip iga mictsam.

²⁸Pero Jesús inímáy jém yomo:

—Más wiiťpa jém imatoñpáppic jém Dios inmadayooyi y iwatpa juuts inímáypa.

**Wágayťa Jesús iga iwadiñ tum
milagro**

(Mt. 12:38-42; Mr. 8:12)

²⁹Jesic jém pixiñtam tsam icutumacayaj jém Jesús. Moj jiyi Jesús. Nimpa:

—Tsam malo jém ifyajwiip siip porque awágaypa tum milagro iga anañquejáyiñ iga Dios acutsatne. Pero Dios iwatpa no más tum señal juuts jém iwadayñewiip jém profeta Jonás. ³⁰Dios iwadáy jém Jonás tum señal iga jém Nínivepic pixiñtam wiañ iixyay. Jesapťim aich jém aMiññewiip Siñyucmi atsíy juuts tum señal para jém ifyajwiip siip. ³¹Jesic cuando núcpa jém jama iga Dios iciipiñpa ítumpiy jém pixiñtam, miñpa jém añtsapsaumipic reina. Tsucumpa iga iquejajwadáypa jém pixiñtam jém ifyajwiip siip. Porque juumi miñ jém yomo iga imatoñpa jém añjagooyi jém Salomón iixi. Pero yim íť con mimichťam tum más mįjpic añjagooyi que jém Salomón, pero michťam da iñcupictámpa. ³²Cuando núcpa jém jama iga ciipíñóypa Dios, tsucumyajpa jém Nínivepic pixiñtam. Iquejajwadayyajpa jém ifyajwiip siip. Porque jeeyaj ichacyaj iga imalwatpa cuando najíyóypa jém Jonás. Siip yim íť con mimichťam tum profeta más wiapaap que jém Jonás, pero michtam da inñactámpa jém malajixi.

Jém wibic jucti

(Mt. 5:15; 6:22-23)

³³Da i inooba tum nooquejucy iga ichacpa juť da i iixpa ni tum cajoncuciim. Pero accámťap yucmi iga ixixóyiñ jém tigiypáppic. ³⁴Jém tánixcuy juuts tum wibic jucti añtsoca. Siiga wí jém tánixcuy, jesic ítumpiy jém tammįťay íť jém wibic jucti añtsocajom. Pero siiga da wí jém tánixcuy, ítumpiy jém

tammijtay cupiichane. ³⁵Wati cuenta jém jucti jém iniifwiip iga odoy tsiyiñ juuts piichi. ³⁶Siiga ifumpiy jém immijtay if jém wibic jucti antsoqajom, da i ni uxaj piichi, tsam wiquejpa cuando tum nooquejcy yicquejóyapa con jém ichoca.

Jesús iwogáy jém fariseoyaj y jém escribaspic maestroyaj

(Mt. 23:1-36; Mr. 12:38-40; Lc. 20:45-47)

³⁷Ocmi cuando yaj aḡmaṡi Jesús, tum fariseopic p̄ixiñ iḡwejay iga nicpa wiiqui ificciim.

Jesic tigiy Jesús, coñ jém mesaciim. ³⁸Pero agui ámanjac jém fariseo porque iix iga Jesús da iche ici antes que wícpa juuts n̄impa jém fariseoyaj icostumbre. ³⁹Pero tánOmi Jesús in̄má y jém fariseo:

—Mimich̄tam mifariseopic, iḡcujicháyapa jém imvaso y jém in̄ch̄ima iyucwiñ, pero in̄anamaḡjom tsam if nuumi con jáyaḡ malopic j̄ixi. ⁴⁰Mimich̄tam, tsam micuixítam. Siiga in̄jodoḡ iga Dios miwadáy jém iḡci, ¿tiiga da in̄j̄ispa iga Dios miwadáytim jém in̄anama? Dios iw̄ianjam iga cuáyñeñ iḡci, pero más iw̄ianjam iga cuáyñeñ in̄anama. ⁴¹Siiga in̄chiiba tum limosna jém yaachayajpaap porque wibic j̄ixi iniif in̄anamaḡjom, jesic quejpa iga micuáyñeum iḡcutero.

⁴²Agui miuuguytim mifariseopic mipixiñtam. In̄chiifámpa Dios jém in̄diezmo de jém yierba buena, de jém ruda y ifumpiy jém in̄ñipñibooyi. Pero da in̄j̄istámpa iga in̄yoxpáttámpa jém in̄fiwitam jém yaachayajpáppic. Dátim

in̄j̄istámpa iga in̄foytámpa Dios. Wi iga in̄yoxpátpa jém in̄fiwitam y in̄foyapa Dios y odoy in̄chaguiñ iga in̄chiiba Dios jém in̄diezmo.

⁴³Agui miuuguytim, mifariseopic mipixiñtam, porque iḡcusúníyapa jém más wibic coñcuy jém sinagoga. Tsam iḡw̄ianjamtim iga ifumpiy jém p̄ixiñtam midioschiijaypa calle.

⁴⁴Agui miuuguytim miescribaspic mimaestrotam y mifariseopic mipixiñtam. In̄yaac minimigóyayṡap. Inicwatpa táḡca jém tant̄iwitam porque iḡisyajpa iga wibic mipixiñtam, pero tsam malo in̄anama. Mimich̄tam mijex juuts tum tsúts ijos. Da iixyajpa jém p̄ixiñtam, wityajpa jém tsútscumiyucmi, pero da ijodoḡyaj.

⁴⁵Jesic tum maestro de jém Israelpic aḡquímayooyi in̄má y Jesús:

—Maestro, cuando miñ̄impa jempic, jesic mich anaḡn̄imaycúmpa aich̄tam.

⁴⁶Pero Jesús in̄má y jém p̄ixiñ: —Agui miuuguytim mimich̄tam. Tsam in̄iḡcodíyapa jém in̄iḡquímayooyi, je puro in̄j̄ixquiimi. Siip in̄ict̄siimatámpa jém tant̄iwitam con jém in̄iḡquímayooyi. Da iciyyajpa. Pero mimich̄tam da iḡcuyágíyáyapa jém ich̄imi con tum iḡwayci iga in̄yoxpátpa.

⁴⁷Agui miuuguytim mimich̄tam, iḡwattámpa jém mij̄pic monumento juṡ cumyajta jém wiñ̄cpic profeta. Pero jém wiñ̄cpic in̄túmmitam iccaayaj jeet̄im profeta. ⁴⁸Jesic quejpa iga iḡw̄ianjam tí iwatyaj jém wiñ̄cpic in̄túmmitam. Jeeyaj iccaayaj jém wiñ̄cpic profeta, mimich̄tam iḡwattámpa jém

monumento juʔ cumyajta. Quejpa iga iniif de acuerdo con jem wiñicpic inñúmmitam.

⁴⁹Jeeyucmi nimpa Dios, jem tsampic jixiíy: “Añcutsat jem profetayaj y jem apóstolyaj, pero jem malopic pixiñtam iccaayaj algunos, tungac icpóyiyajpa.”

⁵⁰Pero mimichtam, miitwiip siip, Dios michiitámpa tsam mijpic castigo. Michégaytámpa inñipiñ iga accaayajta itumpiy jem Dios iprofetayaj dende watnetá yíp mundo. ⁵¹Mimichtam, miitfanwiip, michégáypa inñipiñ itumpiy jem aḡmatciwiñ dende jem mojiip iccaata, jem Abel, hasta jem Zacarías, jem accaanetawiiip jem altar inucumi con jem santuario jem mijpic masticjom.

⁵²Agui miuuguytim miccuyujoypaap de jem Israelpic aḡquímayooyi. Iniqñectámpa jem Dios inḡmati iga jem Israelpic pixiñtam odoy wiḡiñ icutiíyiyaj. Mimichtam pic da inḡcutiíyiytámpa jem Dios inḡmati, da inñigaytámpa jem Israelpic pixiñtam iga wiḡiñ icutiíyiyaj.

⁵³Jesic yaj aḡmati Jesús. Put jem ticjom. Jem escribaspic maestroyaj con jem fariseoyaj tsam ijóyixiyajpa Jesús. Jesic icwácayajpa Jesús jáyan cosa iga icutitsayajpa. ⁵⁴Tsam icunumayajpa. Inḡmatítopayajpa jem Jesús iga wiḡiñ iquejajwadayaj.

**Jém malopic aḡquímayooyi
jex juuts jem levadura**

12 Ocmi aḡtuumayajpa tsam jáyan pixiñtam hasta napiitsayajta. Jesic moj inmadáy Jesús jem icuyujciwiñ. Nímayajta:

—Cuidado. Odoy cupici jem fariseopic inquímayooyi. Porque mimigóyáypa hasta namigóyayta iyaac. Jáyanap jem malopic aḡquímayooyi jex juuts jem levadura icpiipa jem jaapi. ²Porque Dios inquejpa itumpiy jem jixi jem inyamneyajwiip. Jodónatap itumpiy jem jixi jem aḡnécnetawiiip. ³Itumpiy jem aḡmati jem iniqmatnewiiip piichciim, matonḡtap juctianḡsočajom. Jem aḡmati jem miyamniḡnewiiip ticjom, juʔ wiḡapajne, aḡmattap tiganḡbac jem yucmicpic piso.

**Tañciñiñ Dios porque je wiḡap tachi
castigo**

(Mt. 10:26-31)

⁴Mánamigotam, mannímáypa iga odoy ciḡtaami jem pixiñtam jem miccaatampáppic. Porque ocmi da ti wiḡap miwadáy. ⁵Pero mannímáypa i wiḡap inḡciḡ, ciḡtaami Dios porque despues de que micaaneum, wiḡap micnic jem juctjom juʔ da nunca píchpa, juʔ impictsonḡpa inḡcastigo. Numa mannímáypa, ciḡtaami Dios.

⁶Máytaḡ cinco xuxuʔ jon por wiḡten tumiñ. Pero Dios ijispa jem xufu jon iga iwatpa cuenta. ⁷Dios ijodonḡ jutem inḡway iniif inḡcobacyucmi. Jeeyucmi mannímáytaḡpa: Odoy ciḡtaami. Porque Dios tsam miwiwattámpa cuenta. Mífoytámpa más que jem xuxuʔ jonyaj.

Jém Cristo ipictsonḡpa jem ipixiñtam

(Mt. 10:32-33; 12:32; 10:19-20)

⁸Nimpáim Jesús:

—Siiga iniqmadáypa jem inñiwitam iga mich inḡcupic

iga Dios acutsat yíp naxyucmi, jesic cuando miñúcpa sinyucmi, mampietsonpatim jém sinyucmipic pixiñtam iwiñjom. ⁹Pero siiga tum pixiñ inñécpa iga acupicne, jesic ich anañécpatim jém sinyucmipic pixiñtam iwiñjom.

¹⁰Siiga tum pixiñ amalnímáypa aich, jém aMiññewiip Sinyucmi, wadaytap perdón. Pero siiga tum pixiñ imalnímáypa jém Dios iAnama, da nunca i iwadáypa perdón.

¹¹Cuando mininictamtap iga miquejajwadaytamtap jém juezcim, jém anjagooyicim, o jém sinagoga, jesic odoy jistaami jutpic incutsontampa o jutpic minicupujtamtap. ¹²Porque cuando núcpa jém rato iga incutsontpa, jesic Dios iAnama michiiba jixi jutpic incutsontpa.

**Siiga pimi inñoypa inñumiñ,
da wiap inñúc jut í Dios**

¹³Tum pixiñ inñímáy Jesús:
—Maestro, nímaayi jém anachi iga awégáyiñ jém anjatuj imiichi jém atsagayñetawiip.

¹⁴Pero Jesús inñímáy jém pixiñ:
—Mipixiñ, ¿i accámne como ajuez o awégoypaap para mimichtam?

¹⁵Nimíim Jesús:
—Wadaayi caso mich inñaac iga odoy incusúnfyiñ jáyan cosa. Da tanaitpa tamvida iga jáyan cosa tanaitpa.

¹⁶Jesic Jesús inmadáypa tum xutu cuento iga inquejáypa jém pixiñtam. Inñímáy:

—Íf ídic tum ricopic pixiñ. Agui jáyan cosecha chióy jém inñas.

¹⁷Jesic moypa ijis jém rico. Nimpa:

“¿Íti wiap anwat? Da anai jut anaccáypa jém ançosecha.” ¹⁸Jesic ijis íi wiap iwat. Nimpa: “Anjodon íi anwatpa siip. Ammiswatpa jém antic jut anaccáypa jém ançosecha. Anwatpa tungac más mijpic. Jenum wiap anaccáy ítumpiy jém ançosecha con ítumpiy jém anaítwiip. ¹⁹Jesic anjisa ananamajjom: Siip anaí wíccuy y íítam ansunpa para jáyan amíy. Siip ajeypa, awícpa, aucpa, amaymáypa.” ²⁰Pero Dios inñímáy jém rico: “Agui micuxi, ¿que da inñodon iga yíbam tsuu micaaba? ¿Jesic jém iniccáyñewiip, i inñagáypa?”

²¹Jesic yaj inmat jém xutu cuento, Jesús inñímáy jém icuyujciwiñ:

—Jempigam inñascaaba jém pixiñ jém inñuamawatpáppic ítumiñ para je iyaac. Tsam pimi yaachap cuando caaneum porque da wiap ininic jém ítumiñ, dátim núcpa jut í Dios.

**Dios iwatpa cuenta jém
icupicneyajwiip**

(Mt. 6:25-34)

²²Ocmi Jesús inñímáy icuyujciwiñ:

—Mannímáytampa iga odoy wadaayi caso iga miwiíttamiñ. Odoy wadaayi caso iga iniíttamiñ jáyan inñwíccuy o impuctucu. ²³Jém imvida más vale que jém inñwíccuy. Jém immijtay vale más que jém impuctucu. ²⁴Jistaami jém jonyaj. Da ñippa, da ichicpa, da inií jut iccáypa jém cosecha, pero Dios icwícpatim. Numa, mimichíam más mivale que jém jonyaj. ²⁵Siiga pimi inñjisa, da wiap inñón ni tum quípsi

más. ²⁶Siiga dá wiap inwat tum cosa dápíc jutsañ iga pimi inñispa, étiiga inwadáypa caso iga juť impicpa jem inwiccuy con jem impuctucu?

²⁷Jistaami juťpic mijap jem wibic moya jem lirio. Da yoxap ni da piťpa. Pero mannímáypa ni jem rey Salomón cuando tsam wicuyajne, dá ictsípa jem wibic moya. ²⁸Dios iwíaccuyajpa jem moya, pero dá jáypa xichpa, nooquettap. Jeeyucmi mannímáypa: Cupici iga Dios wiap miwatta cuenta. Michiiba títam mitogóyáy. ²⁹Odoy wadaayi caso juť impicpa títam inçútpa y títam inñucpa. Odoy jisi títam mitogóyáy. ³⁰Ítumpiy jem pixiñtam icuwiti yíp naxyucmi imétsyajpa títam icútyajpa. Pero mimichám inñatun ijodon títam mitogóyáy. ³¹Meetsi wiñti juť injacpa Dios, jesic ocmi Dios michiiba títam mitogóyáy.

Jutsap tanaccáy tantumiñ sinyucmi

(Mt. 6:19-21)

³²Odoy cinťaami. Mimichám mamborregotam. Da miwaťítam, pero tanjatun Dios iwianjam iga mimichap iga minjacpa. ³³Maytaami títam iniitfa iga wiañ inchiitfa jem tumiñ jem yaachayajpáppic. Wati jem Dios iyoxacuy con jem inñumiñ. Jempam iniccáypa jem inñumiñ sinyucmi juť da nunca yajpa. Jem númpaap da wiap itigiy. Jem wechi da wiap ictogoy. ³⁴Porque juť it jem inriqueza, jemum itim jem inñanama.

Íttaami listo porque miñgacpa jem Jesucristo

³⁵Íttaami listo mimichám juuts tum pixiñ iyoxaciwiñ.

³⁶Injócyajpa iomi. Oy sñaji juť añcoomyoñimpa. Setpa tsuucim. Jesic da monpa jem iyoxaciwiñ. Jicsciy ináypa jem puerta cuando ificspa jem iomi. ³⁷Agui maymay jem yoxaciwiñ siiga da monpa cuando setpa jem iomi. Numa mannímáypa iga jem iomi tsam ifoypa jem iyoxaciwiñ. Mojpa iwat wiccuy jem iomi, icwícpa jem iyoxaciwiñ. ³⁸Siiga núcpa cugaptsu o hasta cuquejaciim y da monpa jem iyoxaciwiñ, jesic agui maymayaj jeeyaj porque jem iomi pimi iwixpa.

³⁹Jesic nimtim Jesús:

—Cutiiyiytaami, siiga tum pixiñ ijodon juchis hora núcpa jem númpaap, jesic da monpa jem pixiñ. Da ichacpa jem itic iga cunúmaytaiñ. Jesapim mimichám. ⁴⁰Íttaami listo cuando ich, jem amiññewiip sinyucmi, amiñgacpa yíp naxyucmi. Porque cuando ninyajpa iga da amiñpa, jesigam amiñpa.

Jém malopíc mayordomo y jem wibic

(Mt. 24:45-51)

⁴¹Jesic Peto icwác Jesús. Inñimáy: —MánQmi, étiiga ininmat yíp xutu cuento, para aichtam o para itumpiy jem pixiñtam?

⁴²Jesic tánQmi inñimáy:

—Siip mananquejáypa iapaap jem wibic mayordomo jem icutiyyipáppic. It idic tum pixiñ iccám iga mayordomo tum jem iesclavo iga injacpa itumpiy jem imozoyaj. Iwécpatim jem wiccuy. ⁴³Agui maymay jem mayordomo siiga iwatpa juuts ipimiy jem

iomí cuando miñgacpa. ⁴⁴Numa manñímayfámpa iga jém iomí iccámpa jém píxiñ juuts tum anjagooyi iga injjacpa jém iñas y ítumpiy jém iniitwiip. ⁴⁵Pero siiga jém mayordomo ijíspa iga dá jobí setpa jém iomí, jesic mojpa imalwadáy jém imozoyaj jém píxiñtam y jém yomtám. Moj wiiqui jém mayordomo. Moj uqui hasta uquiap. ⁴⁶Ocmí núc jém jama iga set jém iomí. Pero jém mayordomo dá injjócne. Ni dá ijodoñ juchis núcpa jém iomí. Jesic mu iñúc jém iomí, ítoppa jém píxiñ. Ichiiba mijpic castigo con ítumpiy jém dápic injjócneyaj.

⁴⁷Siiga tum esclavo iwijodoñ tí ixunpa jém iomí pero dá iwatpa ni dá icupicpa, jesic jém iomí pími ichiiba castigo. ⁴⁸Pero jém píxiñ jém dápic icutiíyypa ni dá ijodoñ tí ixunpa jém iomí, siiga imalwatpa jém píxiñ, jém iomí ichiibatim castigo, pero dá más pími. Siiga tum píxiñ iwicutiíyypa ítumpiy jém Dios inmatí, jesic Dios iwianjam iga iwadiñ ítumpiy juuts je ixunpa. Siiga jáyay jixi michiiba Dios, jesic je ixunpa iga más injcuyoxañ.

Naweecyajtáp jém píxiñtam jém

Jesús icuyucmi

(Mt. 10:34-36)

⁴⁹Nimítim Jesús:

—Ich anamiñ yíp naxyucmi tum wibic jixi. Pero dá ipictsoñyajpa ítumpiy jém píxiñtam. Jém malopic píxiñtam tsam ijóyixyajpa jém iwipictsoñeyajwiip jém wibic jixi. Tsam nawécyajtáp jém píxiñtam. Siip agui ansunpa iga núguiñ jém

tiempo cuando mojpa nawécyajtaji. ⁵⁰Ich amiñ iga ampictsoñpa jém yaachaji. Tsam pími anyácne hasta que cupacpa tí ixunpa Dios. ⁵¹Odoy jisi iga ich amiñ iga ananjijyacpa jém añayajpáppic. Porque ich añcuyucmi nawécyajtáp jém ítayajwiip yíp naxyucmi. ⁵²Dende siip tsucumpa iga nawécyajtáp. Siiga ítayaj cinco píxiñ tum ticciim, jesic jém tucutenpic añayajpa con wisten. ⁵³Jém píxiñ añayajpa con ijaymanic. Jém yomo añayajpa con iyommanic. Tunyac yomo añayajpa con ixaquí.

Jém seña tanquejáypa tí miñpa

(Mt. 16:1-4; Mr. 8:11-13)

⁵⁴Jesús iñímáypatim jém píxiñtam:

—Mu iñix iga químpa jém ucsi añniisaumi, miñimtámpa iga miñtooba tuj. Numa miñpa. ⁵⁵Cuando poypa jém tsapsawa, miñimtámpa iga miñpa piji. Numa miñpa. ⁵⁶Odoy namigóyayfaji. Iñjodoñ tí miñpa cuando iñixfámpa jém ucsi y iñjampa jém sawa. Jesic cuando iñixpa jém milagro jém siippic añwatpa, étiiga dá injcutiíyypa iga núcum jém tiempo iga Dios injjacpa yíp naxyucmi?

Wínanigaayi jém mijóyixpáppic

(Mt. 5:25-26)

⁵⁷¿Mimichám, tíiga dá wiap injcipiñta jup jém malopic y jup jém wibic? ⁵⁸Jesic siiga mijóyixpa tum píxiñ y miñwejáypa jém anjagooyiciim iga miquejajwadáypa, jesic wıtsacı jém asunto antes que miñúctámpa jém anjagooyiciim. Jesic dá miñúctámpa jém

juezciiim. Porque siiga miñúctampa jém juezciiim, jesic jém juez miciiijucotpa jém policia iciiijom. Jém policia micotpa cárcel. ⁵⁹Mannímáypa iga da miputpa hasta que yajpa iñyoj.

Wĩ iga tantsacpa jém malajixi

13 Jesic jeetim tiempo núcyaj algunos jém pixiñtam iga inmadayyajpa Jesús tum asunto. Nimyajpa:

—Jém anjagooyi Pilato icca jutén jém Galileapic pixiñ. Accaayajta jemtim jut iwat sacrificio, mot jém iñiipiñ con jém animat iñiipiñ.

²Jesic Jesús iñímáy:

—¿Tiiga iñjiswa iga yípyaj más pimi táncaíy que itumpiy jém Galileapic pixiñtam? ³Siiga mimichám da inñactámpa jém malajixi, jesic mitogoytámpatim iñtumpiytam. ⁴Danam más pecam caayaj dieciocho pixiñ cuando actij jém torre jém atebet Siloé, icuchijquetyaj. Odoy jistaami iga jém caaneyajwiip más táncaíy que itumpiy jém ityajwiip Jerusalén.

⁵Mannímáypa siiga mimichám da inñactámpa jém malajixi, jesic mitogoytámpatim iñtumpiytam.

Jém tsuj jém dápic títap

⁶Jesic Jesús inmatim yíp xútu cuento iga inquejáypa jém pixiñtam. Iñímáy:

—Íf idic tum pixiñ iniif tum finca de uvas. Jém uvasanjom ñiptáim tum tsuj. Cuando núc it tiempo, nicpa íam siiga títaneum jém tsuj, pero da títap. ⁷Jesic jém nas iomi iñímáy jém iwatpáppic cuenta jém uvas: “Cada amíy miña ammétsáy

jém tsuj íim, pero da ampadáypa. Siip iniifum tres amíy, da queman títap jém tsuj. Siip wiiti jém tsuj. Anxajañipne.” ⁸Jém iwatpáppic cuenta jém nas iñímáy jém iomi: “Mánomi, tsacinam yíp amíy. Ampuusáypa jém nas, ancodáypa abono. ⁹Siiga títap, íf wĩ. Siiga dátim títap, jesic tanjwitquimpam.”

Acpišta tum yomo cómne ifuuñi

¹⁰Tum jejcuyjama accuyujóypa

Jesús jém sinagoga jut icuyjcaayajpa jém Dios inmafi.

¹¹Jemum íf tum yomo. Mimne dieciocho amíy. Tum mal espíritu iccómáy ituuñi. Da wíap iñumteñ.

¹²Cuando iix Jesús, inwejay jém yomo. Iñímáy:

—Miyomo, siip Dios micpíspa. Mictsacpa jém caacuy.

¹³Jesic Jesús ichiccunuc jém yomo. Jeeti rato numtsíy jém ituuñi. Jém yomo moj icujíp Dios. ¹⁴Pero agui jóy jém sinagoga injagooyi iga acpísóypa jém Jesús jém jejcuyjama. Iñímáy jém ityajwiip jem:

—Tanaif seis día iga tayoxap. Miñi minicpístaji jém yoxacuyjama. Odoy miñi jém jejcuyjama.

¹⁵Jesic tánQmi iñímáy jém anjagooyi:

—Tsam minimigóyaytáp. Siiga nictitspa jém imbuey o imburro jém jejcuyjama, jesic tienes que inwijpa, nicpa inicnic. ¹⁶Yíp yomo taich yomo, jém Abraham iqmanic. Jém Wocciwiñ icmatsne idic yíp caacuy dieciocho amíy. ¿Tiiga da wíap tanaccutisgáy yíp yomo de jém caacuy jém jejcuyjama?

¹⁷Jesic cuando imatonyaj ti nim Jesús, pimi tsaayaj jém dápic

iwixyajpa Jesús. Pero los de más jém pixiñtam agui maymayyay mu iixyay tí iwat Jesús. Iwianjamyay jém wibic milagro.

Jesús inquejáy iga jáyanap jém Dios ipixiñtam

(Mt. 13:31-32; Mr. 4:30-32)

¹⁸ Jesic Jesús inímáy jém pixiñtam:

—Siip manaquejáypa jutsap inpic jém Dios inquímayooyi. ¹⁹ Jém Dios inquímayooyi jex juuts tum mostaza ipac. Tum pxiñ inip jém pac icamjom. Nay jém pac, mijap juuts tum mijpic cuy hasta jém jon iwatpa ipeeñi jém mostaza incisyucmi.

²⁰ Nímtim Jesús:

—Siip manaquejáypa jutpic jáyanap jém Dios inquímayooyi. ²¹ Jém Dios inquímayooyi jex juuts levadura. Tum yomo inimot uxaj jém levadura con tucuna jepe de harina. Jesic ppa itumpiy jém jaapi.

Jém xutupic puerta

(Mt. 7:13-14, 21-23)

²² Mojgacum níqui jém Jesús Jerusalén. Oy najíyooyi jém mijpic atebet y jém xutupic tiganjoj.

²³ Jesic tum pxiñ icwác jém Jesús. Nimpa:

—MánQmi, ¿que dá wati jém iciacputyajpáppic Dios?

Jesic Jesús inímáy:

²⁴ —Wattaami empeño iga mitígiyátampa jém xutupic puerta. Mannímáyátampa iga tsam jáyan pixiñtam tigiyajtooba, pero dá wiyajpa.

²⁵ Porque cuando núcum jém hora, jesic jém tic iomi inpajpa jém

ífic. Cuando anpajneum jém ífic, dam wiap iníigiyfa. Michíyátampa anpicmi. Iníicstampa jém puerta. Miñimtampa: “iAnjaayi jém puerta!” Pero miñímáypa jém tic iomi: “Da mánixpicpa. Da anjodoñ jutpic mipixiñ.” ²⁶ Jesic michtam mojpa inñimayfa: “Tawagawícne y tawaganícne con mimich. Mich oyne miccuyujooyi jém ánattebet.”

²⁷ Pero eybicím nimpa jém tic iomi: “Mimichtam dá mánixpicpa, dá anjodoñ jutpic mipixiñtam. Tsam mimalotam, acupóyaytaami.”

²⁸ Núcpa jama iga tsam pími miwejtampa y inñichpa inífts. Pími miñyáctampa cuando iníxtampa iga iwaganaityajum Dios jém Abraham, jém Isaac, jém Jacob y itumpiy jém wiñicpic profeta; pero mimichtam michactamta anpicmi. ²⁹ Nicpa itiyaj jém anñisaumipic pixiñtam, jém anyoamsaumipic, jém anwixaumipic y jém antsapsaumipic pixiñtam. Nicpa wiiquiyaj jemum jut injacpa Dios. ³⁰ Jém ocmipic jém pixiñtam tsíypa iga wiñti y jém wiñtipic tsíypa iga ocmi.

Tsam anyácne Jesús cuando iix

Jerusalén

(Mt. 23:37-39)

³¹ Jesic jeetím jama núcyaj jutén jém fariseoyaj. Nímáyta Jesús:

—Nicsim, puti de yim porque jém Herodes miccaatooba.

³² Pero Jesús inímáy jeeyaj: —Agui jáyanajchich jém Herodes juuts tum zorra, nígi nímaayi, iga antoppa jém mal espíritu, anacpíspa jém mimnewiip yíp jama y joymi. Jesic wisticmi cuyajpa jém anyoxacuy. ³³ Seguido

aṅwatpa jém anyoxacuy hasta cupacpa. Dá jáypa anaccupacpa. Ich dá aṅciṅpa jém Herodes porque dá i wiap icca tum profeta aṅsicmi de jém Jerusalén.

³⁴Mimichám, miifañwiip Jerusalén, tsam iniccaata jém Dios iprofeta. Inñáscata tsaami jém icutsatneyajwiip Dios. Ich tsam maṅciacputtamtooba idíc, pero dá iṅwianjamta. Waŕciy manañtuumawattamtíp juuts jém piyuapa iṅtuumawatpa jém imaníc ixajcucim. Pero mimichám dá iṅwianjamta. ³⁵Como dá iṅwianjamta iga manyoxpáttampa, jesic Dios michacum. Siip dá michýpa juuts jém Dios mipixiñtam. Mannímáypa iga dá eybíc ánixtámpa hasta que núcpa jém tiempo iga aṅcujíptámpa aich, jém acutsatnewiip jém tanJatun Dios.

Jesús icpis tum pxiñ cuxiṅayñewiip

14 Jesic tum jejcuyjama nic wiiqui Jesús tum fariseopic aṅjagooyi iticciim. Algunos jém fariseo iyamcuixyajpa jém Jesús siiga imalwatpa. ²Jesic tum pxiñ miñ iám jém Jesús. Imatsne jém caacuy iga cuxiṅayñe. ³Jesic Jesús icwác jém maestro de jém Israelpic aṅquímayooyi y jém fariseoyaj, inñmá:

—¿Junimpa jém aṅquímayooyi? ¿Wiap tanacpis yíp pxiñ jém jejcuyjama o dá wiap?

⁴Pero jeeyaj dá jiyaj. Jesic Jesús ichicunúć jém mimnewiip. Icpis. Jesic inñmá:

—Chogoyñicsim.

⁵Jesic Jesús inñmá jém fariseoyaj:

—Siiga joppa tum pacusjom jém imburro o imbuey, jesic inñoppa jeefi rato. Dá iṅwadap caso siiga jejcuyjama.

⁶Jeeyaj dá wiá miicutsonyay jém Jesús.

Dá i iwixpa jém nacujíptapáppic

⁷Jesic Jesús iix iga jém aṅwejayñetawiiip tsam imétsyajpa jém más wibic coñcuy mesaciim. Jesic Jesús iṅmat tum ejemplo iga ichi jixi. Nimpa:

⁸—Siiga miṅwejayñeta iga niguiñ mixiṅaji juť aṅcoomíoyoñimpa, odoy meetsi jém coñcuy más wibic. Odoy coñi juť it noco jém aṅjagooyi porque wiap imiñ tum pxiñ más wiapaap que mich. ⁹Jesic jém miṅwejayñewiip miñmáypa: “iTsucumi! Chii yíp tungac pxiñ jém iṅcoñcuy.” Jesic mich pimi michaap, nicpa micoñi jém iṅaṅpigam coñcuyyucmi.

¹⁰Pero jesic cuando miṅwejaytáp juť wattap jém siṅ, nicsim micoñi jém lugar más juumi. Jesic cuando miñpa jém miṅwejayñewiip, miñmáypa: “Amigo, yim it más wibic coñcuy.” Jesic jém tungac pxiñtam jém coñyajwiip jém mesaciim miwixyajpa. ¹¹Dá i iwixpa jém nacujíptapáppic. Pero jém dapic nacujíptap, iwianigayyajpa jém itiwitam, icujípyajpa jém pxiñ.

¹²Jesic Jesús inñmáytim jém pxiñ jém iwatpáppic jém siṅ. Nimpa Jesús:

—Cuando mixiṅap, dá wi iga seguido iniṅwejáypa jém inamigoyaj, jém inñiwitam y jém ricopic imvecino. Porque

ocmi jeegagam miḡwejáyapa. Jempicím micseedáyapa. ¹³Pero cuando mixiḡap, aḡwejaayi jém yaachayajpáppic, jém ciifaca, jém cuxuj y jém cáchti. ¹⁴Jesic maymáayaji porque jeeyaj dá wiap micseedáy iga nicpa micwíc. Pero Dios miyojpa jém jama cuando acpisyajtap jém icupicneyajwiip Dios jém caaneyajwíppic.

Jém ejemplo de jém miḡpic siḡ

(Mt. 22:1-10)

¹⁵Jesic tum pxiñ, jém iwaganaitwiip jém mesaciim, imatorḡ junimpa jém Jesús. Jesic jém pxiñ iñímáy:

—Agui maymayyaj jém nicpaap siḡaji juí iḡjacpa Dios.

¹⁶Jesic moj iḡmadáy Jesús yíp ejemplo. Nimpa:

—Ít idic tum pxiñ. Iwatpa tum miḡpic siḡ. Iḡwejáyapa tsam jáyan pxiñtam. ¹⁷Jesic cuando yajumawat jém wícuy, icutsat tum icuyoxapaap iga niguiñ iḡwejáy jém iñímáynewiip idic. Nimpa: “Niçi miwiiquítam. Siip watneum jém wícuy.” ¹⁸Pero nimyajpa ítumpiy iga dá wiap iñic. Tum jém pxiñ nimpa: “Yaguiñ anjuy tum jaca nas. Siip nicpa ánám. Nímaayi jém iñomi iga dá wiap iga nicpa asíḡaji.” ¹⁹Jesic nimpa jém tungac pxiñ: “Yaguiñ anjuy cinco par de jém buey. Siip nicpa aḡcutits siiga yoxap. Nímaayi jém iñomi iga dá wiap annic.” ²⁰Nimpa jém tungac pxiñ: “Yaguiñ aḡcoomiñe. Jeeyucmi dá wiap annic.” ²¹Cuando set jém icuyoxapaap, iḡmadáy iomi junimpa ítumpiy jém iñímáynewiip idic. Jesic agui jóy jém iomi.

Iñímáy jém icuyoxapaap: “Niçi aḡwejaayi jém íyajwiip calle. Niçi hasta jém xufupic calle icuwií yíp attebet. Namiñi yiim jém yaachayajpáppic, jém cuxujyaj, jém cáchtiyaj, jém ciifaca y jém puyfaca.” ²²Ocmi jém icuyoxapaap iñímáy jém iomi: “Mánomi, aḡwatum juuts annímáyne, pero íñnam lugar iga tanacwícyajpa.” ²³Jesic jém iomi eybiçtím iñímáy jém icuyoxapaap: “Niçi meetsi más pxiñtam jém tunjom y jém taañi aḡnaca juí coñyajpa jém yaachayajpaap. Nímaayi iga mñiñ wiiqui anticciim. Ansunpa iga cómiñ yíp antic. ²⁴Mannímáypa, dá aḡwianjam iga miñyajpa wiiqui jeeyaj jém mojnwiip annímáyaj.”

Ti wiap tanwat iga tatsíyapa juuts jém Jesús icuyujciwiñ

(Mt. 10:37-38)

²⁵Jesic ítúḡiyajpa Jesús tsam jáyan pxiñtam. Ámset Jesús.

Iñímáy:

²⁶—Siiga más iñtoypa iñjatunḡ, iñapa, iñyomo, iñchixtam, iñachi, iñjáyuc o iñchitsi que iñtoypa Dios, dá wiap iñchíy juuts ich maḡcuyujciwiñ. Siiga más minitoýtap iñyaac que iñtoypa Dios, dá wiap iñchíy juuts ich aḡcuyujciwiñ. ²⁷Siiga dá iñyaachíyapa iga miyaachwattap, jesic dá wiap iñchíy juuts ich aḡcuyujciwiñ. ²⁸Siiga tum pxiñ iwattooba tum torre, wiñti iḡjspa jutsaḡ gasto ininicpa. Iḡjspa siiga ictsíyapa ítumiñ. ²⁹Siiga ictsucum jém torre y dá wiap iccupac, jesic agui ixicayajpa jém iixyajpáppic. ³⁰Nimyajpa: “Yíp pxiñ ictsucum

iga iwatpa jém torre, pero da wia miiccupac.” ³¹ Siiga tum rey áŋaatooba con tuŋgac rey, wiñfi ijxiñ siiga wiaŋa icoñwíy. Niŋpa jém rey: “¿Que wiaŋa aŋcoñwíy con jém diez mil soldado siiga jém ánenemigo iniif veinte mil soldado?” ³² Jesic jém rey ijispa iga da wiaŋa icoñwíy. Jesic cuando ifñam juumi jém ienemigo, icutsadáypa tum representante iga icunucsáypa iga odoy áŋayajiñ. ³³ Jesaptim mimichfam, siiga da inŋhactámpa ifumpiy jém iniifwiip, da wiaŋa inŋchíy juuts ich aŋcuyujciwiñ.

Jém caŋa jém dápic paac

(Mt. 5:13; Mr. 9:50)

³⁴ Jesic Jesús iníamáyim: —Wi jém caŋa. Pero siiga da paac, jesic da wiaŋa taŋwitsac. ³⁵ Da wi ni para jém nas, ni dátim wi iga taŋcodáypa juŋ cumneta jém abono. Jesic tampatsáypa. Siiga miŋatsigiŋyá, amatoŋtaami.

Togoy tum piŋiñ iborrego

(Mt. 18:10-14)

15 Jesic tum jama miñyaj jáyaŋ jém piŋiñtam jém ichécyajpápic jém impuesto y jém táŋcaiywiip. Miñ imatoŋyaj jém Jesús inŋquímayooyi. ² Jeeyucmi agui jóyñeyaj jém fariseoyaj y jém escribaspic maestroyaj. Icujiyyajpa jém Jesús. Niŋyajpa:

—Yíp Jesús ipictsoŋpa jém malopic piŋiñtam, iwaganawícyajpa.

³ Jesic Jesús inŋmadáy yíp xuŋu cuento iga inŋquejáypa jeeyaj, iníamáy:

⁴—Siiga tum de mimichfam iniif cien borrego y siiga togoypa tum

jém iborrego, ¿que da ichacpa jém noventa y nueve jém ifwiip copjom y niŋpa iméts jém togoyñewiip? Ich aniŋpa iga seguido icuámpa hasta que ipátpa. ⁵ Jesic cuando ipátum, icónneebeba inimiñ iqueeweyucmi. Agui maymay. ⁶ Cuando núcpa ificciim, inŋtuumawatpa iamigoyaj con jém ifyajwiip nocojom. Iníamáypa: “Maymáyaŋtaami con aich, porque ampátum jém amborrego jém togoyñewiip idíc.” ⁷ Jesaptim mannímaytámpa iga tsam if maymáyaŋi siŋyucmi cuando tum piŋiñ táŋcaiywiip ichacpa ifáŋca iga icupicpa Dios. Jém ifyajwiip siŋyucmi más maymáyaŋajpa con tum piŋiñ cuando ichacpa ifáŋca que con jém noventa y nueve jém wibic piŋiñtam jém dápic táŋcaiy.

Togoy tum yomo ifumiñ

⁸ Jesaneŋim siiga tum yomo iniif diez tumiñ de plata y togoypa tum, ¿que da ictsoŋca juŋti, ipetpa ific y iwicuámpa hasta ipátpa?

⁹ Jesic cuando ipátum jém ifumiñ, inŋtuumawatpa jém iamigoyaj y jém ivecino. Niŋpa jém yomo: “Maymáyaŋtaami con aich porque ampátum jém antumiñ jém togoyñewiip idíc.”

¹⁰ Jempicŋim mannímaypa iga maymáyaŋajpa jém siŋyucmic piŋiñtam jém ifyajwiip con Dios cuando tum piŋiñ táŋcaiywiip icucacpa ijxi.

Togoy tum piŋiñ ijaymanic

¹¹ Niŋpatim Jesús: —If idíc tum piŋiñ. Iniif wisten ijaymanic. ¹² Jém jáyucpic iníamáy

ijatuḡ: “Manjatuḡ, awégaayi jém annímáyñewiip iga anchiiba.” Jesic jém ijatuḡ iwégáy jém ítumiñ y ítumpiy jém iniitwiip. ¹³Jesic dá wañña jama jém jáyucpic icumáyáy jém imiichipic jém ichiwiip ijatuḡ. Ipic jém ítumiñ, nic juumi. Jém tungac attebet imichca jém ítumiñ con jém yomtám y jém ojo. ¹⁴Yaj imichca ítumpiy jém ítumiñ. Ocmi núc tum mijpic yuu jém naxyucmi. Yajneum jém ítumiñ, agui yuap jém pxiñ. ¹⁵Jesic nic íám tum pxiñ jém ítwiip jém attebet. Nic iméts yoxacuy. Jém pxiñ ichi tum yoxacuy. Icutsat irancho iga iwadáyiñ cuenta jém iyoya. ¹⁶Jesic jém pxiñ tsam icúttuoba jém algarrobas, jém yoya iwiccuy. Pero ni tí dá i ichiiba. ¹⁷Jesigam jém pxiñ moj ijis iga tsam cuixi. Nimpa ijixianjom: “Jém anjatuḡ iniit jáyaḡ iyoxaciwiñ íticcim. Jeeyaj tsam jáyaḡ wiccuy iniitiyaj hasta cuspa wiquiyaj. Pero ich yiim ayuucatoobam. ¹⁸Siip asetpa jut ít anjatuḡ, annímáypa: Manjatuḡ, tsam jáyaḡ tájca aḡwat contra Dios y contra mimich. ¹⁹Como tsam ammalwatum, dá wí iga atsýpa juuts tum immanic. Atsýtooba juuts tum iñyoxaciwiñ.” ²⁰Jesic mojum sefi ijatuḡcim.

Jesic cuando dánam núcne, juuminam miñi, ámpuť jém ijatuḡ, iix iga setpam jém imaníc. Agui iyaachanjám. Póyaḡsucum, nic iñnuusáy. Iññacatsúts. ²¹Jesic nimpá jém imaníc: “Manjatuḡ, tsam jáyaḡ tájca aḡwat contra Dios y contra mimich. Como tsam ammalwatum dam wí iga atsýpa juuts tum immanic.”

²²Pero ijatuḡ iñímáy tum jém icuyoxapaap: “Impimi namiñi jém más wibic yoofti, accámaayi yíp ammanic. Accámaayifim tum cucuma iciiyucmi y jém wibic ciac ipuyyucmi. ²³Namiñi jém mañix jém tanacpñewiip. Accaataami. Jesic tawictámpa, tasíñatámpa. ²⁴Anjísne idic iga caaneum yíp ammanic, pero siip vivojam. Togoyñe idic, pero siip quejum.” Jesic mojum síñajiyaj.

²⁵Pero jém iachi nicne idic camjom. Jesic settim. Cuando nuuquim tomi íticcim, imatoḡ iga añjýpa música, etsnimpá. ²⁶Jesic iñwejay tum jém icuyoxapaap. Moj icwác. Iñímáy: “¿Tiiiga ticsoyyajpa? ¿Tiiiga etsyajpa?” ²⁷Jesic jém icuyoxapaap nimpá: “Setum jém iñjáyuc. Jém iñjatuḡ ipimíy iga accaatañiñ jém mañix jém tanacpñewiip porque setum jém iñjáyuc. Dá tí iñasca.” ²⁸Jesic tsam pimi jóy jém aḡpic. Dá tigiytooba jém íticjom. Jesic put jém ijatuḡ. Nic icunucsáy iga tigíyiñ. ²⁹Pero jém aḡpic imaníc iñímáy ijatuḡ: “Mich iñjodoḡ iga tsam jáyaḡ amfiy mañcuyoxane. Siempre aḡwat juuts annímáypa. Pero dá nunca anchiñe ni tum xuťu chivo iga anasñap jém ánamigoyaj. ³⁰Siip núc yíp immanic jém imalmichcanewiip jém iñtumiñ con jém yomtám jém wítwidoypáppic. Mich iniccaáy jém mañix jém tanacpñewiip.” ³¹Jesic ijatuḡ iñímáy: “Mammanic, mich siempre miif con aich. Ítumpiy jém ammiichipic, immiichifim mich. ³²Pero siip agui wí iga tasíñatámpa, tamaymáyatámpa porque caane idic jém iñjáyuc, pero siip vivojam. Togoyñe idic, pero siip quejneum.”

Agui jáyayanjichich jém
rico imayordomo

16 Jesic jém Jesús iñímáytim icuyujcihiñ:

—Ít idic tum ricopic pìxiñ.
Iniit tum mayordomo icuyoxap.
Iwadáypa cuenta jém rico imiichi. Pero ocmi jém rico ijodóna iga síp imichcaáy jém ítumiñ. ²Jesic jém rico iñwejay jém pìxiñ. Iñímáy: “¿Tí yimpic ammatonpa iga síp iñwat? Siip wítsaci iñcuenta, aciiñjucodaayi títam iñwatne con jém anyoxacuy. Porque siip mantoppam. Dam je mammayordomo.” ³Jesic jém icuyoxapáppic jém rico moj ijis: “¿Siip, tí wiap añwat siiga accáyaytáp yíp yoxacuy? Da wiap añwat tungac yoxacuy. Atsaaptim iga añwácpa tumiñ. ⁴Siip anjodón tí wiap añwat iga anaídiñ i apictsonpa iticciim cuando dam anaj anyoxacuy. Anañécpa icuenta jém ijatsneyajwiip jém ánomi. Jesic jeeyaj apictsonpa iticciim cuando atoptawum jut ayoxap.” ⁵Jesic jém pìxiñ moj iñwejayyay jém ijatsneyajwiip jém iomi. Icwác jém mojwiip miñi. Iñímáy: “¿Jutsan iñjatsne jém ánomi?” ⁶Nimpa: “Anjatsne cien barril de aceite.” Jesic jém icuyoxapaap jém rico iñímáy jém ijatsnewiip: “Yim íf jém imvale. Miñi micoñi yim, wati tungac vale. Accaami no más cincuenta barril.” ⁷Ocmi icwác jém tungac pìxiñ, iñímáy: “¿Mich, jutsan iñjatsne jém ánomi?” Jesic nimpa jém pìxiñ: “Ich anjatsne cien carga de trigo.” Jesic jém icuyoxapaap jém rico iñímáy: “Yim

íf jém imvale, wati tungac vale. Accaami no más ochenta carga.”

⁸Ocmi cuando imaton jém rico, nimpa: “Tsam jáyayanjichich jém acuyoxapaap idic.”

Jesic Jesús iñímáy jém icuyujcihiñ:

—Jém ityajwiip yíp naxyucmi, jém dápic icupicyajpa Dios, jeeyaj más jáyayanjichich que jém icupicneyajwiip Dios. ⁹Jeeyucmi mannímáypa iga wíwadaayi jém yaachayajpáppic con jém iñtumiñ jém iniitwiip yíp naxyucmi. Jesic iniit amigo iga mipictsonpa siñyucmi cuando micaaba.

¹⁰Siiga tum pìxiñ iwíwatpa cuenta tum cosa dápic jutsan, jesic wiaptim iwat cuenta tum cosa jáyanpic. Pero siiga tum pìxiñ da iwíwatpa cuenta tum cosa dápic jutsan, jesic dátim wiap iwat cuenta tum cosa jáyanpic. ¹¹Siiga mimichfam da wiap iñwatta cuenta jém riqueza jém itwiip yíp naxyucmi, jesic Dios dátim michiiba jém siñyucmicpic riqueza. ¹²Siiga da iñwíwadap cuenta jém tungac pìxiñ imiichi, jesic da i michiiba jém cosa iga wiap immiicha porque da iñwatpa cuenta.

¹³Tum esclavo, tum pìxiñ juyñewiip, da wiap icuyoxa wisten iomi. Porque tum itoypa y tum ijóyixpa. Tum iwínanígáypa y jém tungac da iwíixpa. Da wiap iñcuyoxata Dios siiga tsam iñtopya iñtumiñ.

¹⁴Jém fariseoyaj como tsam itoypa ítumiñ, ixicayajpa jém Jesús cuando imaton tí nim. ¹⁵Pero Jesús iñímáy jém fariseoyaj:

—Mimichfam iñyaac mininquejtap iga wibic mipixiñ. Miñímanjtaayap iga wibic mipixiñ. Wiap immigóyayyaj jém iñíwítam, pero Dios miixpigáypa iñanama, tsam pimi ijóyixpa jém migooyi.

Da i wiap iccuyaj jém Dios inmatí

¹⁶Wiñti íf idíc jém anquímayooyi jém tachiiñewiip jém Moisés y jém wiñicpic profeta. Ocmi miñ jém Xiwan jém acchiñoypáppic. Moj inmat jém wibic anmatí jutpic injacpa Dios yíp naxyucmi. Siip tsam pimi tigiyajtooba jém pixiñtam jut injacpa Dios.

¹⁷Da i wiap iccuyaj jém Dios inmatí. Meega cuyajpa jém siy y jém nas, jém Dios inmatí tienes que iccupacpa, da togoypa ni tum tñimi ni tum jñti.

Odoy tsaci inyomo iga impicpa tungac yomo

(Mt. 19:1-12; Mr. 10:1-12)

¹⁸Siiga tum pxiñ ichacpa iyomo y ipicpa tungac yomo, jesic pejóypa. Siiga tungac pxiñ ipicpa jém yomo, jém tsacnetawwiip, jesic pejóypatim.

Jém ricopic pxiñ y jém Lázaro

¹⁹Íf idíc tum pxiñ tsam rico. Siempre wicuyajpa con jém wibic punctucu jém tsoowiywiip. Cada jama sñap, maymáypa. Tsam wi íf. ²⁰Íftim idíc tum pxiñ agui yaachap, iñiyi Lázaro. Agui iquímcané puuci iñacyucmi. Nicpa coñi jém Lázaro jém rico ífic anñaca. ²¹Tsam yuap jém Lázaro. Ícuttooba idíc jém ipaccapaap jém rico imesaciim. Jém chimpa icunúcyajpa jém Lázaro, iñémáypa ipuuci. ²²Ocmi ca jém

Lázaro. Jém siñyucmipic pixiñtam ininic siñyucmi jém wicom jut íf jém Abraham. Jesic ocmi caatim mex jém rico. Cumta. ²³Jém ianama nic ífi jut tsam yaachayajpa jém caaneyajwiip. Pimi yaachap jém rico. Cuando ámnic, juumi iix jém Lázaro wagaiñyay con jém Abraham. ²⁴Jesic pimi anwejpa jém rico. Nimpa: “Manjatuj Abraham, ayaachanjami. Acutsadaayi jém Lázaro iga imujiñ icianquini con ni iga míniñ amujáy antots iga cupagagaiñ porque siip pimi ayaachap juctjom.” ²⁵Jesic Abraham iñímáy: “Manic, jisi iga tsam miwiiít idíc cuando danam micaane. Pero jém Lázaro tsam yaachap idíc. Pero siip wi ítum jém Lázaro, maymay. Mich tsam miyaachap. ²⁶Mannímáypatim iga íf tum mijpic pacus entre aichtam y mimichtam. Da i wiap ijac. Siiga yiimpic nictooba jemíc, da wiap iñas. Siiga jemícpic miñtooba yiim dátim wiap iñas.” ²⁷Jesic nimpa jém rico: “Manjatuj Abraham, mançunucsáypa, cutsati jém Lázaro anjatuj iticciim. ²⁸Anaít cinco antíwi. Accutsadaayi jém Lázaro iga iñímáyíñ jém antíwítam iga odoy míniñ yiim jut tsam ayaachap ansi.” ²⁹Pero Abraham iñímáy jém rico: “Jeeyaj iniít jém Dios inmatí jém ijayñewiip jém Moisés y jém wiñicpic profeta. Wiap icupicyaj.” ³⁰Pero nimpa jém rico: “Da icupicyajpa, manjatuj Abraham, pero siiga nicpa tum jém caanewiip, jesic icucacpa ijxi jém antíwítam.” ³¹Pero jém Abraham iñímáy: “Siiga da icupicyajpa jém Dios inmatí jém ijayñewiip jém Moisés y jém

wiñicpic profeta, jesis ďatim icupicyajpa siiga miñ iñmadáy tum caanewiip idic.”

Odoy acmalwati tum iñtiwi

(Mt. 18:6-7, 21-22; Mr. 9:42)

17 Jesis Jesús iñímáy icuyujciwiñ:

—Jutquej it jém malopic cosa iga micmalwatpa. Pero agui uuguytim jém pxiñ jém ictancawatpaap itiwitam. ²Tsam jáyan castigo ichiiba Dios jém icmalwatpáppic jém Dios ipixiñtam. Más wı iga cutsénytaiñ iisciyucmi tum molino icha y acpatsiytaiñ lamar jém malopic pxiñ iga jiccaiñ que iga icmalwatpa tum jém yaguiñpic icupicne Dios. ³Jesis cuidado iga immalwatpa.

⁷Siiga táncafy tum iñtiwi, anjijyaci iga ichaguñ jém itánca. Siiga icacpa ijxi, wadaayi perdón. ⁴Siiga iñtiwi mimalwadáypa siete veces tum jama, pero siete veces miñpa miñímáy iga: “Awadaayi perdón, ançucacum anjxi”, jesis wadaayi perdón siete veces.

Tañcupiguñ iga Dios wiap iwat juuts tajycámayñe

⁵Jesis jém doce apóstolyaj miñ iñímayyaj jém Jesús:

—MánQomi, ayoxpáttaami iga más ançupictamiñ iga Dios wiap iwat juuts ajycámayñe.

⁶Jesis tánQomi iñímáy icuyujciwiñ:

—Siiga uxaj iñcupicpa iga Dios wiap iwat juuts mijycámayñe, jesis ocmi más iñcupicpa. Jex juuts tum mostaza ipac. Ďa jutsaj jém pac, pero ocmi naypa, mijap.

Numa meega iñcupicpa uxaj, jesis wiap iñímáy jém sicómoro cuy: “Nawixquímtaji, niği miñayi lamar.” Jesis jém cuy mimatonpa. Iwatpa juuts iñímáypa.

Jém esclavo iwatpa juuts ipiimáypa iomi

⁷Siiga iniit mich tum esclavo oy ijit nas o oy iwat cuenta jém imborrego, jesis cuando setum iñicciim, Ďa iñímáypa jém iñesclavo iga miñi miwiiqui. ⁸Pero mich impiimáypa jém iñesclavo. Iñímáypa iga: “Awadaayi jém anwícuy. Accaami jém indelantal. Namiñi jém wícuy, tuni mesayucmi. Wiñti acwiici ich, acniici, jesis ocmi miwícpa y miñcpatim mex mich.” ⁹Ďatim iñcupiipa jém iñesclavo porque no más iwat juuts ipiimáy iomi. ¹⁰Jesapim mimichtam cuando yaj iñwat juuts mipiimiyñe Dios, jesis más wı iga iñímáypa Dios yimpic: “Aich mich ánesclavo. Ďa wı iga mich ançujippa porque no más anwat juuts mich ampiimiyñe.”

Jesús icpis diez jém pxiñ jém iniitwiip jém lepra

¹¹Jesis iganam nicpa Jesús Jerusalén, naspá jém naxyucmi Samaria y Galilea. ¹²Núc tum xuťu tiganjoj anñaca. Iganam tigiy, ipát diez pxiñ cupúgayñeyaj iñaca. Juumi tsfyyaj iga odoy i icmachin jém caacuy. ¹³Jesis pimi anweyaypa jém mimneyajwiip, ninyajpa:

—MiJesús, mamMaestro, ayaachanjamtaami.

¹⁴Jesis Jesús iámmats, iñímáy:

—Nigi wiñquejaayi jém panijyaj.

Jesic mojum níquiyaj. Iganam nicyajpa, jeefí rato witsíyum jém iñaca, cuáyñeum. ¹⁵Jesic tum de jeeyaj cuando iix iga písneum, set eybic juí íf Jesús. Pimi jiypa, agui icujíppa Dios. ¹⁶Jesic jém pìxiñ costeñneactij jém Jesús ipuycim. Nímayá Jesús: “Íyucuidios iga anacpis.” Jém pìxiñ Samariapic.

¹⁷Jesic nimpá Jesús:

—¿Que dá midieztam mipista? ¿Juí íf jém nueve? ¹⁸¿Set no más yíp Samariapic pìxiñ iga icujíppa Dios? Yíp tunçac pìxiñ, dá je de Israel.

¹⁹Jesic Jesús iñímáy jém pìxiñ:

—Tsucumi, nicsim. Mich iñcupicum iga Dios wiap micpis jeeyucmi micuáyñeum.

Juchis núcpa jém tiempo iga Dios injacpa yíp naxyucmi

(Mt. 24:23-28, 36-41)

²⁰Jém fariseoyaj icwácyaj jém Jesús: Iñímayyaj:

—¿Jup jama tsucumpa Dios iga injacpa yíp naxyucmi?

Jesic Jesús iñímáy:

—Cuando núcpa jém jama iga Dios injacpa yíp naxyucmi dá tí íñixtámpa ni dá tí quejpa. ²¹Da í miñímáypa iga yim injacpa Dios o jeexic injacpa Dios porque siip núcneum iga injacpa Dios jém pìxiñtam ínamanjom.

²²Ocmi Jesús íñmadáy icuyujíwiñ:

—Ich amiñ siñyucmi iga aņwatpa jém Dios iyoxacuy. Núcpa jém tiempo iga michtam tsam íñixámtooba jém jama iga amiñgacpa yíp naxyucmi. Pero dá íñixtámpa. ²³Núcpa jém

migoyyajpaap, miñímáypa iga yim íf o jeexic íf. Odoy cupíci. Odoy nigi aami. ²⁴Jex juuts quénpa jém majiywiñ, quejpa juñquej. Jesabam aich, jém aMiññewiip Siñyucmi, cuando amiñgacpa yíp naxyucmi, ítumpiy jém ítyajwiip wiap aixyaj. ²⁵Pero wiñti tsam pimi ayaachwattap. Jém pìxiñtam, jém ítyajwiip siip, tsam ajóyixyajpa; dá awíixyajpa. ²⁶Juustim jém tiempo cuando íf idíc jém Noé, jesaptim jém tiempo cuando amiñgacpa yíp naxyucmi. ²⁷Cuando íf idíc jém Noé, wícyajpatim, ucyajpatim. Aņcoomiyyajpatim, ichiiyajpatim iyommanictam iga aņcoomiyyajpa hasta que tigiy jém Noé ibarcojom. Jesic quim jém ni, cumoņ icutero yíp naxyucmi. Actogoyyajta ítumpiy. ²⁸Jesanetim jém tiempo cuando íf idíc jém Lot. Jém pìxiñtam wícyajpa y ucyajpatim, juyjúyoyyajpatim y máymáyoyyajpatim, ñipyajpatim y tigayajpatim. ²⁹Pero cuando put jém Lot de jém atebet de Sodoma, actij siñyucmi jucti y azufre juuts chijóypa tuj. Actogoyyajta ítumpiy jém Sodomapic pìxiñtam. ³⁰Jesanetim aich jém aMiññewiip Siñyucmi cuando eybic awiñquejpa yíp naxyucmi, dá í ijodon jucha amiñpa.

³¹Jesic cuando núcum jém jama, siiga quimne algunos jém tigançobac, jesic odoy quedíñ iga ífoppa itraste jém ítwiip íicjom. Jém nicnewiip icamjom odoy sedíñ iga miñpa ipic itraste. ³²Jístaami tí iñasca jém Lot iwichomo. ³³Jém pìxiñ jém tsampic ífoypa ivida yíp naxyucmi tienes que togoypa jém

ivida. Pero jém ďapic ijispa ivida yíp naxyucmi, je ďa togoypa ivida.

³⁴Mannímáypa iga jeefim tsuu, wisten wagamonjajpa tseesmi. Tum nanictap, tum tsactap. ³⁵Wagawayajpa wisten yomo. Tum nanictap, tum tsactap. ³⁶Wagayoxayajpa wisten pixiñ icamjom. Tum nanictap, tum tsactap.

³⁷Mu imatonjaj icuyujciwiñ icwácyaj jém Jesús. Inímayyaj: —¿MánOmi, juť inascayajpa jempic?

Jesic Jesús inímayyaj:

—Tsam wiqejpa juť caane tum animat, jemum antuumaneyaj jém nuupuyaj. Jesaplim cuando núcpa jém jama, ítumpiy pixiñtam wiap iixyaj.

Jém cunoya iwágáypa justicia jém juez

18 Jesic Jesús inmat tum xutu cuento iga inquejáypa jém icuyujciwiñ iga inwejpátyajiñ Dios cada jama y odoy cutíñaiñ. ²Nimpa Jesús:

—Íť idic tum atebet tum juez. Ďa icinpa Dios, ďatim iwixpa ni tum pixiñ. ³Íťim jém atebet tum cunoya. Tsam nicpa iám jém juez iga iwítsaguiñ jém ipleito. Nimpa: “Anjijjaci jém amalwadaypáppic iga odom más amoogíyñ.” ⁴Jém cunoya waťciy oy iám jém juez, pero jém juez ďa imatónáypa. Pero ocmi ijispa icobacjom jém juez: “Ich ďa ancinpa Dios ni ďatim anwixpa ni tum pixiñ, ⁵pero como yíp cunoya tsam miñpa acobacpij, siip anyoxpátpa. Ďa wiap anyachíy siiga seguido miñpa quejajwaťi.”

⁶Nimpaťim tánOmi:

—Jistaami íť iwat jém malopic juez. ⁷Pero ďa jex jém tanJatuj Dios. Tsam iyoxpátpa jém icupiñeyajwiip. Ďa jáypa iyoxpát jém inwejpátápáppic tsuucim y siññi. ⁸Mannímáypa iga Dios ďa jáyñe iyoxpátpa ipixiñtam. Pero cuando ich, jém aMiññewiip Siñyucmi, amiñgacpa yíp naxyucmi, ďa ampátpa waťi jém icupicneyajwiip Dios.

Wisten pixiñ inwejpátyajpa Dios

⁹Íť algunos ijisyajpa iga ďa táncafy. Jeeyaj tsam ijóyixyajpa los de más. Jesic Jesús moj inmat tum xutu cuento iga inquejáypa jeeyaj iga táncafy ítumpiy jém pixiñtam. Inímayyaj:

¹⁰—Nicyaj wisten pixiñ jém mijpic masticjom iga iwatyajpa oración. Tum jém fariseopic pixiñ. Tunjac jém ichécápáppic impuesto. ¹¹Jém fariseopic teñchucum, iyaac iwat oración. Nimpa: “ManDios, iyucuidios iga ich ďa ajex juuts jém tunjac pixiñtam jém táncayciwiñ, jém númpáppic y jém pejoypáppic. Ich ďa ajex juuts yíp ichécápáppic impuesto. ¹²Cada ocho día ich anwatpa ayuno wisciy. ManDios, manchiiba jém décima parte de ítumpiy ancoñwiyooyi.” ¹³Jesic jém ichécpaap impuesto tigiyñetim masticjom, pero ďa núcpa juť inwejpátyajpa Dios. Ďa wiap iámquím siñyucmi. Tsam ixonpa ipecho porque pimi anyácne iga imalwatne contra jém Dios inquímayooyi. Nimpa jém ichécápáppic impuesto: “ManDios, ayaachanjami, tsam atáncafy.”

¹⁴Jesic nímítim Jesús:

—Mannímáypa iga Dios iccáyáy yíp pìxiñ ífánca. Jesic setum íficcíim, dam táncaíy. Pero Dios da iccáyáy jém fariseopic ífánca. Porque jém ignécpáppic jém ífánca, Dios da ipictsonpa. Pero jém ápic ignécpa jém ífánca, Dios ipictsonpa.

Jesús ichi bendición jém xuxúť tsíxtám

(Mt. 19:13-15; Mr. 10:13-16)

¹⁵Jesic tum jama namiñyajta jém xuxúť tsíxtám juť íf Jesús iga ichigáyíñ icobac iga ichiñ bendición. Pero cuando iixyaj jém icuyujciwiñ, iwogayyaj jém inimiñneyajwiip jém tsíxtám.

¹⁶Pero Jesús inwejáypa jém tsíxtám. Inímáy icuyujciwiñ:

—Ich anwianjam iga míníñ aámyaj jém xuxúť tsíxtám. Odoj anjyjací. Porque jém tigiyaypaap juť injacpa Dios jex juuts yípyaj xuxúť tsíxtám. ¹⁷Numa mannímáypa siiga tum pìxiñ da ijécpa iga injacpa Dios juuts tum xutúť tsíxi, jesic da wiap inúc juť injacpa Dios.

Tum ricopic anjagooyi icwácpa Jesús

(Mt. 19:16-30; Mr. 10:17-31)

¹⁸Jesic miñ tum Israelpic anjagooyi iga icwácpa Jesús. Inímáy:

—Wibic Maestro, číť wiap anwat iga ampictsonpa jém vida jém ápic cuyajpa?

¹⁹Jesic Jesús inímáy jém pìxiñ: —čTíiga miñmpa iga ich awí? Íf tum jém wibic, je jém tanjatun Dios. ²⁰Inwíjodon jém Dios

inquímayooyi: “Odoj pejooyi; odoj accaooyi; odoj nuumi; odoj cumigooyi tunjac pìxiñ; toyi jém injatun con jém inapa.”

²¹Jesic jém pìxiñ inímáy Jesús: —Ich jempigam anwatne dende atsíxiñam.

²²Mu imaton, Jesús inímáy: —No más tum cosa mitogóyáy.

Cumáyaayi ífumpiy jém iniitwiip, chij jém tumiñ jém yaachayajpáppic. Jesic iniitpa jáyan wibic riqueza sinyucmi. Jesic miñ atúnjyí.

²³Cuando imaton jém pìxiñ, tsam pími anjác porque tsam tumiñyí.

²⁴Cuando Jesús iix iga tsam anjác jém pìxiñ, jesic inímáy los de más:

—Tsam tánca iga jém ricopic núcyajpa juť injacpa Dios. ²⁵Más dá tánca inas tum camello jém núncuypac ijosjom que iga tigiyapa tum ricopic juť injacpa Dios.

²⁶Jesic jém imatonneyajwiip inímayajpa Jesús:

—čJesic i wiap iciiput?

²⁷Jesús inímáy:

—Jém ápic wiap iwat jém pìxiñtam, wiap iwat Dios.

²⁸Jesic jém Peto inímáy Jesús:

—MánQmi, aichtám antsacneum ífumpiy jém anaitwiip iga mantúnjyapa.

²⁹Jesic Jesús inímáy jém icuyujciwiñ:

—Numa mannímáypa, siiga inčacpa iníc o injatun o inapa o inítwitam o inyomo o immanictam iga nicpa inwat juuts mipimíypa Dios, ³⁰jesic Dios miwíoyjpa yíp naxyucmi, ocmi nicpa miífi con Dios para siempre.

Eybic inmatpa Jesús iga accaatap

(Mt. 20:17-19; Mr. 10:32-34)

³¹Jesic Jesús inwejput jém doce icuyujciwiñ, inímáy:

—Maton̄taami, siip taniċpa Jerusalén. Jém wiñicpic profeta ijaychacne tí annascaaba aich jém aMiññewiip Siñyucmi. Jemic Jerusalén cupacpa itumpiy juuts ijaychacne. ³²Acijun̄cottaċ jém tungac p̄ixiñtam icijjom jém ďapic je de Israel. Jeeyaj asaayiyajpa, amaln̄mayyajpa y atsujcayajpa. ³³P̄imi acótsyajpa, ocmi accaayajpa jém malopic p̄ixiñtam. Pero jém tucunajama acpistaċ de juċ it̄ jém caaneyajwiip.

³⁴Jém icuyujciwiñ ďa wiap icutiyyaj tí in̄ímáy jém Jesús. Porque Dios ďa ijċpa iga wiñiñ icutiyyáy. An̄necne jém j̄ixi para jeeyaj.

Jesús icpis tum cáchti de Jericó

(Mt. 20:29-34; Mr. 10:46-52)

³⁵Jesic cuando núc noco Jesús jém attebet Jericó, jemum coñ tum cáchti tun̄aṇṇaca iga iwáċpa tumiñ. ³⁶Mu imator̄ iga naspa tsam̄ jáyan̄ p̄ixiñtam, jém cáchti icwáċpa tí naspa.

³⁷Jesic jém it̄yajwiip in̄ímayyaj jém cáchti:

—Naxi jém Jesús jém Nazaretpic p̄ixiñ.

³⁸Jesic p̄imi aṇwejpa jém cáchti. Nimpa:

—iMiJesús, jém rey David miManic, ayaachanj̄ami!

³⁹Jesic jém aṇjagoyñeyajwiip in̄icyaj iwogayyajpa jém cáchti. Ip̄imiyay iga odoy j̄iyiñ. Pero jesic más p̄imi j̄iyapa jém cáchti. Nimpa:

—Jém rey David miManic, ayaachanj̄ami.

⁴⁰Jesigam teeñanjac Jesús. Ip̄imiy jém it̄yajwiip iga in̄imñáyin̄ jém cáchti.

Quando nanúċta juċ it̄ Jesús, jesic in̄ímáy:

⁴¹—¿Tí in̄xunpa iga man̄wadáypa?

Nimpa jém cáchti:

—MánQmi, ansunpa iga actojaayi an̄ixcuy.

⁴²Jesic Jesús in̄ímáy:

—Manactojáypa in̄ixcuy. Iga tsam̄ in̄cupicne, Dios micpis.

⁴³Jeeti rato toj jém cáchti iixcuy. Ixixóypam. Mojum it̄úñy jém Jesús. Icujiċpa Dios. Jesic cuando itumpiy jém p̄ixiñtam iixyaj tí in̄asca, icujipyajpaċim Dios.

Jesús y Zaqueo

19 Jesic tiċiy Jesús Jericó, naxi idic jém attebet.

²Jemum it̄ idic tum p̄ixiñ in̄iyi Zaqueo. An̄jagooyi idic de jém impuesto. Tsam̄ p̄imi rico. ³Agui iixtooba jém Jesús, pero ďa wiap porque tsam̄ it̄ñim. Agui chapa jém Zaqueo. ⁴Jesic póyan̄tsucum jém Zaqueo, an̄jagóy miñic, quim̄ tum sicómoro cuyyucmi iga wiñiñ iix Jesús porque jemigam naspa.

⁵Cuando naspa Jesús, iámquímáypa cuyyucmi juċ it̄ jém Zaqueo. In̄ímáy:

—MiZaqueo, imp̄imi queti. Yip̄ jama nicpa man̄jóyáy in̄ficciim.

⁶Jesic jicsciy quet jém Zaqueo. Nic ichon̄ jém Jesús, iwagananicpa it̄ficciim. Tsam̄ maymay jém Zaqueo. ⁷Pero jém p̄ixiñtam ďa iwian̄j̄amyaj iga nicpa Jesús con jém Zaqueo. Moj icujiyyaj jém Jesús. Nimyaj:

—Ďa w̄ iga nicpa tan̄jóyáy tum̄ tan̄caiywiip it̄ficciim.

⁸Ocni teñchucum jém Zaqueo it̄ficciim, in̄ímáy Jesús:

—MánQmi, siip aṇwéċpa itumpiy jém anaítwiip. Cuccucmi anchiiba

jém yaachayajpáppic. Siiga i ammigóyayñe iga annúmáy ítumiñ, jesic anáccseedáypa cuatro veces.

⁹Jesic nímpa Jesús:

—Yíp jama ciacputtap jém ítýajwiip yíp ticciim. Táncaýy idíc, pero taich pixiñ, imanícím jém Abraham. ¹⁰Ich, jém aMiññewiip Siñyucmi, miñ amméts jém togoynéyajwiip iga añciacputpa.

Jesús inmat jém cuento de jém diez esclavo

(Mt. 25:14-30)

¹¹Iganam imatonjyajpa, Jesús inmadáypatim jeeyaj tum xutú cuento. Porque dá juumi jém Jerusalén y jém pixiñtam ijsiyajpa iga dam jáyñe núcpa jém tiempo iga Dios injacpa yíp naxyucmi.

¹²Jesic Jesús inímáy:

—Íf idíc tum wibic pixiñ.

Añwejaytap iga niguiñ iccámta juuts tum mijpic anjagooyi. Juumi nicpa ipic jém icargo. ¹³Pero antes que nicpa, inwejay diez jém icuyoxapaap. Ichi cada tumtum cien tumiñ de plata. Inímáy jeeyaj: “Nigi mimáymáyooyi iga inyoxacaiñ yíp tumiñ hasta amiñgacpa.” Ocmi nic jém pixiñ.

¹⁴Pero jém ítýajwiip jém inaxyucmi tsam ijóyxyajpa jém wibic pixiñ. Jesic jeeyaj icutsatyaj añmáti hasta juí nicpa ipic jém icargo. Nimyajpa iga: “Da ansuntámpa iga accámta yíp pixiñ juuts ananjagooyi.” ¹⁵Pero jém wibic pixiñ oy ipic jém icargo. Eybic set ífcimi. Mu inúc, inwejayyaj jém icuyoxayajpaap, jém ichiñewiip jém tumiñ. Ijodónatooba jutsañ icoñwiyñe jém ítumiñ. Icwác cada

tumtum de jeeyaj. ¹⁶Núc jém wiñtipic. Nímpa: “Mánomi, jém cien tumiñ de plata icoñwíy mil tumiñ de plata.” ¹⁷Jém anjagooyi inímáy: “Agui wibic miyoxaciwiñ. Iga inwiyoxaca jém tumiñ, jesic manaccámpa como tum minjagooyi de diez attebet.” ¹⁸Ocmi núc jém tungac icuyoxapaap. Inímáy:

“Mánomi, jém cien tumiñ de plata icoñwíy quinientos tumiñ de plata.”

¹⁹Jém anjagooyi inímáy: “Jesic manaccámpa como minjagooyi iga ininjacpa cinco attebet.” ²⁰Jesic núcpa tungac jém icuyoxapaap. Nímpa: “Mánomi, yim it jém cien tumiñ de plata. Manaccáyayñe idíc tum pañuelojom ²¹porque agui acinpa. Ich anjodoy iga tsam impiimíyapa jém inyoxaciwiñ. Mich inñobáyáy jém tungac pixiñ imiichi pimimi. Tungac inippa jém cama, pero mich impiñpa jém cosecha.”

²²Jesic nímpa jém anjagooyi: “Mich tsam mimalo. Siip mañciipinpa con micham ininmáti. Siiga injodoy iga tsam ampimíyapa jém anyoxaciwiñ y antobáypa jém tungac pixiñ imiichi pimimi y iga ampinpa jém cosecha jém dapic anñipne, ²³¿jesic tiiga dá injucum antumiñ jém banco iga ich ampictsonpa antumiñ con icoñwiyoooyi cuando asetum?” ²⁴Jesic jém anjagooyi inímáy jém ítýajwiip: “Accáyaayi yíp pixiñ ítumiñ. Chi jém iniiítwiip jém mil tumiñ de plata.” ²⁵Jesic nímajpa jeeyaj: “Mánomi, iniítum mil tumiñ de plata.” ²⁶Pero jém anjagooyi inímáy: “Jém iniiítwiip, anchiiba más. Jém dapic jutsañ iniít, más anaccáyáypa jém uxanpic iniít. ²⁷Siip namini yim jém dapic

ixunyajpa iga ich accám̄ta juuts aṅjagooyi iga ananjacpa. Accaayaj̄i ȳiim aṅwiñjom jém malopic pixiñfam.”

Tigiy Jesús jém Jerusalén

(Mt. 21:1-11; Mr. 11:1-11; Jn. 12:12-19)

²⁸Jesic cuando yaj aṅmafi Jesús, mojcacum niq̄ui Jerusalén, aṅjagóypa iñic. ²⁹Jesic núcyajtoobam jém wisten attebet jém Betfagé y Betania. Cotsic aṅnaca, jém cotsic iñiyi Olivos. Jesic Jesús icutsat wisten jém icuyujciwiñ iga iwatpa tum mandado. ³⁰Nímayyajta: —Nictaami jém tiganjoj jém tájámocnewiip. Cuando miñúctámpa, impáttámpa tum burro tsenne. Jém burro da i queman iquímca. Wiji, anamíñaayi. ³¹Siiga i micwácpa iga tiiga iṅwijpa, jesic nímaayi iga jém iñOmi ixunpa.

³²Jesic nicyaj jém icutsatneyajwiip, ipátyaj juuts iñímáy Jesús. ³³Cuando iwiyajpa jém burro, jém iomi acwágóypa, iñímáy:

—¿Tiiga iṅwijpa amburro?

³⁴Jesic jém Jesús icuyujciwiñ icutsonyay. Iñímáyay:

—Porque jém tánOmi ixunpa.

³⁵Nanigayt̄ap Jesús jém burro. Jesic jém icuyujciwiñ icutócyajpa jém burro con iyooí. Acquímt̄a Jesús burroyucmi. ³⁶Iganam nicpa jém Jesús, jém it̄yajwiip it̄ógayyajpa iyooí tunjom jūt wītpa jém burro. ³⁷Jesic núcyajpa nocojom Jerusalén.

Nasyajpa jém cotsicaj̄naca iñiyi Olivos. It̄uj̄iyajpa it̄umpiy jém icupicneyajwiip Jesús. Agui maymayyay. Pimi j̄iyajpa.

Icuj̄ipyajpa Dios iga agui jáyan̄ wibic milagro iixyay. ³⁸Nim̄yajpa jém Jesús icuyujciwiñ:

—TanJat̄uṅ Dios tacutsadáy tum Rey, w̄i iga iw̄iwadáȳiñ Dios. Maymáayajpa jém it̄yajwiip siñyucmi. Siip agui cuj̄iptap tanJat̄uṅ Dios jém yucm̄ipic íf.

³⁹Jesic algunos jém fariseoyaj jém it̄yajwiip jém pixiñt̄amanjom, iñímáyay jém Jesús:

—Maestro, aṅjij̄jaci jém iṅcuyujciwiñ porque icuj̄iyajpa Dios.

⁴⁰Pero Jesús iñímáy jém fariseoyaj: —Manním̄ayt̄ampa siiga jeeyaj da icuj̄ipyajpa Dios, jesic j̄iyajpa jém tsa jém it̄wiip tun̄ aṅnaca.

⁴¹Cuando núc nocojom jém Jerusalén, mu iix jém attebet, agui wejpa Jesús. ⁴²Nim̄pa:

—Agui miuuguyt̄im mimicht̄am miit̄tan̄wiip ȳip Jerusalén. Núctip jém wibic aṅmafi iga miciacputpa Dios, pero mimicht̄am da iṅwian̄jamta. Siip nasum jém jama iga impict̄son̄t̄ampa jém wibic aṅmafi. ⁴³Núcpa jém jama iga miyaachwattamtap. Jém iñenemigoyaj micuteñxetpa icuwoyo ȳip attebet. Micunúcyajpa cada lado hasta da jūt wīap imput.

⁴⁴Miccut̄int̄amtap naxyucmi. Miswattap̄tim it̄umpiy jém t̄icyaj, cujegáyp̄tim jém tsaataañi. Da ts̄ȳpa ni tum jém tsa jūt cutatsquetne. Yajpa miccucaayt̄amta iñt̄umpiyt̄am. Miñt̄ip Dios iga miciacputt̄ampa, pero mich̄tam da iṅwian̄jamta.

Jesús iw̄itsac jém m̄ijpic m̄astic

(Mt. 21:12-17; Mr. 11:15-19; Jn. 2:13-22)

⁴⁵Jesic tigiy Jesús jém m̄ijpic m̄asticjom. Iquebacput aṅs̄icmi

ítumpiy jém máymáyoypáppic y jém juyjúyoypáppic.

⁴⁶Jesús iníímáy:

—Jempam jaychacnetá jém Dios inmaí, nimpá Dios iga: “Ích antic juí jém ampixiñtam inwejpátayajpa Dios. Pero siip jém númyajpaap yamayajpa jém Dios ífícjom.”

⁴⁷Jesic ocmi accuyujóypa jém Jesús cada jama jém mijpic masticjom. Pero jém panij anjagooyiyaj con jém escribaspic maestroyaj con jém Israelpic anjagooyiyaj tsam imétsyajpa jutsap iccaayaj jém Jesús. ⁴⁸Pero dá ipátayajpa jutsap icca. Porque ítumpiy jém pixiñtam pimi iwianjamyaj iga imatonyajpa jém Jesús inmaí.

Acwácta Jesús i icutsat

(Mt. 21:23-27; Mr. 11:27-33)

20 Tum jama accuyujóypa Jesús jém mijpic masticjom. Inmadáypa jém pixiñtam jém wibic anmaí iga Dios taciacputpa. Jesic núcyaj jém panij anjagooyiyaj con jém escribaspic maestroyaj. Wagamiñyaj con jém wídaytam. ²Nímaytá Jesús:

—Anímaayi: ¿I miñímáy iga inwatpa yímpic? ¿I mipiímáy?

³Jesic Jesús icutsoj. Iníímáy:

—Ichgacti manacwácpa.

Anímaayi: ⁴¿I ipiímáy jém Xiwan jém achíñoypaap? ¿Dios ipiímáy o jém pixiñtam?

⁵Jesic jém anjagooyiyaj moj nanímayyajtaji entre jeeyaj:

—Siiga tannímáypa iga Dios ichi ipimi jém Xiwan iga achíñoypa, jesic wiap tanímáy iga: “¿Jesic íiiga dá incupicta?” ⁶Pero siiga

tannímáypa iga Dios dá ichi ipimi jém Xiwan, jesic ítumpiy jém pixiñtam tanácscaaba tsaami porque jeeyaj icupicyajpa iga nunta profeta jém Xiwan.

⁷Jesic jém anjagooyiyaj icutsonyay iga dá ijodoj i ichi ipimi jém Xiwan.

⁸Jesic Jesús iníímáy:

—Ích dátim mannímáypa juí ampic jém ampimi iga anwatpa juuts síp anwat.

Jém malopic yoxaciwiñ

(Mt. 21:33-44; Mr. 12:1-11)

⁹Jesic Jesús moypa inmat tum xuútu cuento iga inquejáypa jém pixiñtam. Iníímáy:

—Ít idic tum pixiñ. Iniit tum jaca nas. Inip tum finca de uvas. Ocmi icnucs jém inas tungac jutén yoxaciwiñ. Jesic jém nas iomi nic íti tungac naxyucmi. ¹⁰Ocmi núc jém tiempo iga ítúcyajpa jém uvas. Jém nas iomi icutsat tum jém icuyoxapaap iga iwéguiñ jém uvas con jém acnucsnetawíip jém nas. Pero pimi cótsta, acsetta, dá íi ichiiyaj. ¹¹Jesic jém nas iomi icutsat tungac jém icuyoxapaap. Pero cótstátim, malnímaytátim. Dátim i ichi jém uvas. ¹²Jesic jém nas iomi tuciy icutsat tungagam jém icuyoxapaap, pero accoowata, quebacputtátim.

¹³Ocmi ijs jém nas iomi: “¿Íti wiap anwat? Ancutsatpa jém ammanic jém tsampic antoypa. Ích animpa iga wixtáp jém ammanic.” ¹⁴Jesic jém pixiñ imaníc nic ipic jém uvas. Pero mu iixyay jém icnucsneyajwiip jém nas, nanímayyajtajp: “Yíbam ipictsonpa

jém ijatuj imiichi. Siip tanaccaaba. Jesic taichfam tammiiichap yíp nas.”

¹⁵Jesic matsta jém pixiñ imaníc, quebacputta, accaata anjicmi.

Jesic Jesús icwác jém pixiñfam:

—Siip anímaayi: ¿Tí iwatpa jém nas iomi con jém malopic pixiñfam? ¹⁶Ich animpa iga miñpa iccucaáy ifumpiy jém icnucsnewiip jém iñas. Imétspa tuḡgac iga iyoxacaiñ jém finca de uvas.

Cuando imatoriyajpa junimpa Jesús, jesic nímuyaj jém anjagooyiyaj:

—iNi Dios da ixunpa iga tannascaaba jempic!

¹⁷Jesic Jesús pimi iámmats jeeyaj. Iñímáy:

—¿Jesic tí nimtooba jém Dios inmatí jém jayñewiip?

Jém ticwatpaap ipatsáy jém tsa. Ocmi eybictim pinṭa, accámṭa juṭ tsucumpa jém tiganṭaana.

Siip jeetim tsa icóppacne jém tic.

¹⁸Nimítim Jesús:

—Siiga michutpa yíp tsaayucmi, micusámáypa juuts tum majcuy. Siiga micuchijquetpa yíp tsa, michýpa juuts poofí.

I tanyojáypa jém impuesto

(Mt. 22:15-22; Mr. 12:13-17)

¹⁹Jém panij anjagooyiyaj con jém escribapic maestroyaj imatsyajtooba idíc jém Jesús jeetí rato. Porque icutiíyiyaj iga jeeyaj icuyucmi inmatpa jém xutu cuento. Pero da wiap imatsyaj. Icinjaypa jém pixiñfam. ²⁰Jesic agui icuixyajpa jém Jesús. Icutsatyajpa jém icusutsyajpáppic. Jeeyaj

nímanṭaayayajpa iga icuyujcayajpa jém Jesús inquímayooyi. Pero migóypa. Imétsyajpa juṭpic wiap iquejajwadayyaj, iciijunṭocotyajtooba Jesús jém gobernador iciijom.

²¹Jeeyucmi icwácayajpa Jesús, nímayfa:

—Maestro, anjodónata iga ininmatpa jém wibic jixi. Tsam wi jém iñanama. Mich da ammigóyáypa, siempre ininquejpa jém numapic anquímayooyi jém tachiiñewiip Dios. ²²Jesic anímaayi: ¿Wi iga tanyojáypa impuesto jém Romapic anjagooyi o da wi?

²³Pero Jesús icutiíyiy iga agui jáyayanjichich jém icusutsyajpaap. Iñímáy:

—¿Tíiga ancutitstámpa?

²⁴Anquejaayi tum jém tumiñ. ¿I iwiñpac, i iniyi accámayñeta yíp tumiñyucmi?

Jesic nímuyaj jém pixiñfam:

—Jém César, jém Romapic anjagooyi.

²⁵Jesús iñímáy:

—Jesic jém Césarpic imiichi, chiítaami jém César. Jém Diospic imiichi, chiítaami Dios.

²⁶Pero Jesús da tí inmat jém pixiñtamanjom iga jém ienemigoyaj da wiap iquejajwadayyaj. Ipoonanjamyajpa iga agui wiap icutsoḡ Jesús. Jém icutitsyajpáppic dam más jiy.

Juṭsap icpisyajṭa jém caaneyajwiip

(Mt. 22:23-33; Mr. 12:18-27)

²⁷Ocmi miñ ímuyaj Jesús algunos jém saduceoyaj. Jeeyaj da icupicyajpa iga Dios icpispá jém caaneyajwiip. Icwácayajpa jém Jesús, nímuyajpa:

²⁸—Maestro, jém Moisés tajaychagayñe iga siiga caaba tum pìxiñ y ichacpa iyomo ða manigý, jesic jém pìxiñ íñwi ipigáypa jém iyomo iga inimanicwatpa. Tsýpa jém imaníc juuts jém caanewiip imaníc. ²⁹Jesic íf ídic tum pìxiñ con siete ijaymaníc. Ançoomíypa jém más achpic. Ocmim ca. Ða ichac ni tum imaníc. ³⁰Jesic jém ipiitsi ipic jém icapay, jém cunoya. Ocmi jém pìxiñ caatim mex je. Ðatim inimanicwat jém yomo. ³¹Jesic jém tunçac ijáyuc ipictim jeetim yomo. Jempigam iwatyaj icusiete. Ca ítumpiy. Ni tum ða inimanicwat jém yomo. ³²Ocmi caatim mex jém cunoya.

³³Jesic acwácta Jesús:

—Anímaayi cuando acpisyajtap jém caaneyajwiip, ¿jup de jeeyaj tsýpa iga jém yomo iwíðaya? Icusiete iniñcoomiñeyaj jém yomo.

³⁴Jesic Jesús icutsoñ. Nimpa:

—Jém ítyajwiip yíp naxyucmi jém pìxiñtam y jém yomtam ançoomiyyajpa, napicyajtap.

³⁵Pero jém wiapaap inñcyaj siñyucmi, jém icpisyajpáppic Dios de jém caaneyajwiip, ðam ançoomiyyajpa, ðam napicyajtap jém pìxiñtam con jém yomtam.

³⁶Jém náyajpáppic siñyucmi ða eybic caayaajpa. Tsýyajpa juuts jém siñyucmipic pìxiñtam. Jeeyaj Dios imanictam porque Dios ichiijay jém jomipic mijtay. ³⁷Jém Dios inmañi, jém ijaychacnewiip jém Moisés, tanquejaytámpa iga acpistap jém caaneyajwiip. Nimpa iga cuando jípsa jém xutu cuy, Dios inñmáj jém Moisés iga: “Ich jém Abraham aDios, jém Isaac aDios y jém Jacob

aDios.” ³⁸Quejpa iga tanJatuñ Dios ða je jém caanewiíppic iDios, je jém vivopic iDios.

³⁹Jesic jém escribaspic maestroyaj inñmayaj jém Jesús: —Maestro, miwñnim.

⁴⁰Ða eybic icwácyajpa. Iciñyaj.

I imaníc jém Cristo

(Mt. 22:41-46; Mr. 12:35-37)

⁴¹Jesic jém Jesús inñmáj jém pìxiñtam:

—¿Jutsap inñmyaj iga jém Cristo jém rey David imaníc? ⁴²Pero jém David ijaychacne jém Salmojom:

Jém tanJatuñ Dios inñmáj jém tánQmi Cristo:

“Coñi yim anañwimi

⁴³ hasta que inçoñwý jém mijóyixyajpaap.”

⁴⁴¿Pero jutsap ichý jém Cristo juuts jém David imaníc siiga nímñtim jém David iga jém Cristo je jém iQmi?

Wogayfa jém maestro de jém Israelpic anquímayooyi

(Mt. 23:1-36; Mr. 12:38-40; Lc. 11:37-54)

⁴⁵Iganam imatoñyajpa ítumpiy jém pìxiñtam, Jesús inquejáypa jém icuyujciwiñ. Inñmáj:

⁴⁶—iNawattaji cuenta! Odoy wati juuts iwatyajpa jém escribaspic maestroyaj. Agui iwianjamyaj iga iccámyajpa jém yagatsyooñi. Agui iwianjamyaj iga tandioschiñ calle. Imétsyajpa jém más yucmipic coñcuy jém sinagoga. Cuando nicpa sññaji icusuniyyajpa jém más wibic coñcuy juñ wícyajpa. ⁴⁷Agui jáypa inwejpát Dios iga tamigóyáypa. Pero ocmi iccáyáypa jém cunoya íñic. Yíp malopic pìxiñtam

ipictsonyaypa tsam mijpic castigo cuando nicpa iyoj ífánca.

**Jém pobrepic cunoya inimíñáy Dios
túm ofrenda**

(Mr. 12:41-44)

21 Jém mijpic masticjom ámquím Jesús, iix jém ricopic icotyaypa tumiñ jém cajonjom juí cottap ofrenda. ²Iixítim tum pobrepic cunoya. Icot cajonjom wisten xuxuí tumiñ. ³Nimpa Jesús: —Numa, mannímáypa iga yíp pobrepic cunoya más chióy que ítumpiy jém miññeyajwiip. ⁴Yípyaj rico icotyaypa cajonjom no más jém cutsíñewiip. Pero yíp yomo aunque tsam yaachap, icuchiáy Dios ítumpiy jém iniitwiip. Dam tí initsíy iga ijuypa iwíccuy.

**Nimpa Jesús iga miswattap jém
mijpic mastic**

(Mt. 24:1-2; Mr. 13:1-2)

⁵Nimayajpa jém icuyujciwiñ: —Agui wíwatnetā yíp mijpic tammastic. Agui wítampic tsa accamayñeta. Agui wítampic xaja jém inimiññewiip jém pixiñtam iga ichiiba Dios.

Jesic nimpa Jesús:

⁶—Núcpa jém jama iga miswattap yíp mijpic mastic. Da cutatsquetneeba ichíy ni tum tsa. Ítumpiy accujegayyajtāp.

**Jém seña iga tánixpa antes que
cuyajpa yíp nas**

(Mt. 24:3-28; Mr. 13:3-23)

⁷Jesic jém icuyujciwiñ icwácayaj jém Jesús. Nímaytā:

—¿MamMaestro, juchis naspa yípyaj cosa? ¿Jup seña tánixtampa

cuando núctooba ítumpiy yípyaj cosa?

⁸Nimpa Jesús:

—Nawattamtaji cuenta iga odoy i mimigóyáiñ. Porque miñyajpa waí jém migoyyajpaap ich anniyimí. Nimyajpa iga: “Ich aCristo”; y “Siip núcum jém tiempo.” Pero odoy cupíci. Odoy túñiyi. ⁹Cuando immatontámpa iga miñpa jém guerra y miñpa jém bulla, odoy cñji. Porque wiñtí naspa ítumpiy jexpic cosa. Pero danam jobit togoypa yíp nas.

¹⁰Iñímáyitim Jesús:

—Tum nación áyayajpa con tungac nación. Tum naxyucmi iwatyajpa guerra con tungac naxyucmi.

¹¹Miñpa jém mijpic nasyixi. Miñpa mijpic yuu, miñpa tsam jáyay caacuy juñquej. Miñpa jém cosa agui michiganjécpa. Quejyajpa jém mijpic seña siñyucmi.

¹²Pero wiñtí mimatstamtap mimichtam. Mimalwadaytamtap. Mininictamtap jém sinagoga iga miquejajwadaytamtap.

MicUcomtamtap cárcel. Mininictamtap jém rey iwiñjom y jém gobernador iwiñjom.

Mijóyixtamtap ich añcuyucmi.

¹³Jesic cuando miñúctámpa jém anjagooyicim wiap ininmadayta jém wibic añmaí. ¹⁴Odoy wadaayi caso jutsap inicupujta ñnyaac,

¹⁵porque manchiiba añmaí juípic incutsonpa. Manchiiba jém wibic jixi. Jém mijóyixpaap da wiap micoñwíy. Da wiap micseedáy jém ininmaí. ¹⁶Algunos de michtam mijóyixtámpa jém inñatuj o ññapa o inñíwi o ññamigo.

Mimatstamtap iga micijuncottap

jém anjagooyiciim. Miccaatamtap algunos de mimichfam. ¹⁷Ífumpiy jém pixiñfam jém ifyajwiip yíp naxyucmi mijóyixtámpa ich aŋcuyucmi. ¹⁸Pero da togoypa ni tum inway jém iniitwiip inçobacyucmi. ¹⁹Siiga inyaachíypa cuando pimi mimalwadaytap, jesic inçonwíy jém imvida.

²⁰Pero cuando inixtámpa iga cutánsetneum Jerusalén con soldado, jesic inçodonam iga jobit togoypa jém attebet. ²¹Siiga miit jém naxyucmi de Judea, jesic poytaami, nictaami jém çotsiganjom. Siiga miit jém attebet de Jerusalén, jesic puttaami, poytaami. Siiga miit aŋsicmi, jesic odoy tigiyi jém attebet.

²²Porque núcum jém jama iga Dios ichiiba castigo jém Jerusalénpic pixiñtam. Cupacpa jém aŋmaŋi jém ijaychacnewiip jém wiñicpic aŋmatciwiñ. ²³Agui uuguytim jém yomtam jém maniccomcanewiip y jém ictsútpáppic jém xuxut tsixtam. Porque miñpa tsam jáyan anyaaqui yíp naxyucmi. Jém Israelpic pixiñtam ipictsonyajpa tsam mijpic castigo. ²⁴Cuando miñpa jém guerra tsam jáyan accaayajtap, matsyajtap, nanicyajtap juumi hasta icuwíti yíp naxyucmi. Jém juumipic pixiñtam miñpa ífi yíp Jerusalén, imiichap hasta cupacpa jém tiempo iga Dios ijgáypa iga tsíyyajpa jem.

Juŋpic miñgacpa jém tánOmi Jesús

(Mt. 24:29-35, 42-44; Mr. 13:24-37)

²⁵Jesic quejpa jém seña jém jamyucmi, jém poyayucmi y jém matsaanjom. Ífumpiy jém pixiñtam

icuwíti yíp mundo tsam pimi çinyajpa cuando imatonyajpa iga pimi jupa y tsigóypa jém lamar. Da icutihyyajpa ti wiap iwatyaj. ²⁶Iga agui çinyajpa, jém pixiñtam cupónaquetyajpa cuando iixyajpa ti naspa yíp naxyucmi. Tsigoyyajpa jém matsa jém ifyajwiip siñyucmi. ²⁷Cuando amiñgacpa, aich jém aMiñnewiip Siñyucmi, jesic ifumpiy jém pixiñtam jutquej yíp naxyucmi wiap aixyaj. Amiñgacpa ucsiyucmi juuts tum mijpic anjagooyi, anamiñpa jém Dios ipimi. ²⁸Cuando moypa naxi yípyaj cosa, maymáyaj, agámquiimi inçobac, porque dam jáyñe miciaçuttámpa Dios.

²⁹Inmatim Jesús yíp xuŋtu cuento: —Ámtaami jém tsuj y jém tungac cuyyaj. ³⁰Siiga inixtámpa iga químpa jém mañipic iay, jesic inçodon iga da jáypa naspa jém cuyamsiñ, miñtooba jém cutujci. ³¹Jesaneŋim cuando inixtámpa iga naspa yíp cosa, inçodonam iga núctoobam jém jama iga Dios inçajpa yíp naxyucmi.

³²Numa mannímaytámpa iga da yajpa cucaaayiyaj jém ifyajwiip jém tiempo hasta cupacpa ifumpiy juuts mannímayñe. ³³Cuyajpa jém siñ y jém nas, pero ich anaŋmaŋi cupacpa, da nunca cuyajpa.

³⁴Cuidado iga maŋcupiichciŋypa cuando amiñgacpa. Da wi siiga tsam íf jém malopic jixi inçanamanjom, tsam miucpa, tsam inçispa jém iniitwiip yíp naxyucmi. ³⁵Jém jama miñpa juuts wimpa tum trampa, ichiganjécyaajpa jém pixiñtam icuwíti yíp naxyucmi, jém ðapic anjócneyaj. ³⁶Nawitsacnetamtaji, odoy tsaçi

iga iniñwejpáttámpa Dios iga Dios miyoxpádiñ iga odoy immalnascañ cuando miñpa jém jama. Jesic wiap inñúc ich anwiñjom jém aMiññewiip Siñyucmi.

³⁷Jesic siññi Jesús inquejáypa jém ityajwiip jém mijpic masticjom. Tsuucim nicpa ití jém cotsicyucmi, jém cotsic inñyi Olivos. ³⁸Cada cuqueja nicyajpa jáyañ jém pixiñtam jém mijpic masticjom iga imatoñajpa jém Jesús.

Jém ienemigoyaj iñsyajpa jutsap imatsyaj jém Jesús

(Mt. 26:1-5, 14-16; Mr. 14:1-2, 10-11; Jn. 11:45-53)

22 Jesic núctooba jém siñ iga icútyajpa jém caxtánañi sin levadura, inñyi jém pascuasij. ²Jém panij anjagooyiyaj con jém escribaspic maestroyaj imétsyajpa jutsap iccaayaj jém Jesús. Pero da wiap imatsyaj porque icñyajpa jém pixiñtam.

³Jesic ocmi jém Wocciwiñ tigiy jém Judas Iscariote ianamanjom. Je tum de jém docepic icuyujciwiñ. ⁴Jesic jém Judas nic inmadáy jém panij anjagooyi y jém comandante de jém masticjompic policia jutsap icijunçot jém Jesús. ⁵Jesic agui maymayyaj jeeyaj. Inñmayyaj iga ichiiba tumiñ jém Judas cuando icijunçotpa jém Jesús. ⁶Jesic jém Judas iwat trato con jeeyaj. Moj iméts jutpic icijunçotpa jém Jesús cuando da iyaj jém pixiñtam.

Jém tánQmi ictsucum jém Santa Cena

(Mt. 26:17-29; Mr. 14:12-25; Jn. 13:21-30; 1 Co. 11:23-26)

⁷Jesic núcum jém jama iga iwatyajpa jém siñ iga icútyajpa

jém caxtánañi sin levadura, jém pascuasij cuando accaayajtap jém mañborrego. ⁸Jesús icutsat jém Peto con jém Xiwan iga iwítsacpa jém wiccuy. Nímayyajta:

—Nigi wattaami jém wiccuy iga tanacnaspá jém pascuasij.

⁹Icwácyajpa jeeyaj, nímayta Jesús:

—¿Jut inñxunpa iga tasíñatámpa?

¹⁰Icutsoñpa Jesús, nímaytap jém Peto y jém Xiwan:

—Cuando miñgijyátampa jém atebet, impáttámpa tum pixiñ ininipca tum majcuy ni. Túñjytaami hasta núcpa jém ticciim jut tigiypa.

¹¹Nímaayi jém tic iomi iga jém imMaestro inñmáypa iga: “¿Jut it jém cuarto jut asíñatámpa con jém ançuyujciwiñ?” ¹²Jesic jém tic iomi miñquejáypa tum mijpic cuarto jém yucmipic piso, wítsacneum, jut it itumpiy cosa iga tawícmonçatámpa. Jemum wattaami jém wiccuy.

¹³Jesic nicyaj, ipátayaj jém tic juuts inñmáypa Jesús. Jemum iwatyaj jém wiccuy iga wícmonçajpa jém pascuasij.

¹⁴Jesic núcum jém hora iga wicyajpa. Coñyajum Jesús jém mesaciim con jém doce apóstolyaj.

¹⁵Jesic inñmáypa jeeyaj:

—Tsam ansunpa iga anwatpa yíp siñ con mimichtam antes que ayaachwattap. ¹⁶Mannímaytámpa iga da eybic tawagawícpa jém pascuasij hasta que núcpa jém jama iga Dios injacpa yíp naxyucmi.

¹⁷Jesic Jesús ipic tum copa icijjom. Inwejpát Dios.

Jesigam inñmáypa jém icuyujciwiñ:

—Pictaami yíp copa.

Wéctaami entre mimichtam.

¹⁸ Mannímáyťámpatim iga da eybic ánuca yíp uvas iñi hasta que miñpa jém jama iga Dios injacpa yíp naxyucmi.

¹⁹ Jesic imatspic tum caxťánañi. Cuando yaj injejpát Dios, iwéc jém caxťánañi, ichi jém icuyujciwiñ. Iñímáy:

—Yíp caxťánañi ich ammiťtay. Anchiiba ammiťtay iga accaatañ para mimichťam. Wattaami yimipic iga anjstámpa mimichťam.

²⁰ Ocmi jempicťim iwat con jém copa. Cuando yajum wiiqui, iñímáy icuyujciwiñ:

—Yíp copa jém jomipic trato jém anjatpáppic con mimichťam iga manjwitsagáypa iñťanca cuando antegáypa anniipiñ.

²¹ Siip yim it con taichťam jém aciijuťcotpáppic. Íf ici yíp mesayucmi. ²² Numa ich accaatap, jeeyucmi jém anJatuj Dios acutsat yíp naxyucmi. Pero agui uuguyťim jém pixiñ jém aciijuťcotpaap jém malopic pixiñťam iciijom.

²³ Jesic moj nacwácyajtaji entre jeeyaj iga i iciijucotpa jém iMaestro.

I tsíypa juuts jém más mijpic anjagooyi

²⁴ Ocmi moj anjajiyaj jém icuyujciwiñ. Nacwácyajtá entre jeeyaj iga i tsíypa juuts jém más mijpic anjagooyi de jeeyaj.

²⁵ Pero Jesús iñímáy:

—Yíp naxyucmipic rey tsam pimi iccámpa orde. Tsam ipimíypa jém ipixiñťam. Pero jeeyaj icujpyajpa jém irey aunque agui ipimíy.

²⁶ Pero mimichťam odoy wati jempic. Da wí iga tsam impiimíypa

jém iñiwítam. Entre mimichťam jém más mijpic anjagooyi tienes que tsíypa juuts jém más mañipic. Jém más mijpic tienes que micuyoxatámpa iñumpiyťam. ²⁷ ¿I más iniiť ipimi, jém coñnewiip mesaciim o jém icuyoxapaap, jém inimiñpáppic jém wíccuy? Mannímáypa iga ich amiñ iga manjucuyoxap.

²⁸ Nimťim Jesús:

—Mimichťam siempre miíťa con aich cuando tsam acutťsta. ²⁹ Jeeyucmi manchiiba jém pimi iga michyťamiñ juuts minjagooyítam cuando ich miñpa ananjac jém ítyajwiip yíp naxyucmi. Siip manchiiba jém ampimi porque ich achiiñe jém anJatuj Dios.

³⁰ Tawagaitťampa cuando miñpa ananjac jém pixiñťam yíp naxyucmi. Miwíctámpa y miñťctámpa ammesaciim. Miwagacoñťampa jém anjagooyi iconcuyucmi iga injciipinťamiñ jém doce tribu de jém Israelpic pixiñťam.

Nimpa Jesús iga Peto ignécpa

(Mt. 26:31-35; Mr. 14:27-31; Jn. 13:36-38)

³¹ Jesic Jesús iñímáy jém Peto:

—MiPeto, ixi iga jém Wocciwiñ miwácneta iñumpiyťam. Tsam micutťtspa siiga numa injcupicneta Dios. Micuxicstámpa juuts trigo.

³² Pero ananjwejpátpa Dios para mimich iga odoy inchaguiñ iga injcupicpa Dios. Pero ocmi cuando eybic injcupicsetpa Dios, jesic yoxpaati jém iñiwítam iga iwícupicyajiñ.

³³ Jém Peto iñímáy Jesús:

—MánQmi, aif listo iga tawaganicpa cárcel con mimich. Wiapťim tanjagaca.

³⁴ Pero jém Jesús iníímáy:
—MiPeto, mannímáypa iga yípfím
jama antes que añwejpa jém cayu
anañécpa túcciy, miñimpa iga dá
ánixpicpa.

**Núcum jém jama iga
yaachwattap jém Jesús**

³⁵ Jesic Jesús iníímáy jém
icuyujciíwiñ:
—Cuando mañcutsatta sin morral,
ni jém iníitumiñ accáycuy, ni tunjac
injac; ¿jesic tí mitogóyáy?

Nímyaj jém icuyujciíwiñ:

—Da tí.

³⁶ Jesic Jesús iníímáy jeeyaj:
—Siiga siip inimiñne jém
immorral o jém iníitumiñ accáycuy,
jesic wiap ininic. Siiga dá inií tum
espada, maayi jém iníchamarra
iga iníjuypa. ³⁷ Mannímáypa iga
numa anaccupacpa jém Dios inímaí
jém jaychacnetawíip. Nímpa así:
“Matstap jém Cristo, chiítap castigo
juuts tum accaoyñewíip.” Cupacpa
ítumpiy juuts jaychacnetá jém Dios
inímaí.

³⁸ Jesic nímyaj jém icuyujciíwiñ:

—MánOmi, yíim íf wisten espada.

Nim Jesús:

—Ítum wí.

**Jesús iníwejpát Dios jém lugar
Getsemani**

(Mt. 26:36-46; Mr. 14:32-42)

³⁹ Jesic put Jesús, nic juuts
icostumbre jém Olivos cotsic.
Ífúníyyaj jém icuyujciíwiñ.
⁴⁰ Cuando núcyaj jém cotsicyucmi,
Jesús iníímáy jém icuyujciíwiñ:

—Añwejpáttaami Dios iga odoy í
wíaiñ micutítsta.

⁴¹ Jesic Jesús ichac icuyujciíwiñ,
nic uxañ más juumi, jutspiy
tañwípnicpa tum tsa. Jemum
costeñneactiñ, moj iníwejpát Dios.

⁴² Nímpa Jesús:

—ManJatun, siiga mich
iníwianjam, odoy jíici iga
annascaaba yíp mijpic yaachaji.
Pero odoy wati juuts ich ansunpa,
wati juuts mich iníwianjam.

⁴³ Jesic miñ iwiñquejáy
tum siníyucmipic píxiñ iga
iccamamwadáypa jém Jesús
ianama. ⁴⁴ Pero tsam pími iníspa iga
accaatap, jesic más pími iníwejpátpa
Dios. Agui pími cupijpa hasta
wítspa naxyucmi juuts nípiñ.

⁴⁵ Jesic yaj iníwejpát Dios. Tsucum,
nic júf íf jém icuyujciíwiñ. Ipát iga
monyajpa jeeyaj porque tsam pími
añyácneyaj. ⁴⁶ Jesic Jesús iníímáy
jém icuyujciíwiñ:

—¿Tíiga mimonítampa?

Tsucumtaami. Añwejpáttaami Dios
iga odoy í wíaiñ micmalwat.

Matstá jém Jesús

(Mt. 26:47-56; Mr. 14:43-50; Jn. 18:2-11)

⁴⁷ Iganam jíyapa ixi jém Jesús,
jesigam núcyaj tsam jáyañ píxiñtam.
Jém Judas, jém ítwíip ídic con jém
docepíc icuyujciíwiñ, inimiñ jém
píxiñtam iga iciíjuñcotpa jém Jesús,
icunúc, ichútsáy iacpac. ⁴⁸ Jesic
Jesús iníímáy:

—MiJudas, ¿que mich añwadáypa
atraición aich, jém aMiñnewíip
Siníyucmi, con tum aññacatsuuichi?

⁴⁹ Jesic cuando icuyujciíwiñ iixyaj
iga matstá jém Jesús, inímayyaj:

—MánOmi, ¿mancupujpa con jém
espada?

⁵⁰Tum de jeeyaj íñj jém còbaccpic panij imozo. Íñjquímáy ífatsic jém anjwimipic. ⁵¹Pero nímpa Jesús:

—Odoj wati jempic.

Jesic Jesús ífóbáy eybic jém pìxiñ ífatsic. ⁵²Siibañim mex jém panij anjagooyiyaj con jém mijpic mastic injagooyi y jém wídaytam. Miñpa imatsyay Jesús. Pero Jesús iníímáy:

—¿Íiiga miñ ammatsta con jém espada y con jém cuy? ¿Que ich anúmpaap? ⁵³Jáyum tawagaiñi jém mijpic masticjom, pero da i ammat. Pero siip Dios ijícpa iga wiap ammatsta. Núc jém hora, wiap inwatta juuts ixunpa jém piichciimpic ipimi.

Jém Peto inécpa jém Jesús

(Mt. 26:57-58, 69-75; Mr. 14:53-54, 66-72; Jn. 18:12-18, 25-27)

⁵⁴Jesic matsta jém Jesús, nanicta jém panij anjagooyi íficcim. Jém Peto ijuumactúñy. ⁵⁵Jesic jém ityajwiip jém tiganñaca icnúcyaj jucti, coñyay iga samyajpa. Jém Peto iwaganacoñim. ⁵⁶Jesic tum yomo, jém panij imozo, iix jém Peto iga coñ juť acnúcnetajucti. Tsam iámpa jém Peto, iixpic. Nim jém yomo:

—Yíp pìxiñ siiba idic con je.

⁵⁷Pero jém Peto inéc. Iníímáy jém yomo:

—Miyomo, ich da ánixpicpa jém pìxiñ.

⁵⁸Ocmi tunğagam pìxiñ iix jém Peto. Nímayta:

—iMich, tum de mijeeñim!

Pero jém Peto iníímáypa jém pìxiñ:

—iMipìxiñ, da ánixpicpa!

⁵⁹Ocmi como tum hora, tunğagam pìxiñ nimpáim:

—Numa, yíp pìxiñ íf idic con je, quejpa iga Galileapic.

⁶⁰Jesic Peto iníímáy:

—Mipìxiñ, da anjodoj tí síp inñimta.

Jesic jeefi rato iganam jiyja jém Peto, jesigam anwej jém cayu.

⁶¹TánQmi iámseedáy, iix jém Peto. Jesic Peto ijis tí iníimayñe jém tánQmi cuando miñímáyta jém Peto iga: “Antes que anwejpajém cayu, mich anañécpa tucçy.”

⁶²Jesic put jém Peto. Tsam pimi wejpa. Agui anyácne.

Jém imatsneyajwiip Jesús ixaayiyajpa

(Mt. 26:67-68; Mr. 14:65)

⁶³Jesic jém imatsneyajwiip Jesús ixaayiyajpa. Ixonyajpa.

⁶⁴Añmónayta jém Jesús iixcuy con tum puctucu. Jesic icwácayaj Jesús, nímayta:

—Siiga mixabio, anímaayi i mixonj.

⁶⁵Jesic pimi imalmalnímayyajpa jém Jesús.

Nanicta Jesús juť antuumaneyaj jém còbaccpic panij anjagooyiyaj

(Mt. 26:59-66; Mr. 14:55-64; Jn. 18:19-24)

⁶⁶Jesic cuquejum, antuumanayajpa jém wídaytam jém Israelpic anjagooyiyaj. Ityajñim jém panij anjagooyiyaj con jém escribaspic maestroyaj. Nanicta Jesús juť antuumaneyaj jém wídaytam, jém Sanhedrín. Jesic jém anjagooyiyaj icwácayaj jém Jesús. Nímayta:

⁶⁷—Siiga miCristo, jém micutsatnewiip Dios, jesic anmatí.

Jesic Jesús iníímáy:

—Siiga mannímaypa iga ich aCristo, dátim inçupictámpa.

⁶⁸Siiga mannímáypa iga ttiiga micwágoýtampa, jesic mich dátim aņcutsontámpa ni dátim aņcutsigaytámpa. ⁶⁹Pero ich, jém aMiññewiip Siņyucmi, siip nicpa acoñi jém Dios inwimi, jém iniiŵwiip itumpiy ipimi.

⁷⁰Jesic itumpiy jém ityajwiip icwácyajpa Jesús. Nĩmyajpa:

—¿Que mich Dios miManic?

Jesic jém Jesús icutsoņ. Nĩmpa:

— Mich miñĩmpa iga aicham.

⁷¹Jesic nĩmyajpa jém pĩxiñtam:

—Đam tammétstámpa tuņgac testigo, iyaagam nanmatcata.

Nanicta jém Jesús iga iciipĩpa jém Pilato

(Mt. 27:1-2, 11-14; Mr. 15:1-5; Jn. 18:28-38)

23 Jesic tsucumyaj itumpiy jém Israelpic anjagooyiyaj. Nanicta jém Jesús jém anjagooyi Pilato iwiñjom. ²Jemum moj iquejajwadayyaj. Nĩmayta jém Pilato:

—Yĩp pĩxiñ tsam iccujĩnayñe jém pĩxiñtam jém ityajwiip yĩp naxyucmi. Nĩmpa iga da wi tanyojpa jém impuesto para jém Romapic anjagooyi. Nĩmtim iga je jém Cristo, tum Rey.

³Jesic jém Pilato icwác jém Jesús. Nĩmayta:

—¿Que mich miRey de jém judíos?

Jesús icutsoņ, iñimáy:

—Nũma juuts mich miñim.

⁴Jesic Pilato iñimáy jém panij anjagooyiyaj con jém aņtuumaneyajwiip jem:

—Đa ampádáy ni tum itañca yĩp pĩxiñ.

⁵Pero jém pĩxiñtam más pĩmi jiyajpa. Nĩmyajpa:

—Yĩbam tsam icujĩnayñe itumpiy jém ityajwiip yĩp naxyucmi de Judea con jém inquĩmayooyi. Moj inmat jém inquĩmayooyi jém naxyucmi de Galilea. Siip núcneum hasta yim.

Nanicta jém Jesús iga iciipĩpa jém anjagooyi Herodes

⁶Jesic cuando Pilato imatoņ, acwágoypa. Nĩmpa:

—¿Pero que yĩp tum Galileapic pĩxiñ?

⁷Cuando icutiĩyĩy iga Galileapic pĩxiñ, jesic jém Pilato ipiĩmĩy iga nanictaiñ Jesús juť it jém Herodes, jém Galileapic gobernador, porque noco it jém Herodes. Miññe joyi Jerusalén. ⁸Jesic cuando jém Herodes iix Jesús, agui maymay. Dende pecam iixtooba porque imatoņne iga wiap iwat jém milagro. Siip ixunpa jém Herodes iga iwadiñ Jesús tum milagro. ⁹Tsam pĩmi icwácpa jém Herodes, pero Jesús da icutsoņpa. ¹⁰Iťtim idic jém panij anjagooyiyaj con jém escribaspic maestroyaj. Pĩmi iquejajwadayyajpa Jesús. ¹¹Jesic jém Herodes con jém isoldado da iwixyajpa jém Jesús. Ixaayiyajpa, iccamayyajpa wibic puctucu juuts tum rey. Jesic eybicĩm nanicta Jesús jém Pilatociim. ¹²Jesic jeetĩm jama tsĩyay juuts amigo jém Herodes con jém Pilato, porque wiñti pĩmi najóyixyajtap idic.

Piĩmiytá iga accaataiñ jém Jesús

(Mt. 27:15-26; Mr. 15:6-15; Jn. 18:39—19:16)

¹³Jesic jém Pilato inuunawatpa jém cobapic panij con jém anjagooyiyaj y jém pĩxiñtam jém ityajwiip jem. ¹⁴Nĩmpa jém Pilato:

—Mimichfam anamíñayfa yíp pìxiñ. Miñimtámpa iga tsam iccujíñayñe ítumpiy jém pìxiñtam jém ítýajwiip yíp attebet. Ich aṇwíciipij. Siip íñixñeta iga da ampádáy ítánca tiiga inquejajwadayñeta. ¹⁵Iciipiñtím jém Herodes. Dátim ipádáy ítánca porque eybictím acutsadáy yim. Tsam wíquejpa iga da ti mal iwatne, da wiap anacca. ¹⁶Siip anchiiba castigo, jesic aṇcutsigáypa.

¹⁷Jém Pilato siempre icutsigáypa tum preso cuando naspa jém siij. Jém pìxiñtam wiap icupij jup preso icutsigáypa. ¹⁸Pero ítumpiy jém pìxiñtam, jém ítýajwiip jem, pimi jiyajpa. Nìmyaj:

—iAccai yíp pìxiñ! iCutsigaayi jém Barrabás!

¹⁹Yiptím Barrabás cotta cárcel porque ictsucum tum rebelión jém attebet Jerusalén y porque accaoyñe. ²⁰Jém Pilato icutsigaytooba idic jém Jesús. Eybictím inímáy jém pìxiñtam iga icutsigaytooba. ²¹Pero jeeyaj más pimi jiyajpa. Nìmyajpa:

—iCunuuntaami cunusyucmi!
iCunuuntaami cunusyucmi!

²²Jesic eybictím jém Pilato inímáy jém pìxiñtam:

—¿Tiiga? ¿Ti mal iwatne? Ich da ampádáy ítánca iga accaatañ. Siip anchiiba castigo, jesic aṇcutsigáypa.

²³Pero más pimi jiyajpa jém pìxiñtam. Nìmyajpa iga cunúntañ cunusyucmi. Jesic jém Pilato imatónáy jeeyaj. ²⁴Iwat juuts iwianjamyaj. ²⁵Icutsigáy jém Barrabás jém cotnetawiiip idic cárcel porque tum rebelde, tsam accaóypa. Cutsigayta juuts

ixunyajpa jém pìxiñtam. Jém Pilato iciijucodáy Jesús jém malopic pìxiñtam iciijom iga imalwadayyajiñ juuts iwianjamyaj.

Cunúnta Jesús cunusyucmi

(Mt. 27:32-44; Mr. 15:21-32; Jn. 19:17-27)

²⁶Jesic nanicta Jesús iga cunúntap cunusyucmi. Iganam niquiyaj, jém soldado ipátyaj tum pìxiñ iníyi Ximoj. Cirenepic pìxiñ, seti idic icamjom. Matsta jém Ximoj, accónteñta jém cunus. Ítutsapacpa jém Jesús.

²⁷Ítúñiyajpatím tsam jáyan jém pìxiñtam. Nicyajpatím jáyan jém yomtam. Pimi weyajpa jém yomtam, aṇyácneyaj iga yaachwattap jém Jesús.

²⁸Iámseedáy jém Jesús. Inímáy:
—MiJerusalépic miyomtam, odoj anawejtaami ich iga ayaachwattap. Wejtaami iga miyaachwattamtap mimichfam con jém immanictam. ²⁹Porque miñpa jém jama iga nìmyajpa: “Tsam maymay jém yomo jém dapic manigíy, jém dapic manicomcane y jém dapic ictsútspa tum tsixi.” ³⁰Jesic jeetím jama jém ítýajwiip inímayyajpa jém cotsic: “Acujécqueti.” Inímayyajpatím jém lumu: “Accucumqueti.”

³¹Nimítim Jesús:

—Siiga jempigam inasca jém tsococuy, ¿jesic ti naspa con jém titsnewiip?

³²Nanictaptím wisten malopic pìxiñ iga accaayajtap tumti lugar con jém Jesús. ³³Jesic núcyaj tum lumuyucmi, iníyi jém Tsútscoḃacpacchím. Jenum cunúnta jém Jesús cunusyucmi. Cada lado

cunúnyajtaŕim jém wisten malopic p̄ixiñ, tum jém iŋwimi, tum jém iŋnaymi. ³⁴Iganam cunúntap jém Jesús, iŋwejpát Dios. Iñímáy:

—ManJatun, wadaayi perdón yípyaj p̄ixiñtam porque da ijodoŋ tí síp iwatyaj.

Jém soldado iwécyay jém Jesús ipuctucu. Iwatyaj tum sorteo ī iconwíypa jém iyagatsyooŕi.

³⁵Jém p̄ixiñtam jém ítyajwiip jem, iámyajpa jém Jesús. Jém Israelpic anjagooyiyaj p̄imi ixaayiyajpaŕim. Niŋmyaj:

—Yíp p̄ixiñ nimp̄a iga wiap iciacput tunŋac p̄ixiñ. Jesic siiga numa je jém Cristo, jém icutsatnewiip Dios, wi iga naciaputtaiñ iyaac.

³⁶Ixaayiyajpaŕim jém soldado. Iacunú, ichi jém catsupic vino iga iuguiñ, pero Jesús da iuc. ³⁷Jesic jém soldado iñímayyaj jém Jesús:

—Siiga mimicham jém judíospic miRey, naciaputtaji iñyaac.

³⁸Accámayŕa tum letrero icobacantim̄i. Jayñe jém letrero tucuten anmat̄imi, jém griego, jém latín y jém hebreo. Yiimpic nimp̄a: “Yíbam jém judíos iRey.”

³⁹Jesic tum de jém wisten malopic p̄ixiñ, jém cunúnetawiiip, p̄imi imalnímáy jém Jesús. Iñímáy:

—Siiga mich miCristo, naciaputtaji iñyaac. Aciaputtaamifim aichtam.

⁴⁰Pero jém tunŋac iwogáy iŕiwi. Iñímáy:

—¿Que mich da iŋciŋpa Dios? Siip tampictsoŋnetim̄ jexpictim̄ castigo. ⁴¹Taichám tanaif razon iga tayaachwattap porque siip tanyojpa jém tantánca. Pero yíp p̄ixiñ da tí mal iwatne.

⁴²Nim̄tim jém p̄ixiñ:

—MiJesús, aŷisi cuando núcpa jém jama iga michíypa juuts anjagooyi.

⁴³Jesic Jesús iñímáy:

—Numa mannímáypa iga yíptim̄ jama nicpa tawagaiŕi paraíso.

Accaata jém Jesús

(Mt. 27:45-56; Mr. 15:33-41; Jn. 19:28-30)

⁴⁴Núc cugapjama. Cupiicha icuwíŕi yíp naxyucmi. P̄imi piicha hasta las tres de la tarde. ⁴⁵Jém jama cupiichane. Jém miŷpic masticjom teeŋaŋsajtim̄ jém puctuctaani icuyagats. ⁴⁶Jesic Jesús p̄imi jiy. Nim̄:

—ManJatun, manciijun̄codáypa ánanama.

Jesic yaj nim̄i, caum jém Jesús.

⁴⁷Cuando jém Romapic capitán iix tí iñasca, moj icujíp Dios.

Nimp̄a:

—Numa, yíp tum wibic p̄ixiñ. Da tí mal iwatne.

⁴⁸Iŕumpiy jém p̄ixiñtam, jém an̄tuumaneyajwiip, cuando iixyaj tí acnascata jém Jesús, ixon̄yajpa ipecho porque p̄imi anyácneyaj. Ocmi setyajum ificciim̄. ⁴⁹Pero iŕumpiy jém Jesús iamigoyaj con jém Galileapic yomtam jém miñneyajwiip con Jesús, tsíyyaj juumi iganam iámyajpa tí acnascata jém Jesús.

Cumta Jesús tum tsaajosjom

(Mt. 27:57-61; Mr. 15:42-47; Jn. 19:38-42)

⁵⁰Jesic íftim̄ jem tum wibic p̄ixiñ iñiyi José, Israelpic anjagooyifim̄. Siempre iwatpa juuts ixunpa Dios.

⁵¹Síp in̄jóc jém jama iga Dios in̄jacpa yíp naxyucmi. Jém p̄ixiñ tsucum jém atbet Arimatea, jém

naxyucmi de Judea. Je *da* tigiycúm con jém tungac anjagooyiyaj cuando ijisyaj iga accaatap jém Jesús. ⁵²Jesic jém José nic iám jém Pilato. Iwágáy jém Jesús imijtay. ⁵³Oy icquedáy jém imijtay jém cunusyucmi. Inmon con wibic puctucu de lino. Icum tum tsaajosjom, watnetawiip, juť *da* i queman icum tum tsúts. ⁵⁴Yiptim jama jém Israelpic pixiñtam iwatyajpa jém iwíccuy iga wiap ijejjaj jém jejcuyjama. Jesic cuando cumta jém Jesús, tsucumtooba jém jejcuy jama.

⁵⁵Jém yomtam, jém miññeyajwiip de Galilea con Jesús, itúnjyyaj jém José iga iámyajpa jém tsaajos y juuts cotneta jém Jesús imijtay. ⁵⁶Jesic jém yomtam setyaj iticciim, iwítsacyajpa jém pooťi jém cįnpáppic y jém wibic pomada. Ocmi jejjajpa jém jejcuyjama juuts nimpá jém aņquímayooyi.

Acpisnetawum jém Jesús

(Mt. 28:1-10; Mr. 16:1-8; Jn. 20:1-10)

24 Jesic jém wiñtipic jama de jém semana, tsam tsúytim, nicgac jém yomtam jém tsaajosciim. Ininicyaj jém pooťi cįnpaap jém iwatnewiip. Iwagananicyajtim jém tungac yomtam. ²Cuando núcyaj jém tsaajosciim, iixyaj iga aņáyñeum jém tsaajos. Aņjoobayñetawum jém jos aņnúccuy. ³Tigiyyaj jém yomtam jém tsaajosjom. Dam ipádáy jém tánOmi Jesús imijtay. ⁴Agui cįnyaj, *da* icutiyyíy tí nasne jem. Jesic iixyaj iga jemum teñ wisten pixiñ, agui tsočpa jém ipuctucu. ⁵Tsam pimi ichiganjécycyaj jém yomtam,

ámquetneyaj naxyucmi. Jesic jém siņyucmičic pixiñ inímáy jém yomtam:

—čTiiga miñ immétsta jém vivopic yiim juť cumneta jém caaneyajwiip?
⁶Je *dam* i yiim. Acpisnetawum. Jištaami juuts miñmayta cuando if idic jém Galilea. ⁷Miñmáy iga jém Miñnewiip Siņyucmi cįjučcottap jém malopic pixiñtam iciijom, cunúntap cunusyucmi, jesic jém tucunajama acpistap.

⁸Jesic jém yomtam ijisyajpa jém aņmaťi juuts inímayñe jém Jesús. ⁹Jesic setyaj jém yomtam de jém tsaajos hasta juť aņtuumaneyaj jém once con jém tungac jém Jesús icuyujciwiñ. Inmadayyaj tí iixyaj. ¹⁰Siiba jém Malía Magdalena, jém Xiwana y jém Malía jém Jacobo iapa. Jeeyaj con jém tungac más yomtam inmadayyaj jém apóstolyaj tí iixyaj jém tsaajosjom. ¹¹Pero jém Jesús icuyujciwiñ ijisyaj iga migooyi. *Da* icupicyaj tí inmadáy jém yomtam.

¹²Jesic póyanťsucum jém Peto, nic jém tsaajosciim. Ámcúm jém tsaajosjom, iix no más jém inmónócyuy, tsacneta tum aņeymi. Ocmi set jém Peto. Agui tįneanjac, ijįspa ijįxianjom tí nasne.

Jém Emaús čutuj

(Mr. 16:12-13)

¹³Jesic jeetim jama nicyajpa jém tiganjoj Emaús wisten jém Jesús icuyujciwiñ. Jém Emaús como once kilómetro ijuumi de jém Jerusalén. ¹⁴Iganam niqiyaj jém wisten icuyujciwiñ, sįp inmatyaj tí inasca jém Jesús. ¹⁵Iganam aņmatyajpa jém wisten, jesigam

núc Jesús juŕ níquiyaj; mojum iwagananicayaj. ¹⁶Dios da ijčpa iga iixpiguĩn jém icuyujciwiĩn. ¹⁷Jesic Jesús moj icwác jém wisten, iĩmáy:

—¿Tĩ siip ininmatta iganam miĩiquĩtam tunjom? ¿Tĩiga miñyácnetā?

¹⁸Tum de jeeyaj, iĩyi Cleofas, icutsoŋ. Iĩmáy:

—¿Mioy Jerusalén y da injodonj tí nasne jemíc? ¿Que juumipic mipixiĩn?

¹⁹Jesic Jesús iĩmáy jém pxiĩn:

—¿Tĩ nasne jemíc?

Nĩmpa jém Cleofas:

—Tsam jáyaŋ cosa iĩnasca jém Jesús jém Nazaretpic pxiĩn. Je tum profeta tsam wiap, agui wiaptim inmat jém Dios iwiñjom. Itumpiy jém pxiĩntam tsam iwixyajpatim. ²⁰Pero jém cobacpic panijyaj con jém aichťampic ananjagooyiyaj iciijunocotyaj jém Jesús jém Romapic anjagooyi iciijom iga accaataĩn. Jenum cunúnta cunusyucmi.

²¹Ichťam anjístampa idic iga jém Jesús wiap taciapputta taichťam jém taIsraelpic tapixiĩtam. Siip nasneum tucunajama iga accaata.

²²Juten de jém aichťampic yomtam oy iámyaj jém tsaajos tsúyĩm. Agui atsiganjécta, ²³porque anmadayyaj iga dam i jém tsúts jém tsaajosjom. Anĩmayťa iga iixyaj wisten siñyucmipic pxiĩn. Nĩmpatim jém yomtam iga anmadayťatim iga pisneum jém Jesús. ²⁴Algunos de aichťam oy iámyaj jém tsaajos.

Numa iixyaj jém cosa juuts nim jém yomtam. Pero da iixyaj jém Jesús.

²⁵Jesic Jesús iĩmáy jém wisten icuyujciwiĩn:

—Odoy cuixataami. Agui mijixicumonjeta iga da incupictámpa itumpiy juuts ijaychacneyaj jém wiĩncpic profeta. ²⁶¿Que da injĩspa iga yaachwattap jém Cristo y ocmi quĩmpa siñyucmi?

²⁷Jesic jém Jesús moj inquejáy jém Dios inmafi jém ijaychacnewiip jém Moisés y jém wiĩncpic profetayaj. Inquejáypa itumpiy juŕ jaychacnetā de jém Cristo.

²⁸Jesic núcyajum jém wisten icuyujciwiĩn jém tiganjoj juŕ nicyajpa. Injamaypa iga jém Jesús nicpanam más juumi. ²⁹Jesic jém icuyujciwiĩn iĩmáyyaj Jesús iga tsýiĩ con jeeyaj. Nĩmayťa:

—Tsiyĩm yĩm con aichťam porque tsuuyĩm, piichabam íti.

Jesic jemum tsý jém Jesús con jeeyaj. ³⁰Wagacoñyajum mesaciim. Ipic Jesús tum caxťánaĩn, moj inwejpát Dios. Ocmi iwéc jém caxťánaĩn con jém wisten icuyujciwiĩn. ³¹Jesic Dios ijígáy jém wisten iga iixpiguĩn jém Jesús. Pero jeetĩ rato coñtogoy, da iixyaj juŕ iinj. ³²Jesic nacwacyajtap jeeyaj. Nĩmpa: —¿Que da injĩspa iga agui imatspa tánanama cuando tanmadáypa tunjom y cuando tanquejáypa jém Dios inmafi?

³³Jesic jeetĩ rato setyaj jém wisten Jerusalén. Tigiy jém ticjom juŕ antuumaneyaj jém once con jém tungac jém Jesús icuyujciwiĩn. ³⁴Nĩmáyyajta jém oyñewiip jém Emaus.

—Numa, pisneum jém tánOmi. Dios icpis. Jém Peto iixñe.

³⁵Jesic jém wisten inmatyajfĩm tí iĩnascayaj tunjom y jutsa miixpicayaj

jém Jesús cuando iwécpa jém caxtánañi.

Jesús iwiñquejáy jém icuyujciwiñ

(Mt. 28:16-20; Mr. 16:14-18; Jn. 20:19-23)

³⁶Iganam síp iñmatyay jém icuyujciwiñ, jesigam núc jém Jesús, iwiñquejáy juí añtuumaneyaj. Idioschi jeeyaj, iñmá:y

—Xutsóytam.

³⁷Pero jeeyaj agui añjécyaj, cñyay. Ijisyaj iga iixyay tum anama. ³⁸Jesic Jesús iñmá:y

—¿Tiiga minjécnetá? ¿Tiiga iniífta jexpic jixi iñanamajjom?

³⁹Aámaayi jém añci y ampuy. Icham aJesús. Atsictaami iga iñcutiñyíyítamiñ iga da je ainama. Porque tum anama da maayíy ni da pagíy juuts ich anait.

⁴⁰Iganam iñmadáy jém icuyujciwiñ, iñquejáy ici y ipuy. ⁴¹Agui maymayyay jém icuyujciwiñ. Como danam iwícupicne, agui tñeñajcyaj. Jesic Jesús iñmá:y jém icuyujciwiñ:

—¿Iniífta uxaj wíccuy iga añciispa?

⁴²Jesic chiiñta tum jaca tiipi jaasnewiip. Chiiñtám tum jaca chiñu con iñayi. ⁴³Ipiçtsøj jém Jesús. Moj iciis.

⁴⁴Ocmi iñmá:y

—Siip accupacnetawum jém añmañi jém mannímayñewiip cuando aít idic con mimichám. Mannímayñe iga tienes que anaccupacpa ítumpiy juuts ajaychagayñe jém Moisés, jém wiñicpic profetayaj y jém Salmojom.

⁴⁵Jesic jém Jesús ichi jixi jém icuyujciwiñ iga wíañ icutiñyiyaj

jém Dios iñmañi jém jayñewiip.

⁴⁶Jesús iñmá:y jém icuyujciwiñ:

—Jém wiñicpic añmañciwiñ

ijaychacne iga tienes que accaatap jém Cristo jém icutsatnewiip Dios. Ocmi acpistap jém tucunajama de juí ít jém caaneyajwiip. ⁴⁷Jesic yíptim Cristo icutsatpa jém icuyujciwiñ iga iñmadayyajñi jém pixiñtam jém wibic añquímayooyi. Mojpa iñmatyay jém attebet Jerusalén. Ocmi núcpa yíp añmañi ítumpiy jém naciónyaj icuwíti jém naxyucmi. Añmadayyajtap jém malopic pixiñtam iga icucaguñ jém ijixi ñapic wí. Cuando cucacum ijixi, jesic Dios iccáyáypa jém ítáñca. ⁴⁸Mimichám wíap iniñmadayta jém pixiñtam porque iñixñeta tí annascane. ⁴⁹iMatonñtaami! Mañcutsadáypa jém Dios ipimi juuts mijíycámayñe anJatuj Dios. Jesic tsíytaami yíp attebet Jerusalén hasta impictsoñtampa jém siñyucmicpic pimi.

Químpa Jesús siñyucmi

(Mr. 16:19-20)

⁵⁰Jesic Jesús ininic jém icuyujciwiñ hasta jém tiganjoj Betania. Içquím ici, iñwejpátpa Dios iga iwíwadáyñi jém icuyujciwiñ. ⁵¹Jesic yajum iñwejpát Dios, nic Jesús. Naniçta siñyucmi. ⁵²Costeñyay jém icuyujciwiñ iga ijisyajpa Jesús. Ocmi setyajum Jerusalén. Agui pimi maymayyay. ⁵³Seguido wagaítyaj jém mijpic masticjom. Içujípyajpa Dios.

Jemum cuyaj.